

萬 有 文 庫

第 二 集 七 百 種

王 雲 五 主 編

宋 詩 紀 事

(七)

厲 鶚 馬 日 瑄 輯

商 務 印 書 館 發 行

宋詩紀事

(七)

厲鶚曰馬 韓瑄

國學基本叢書

萬有文庫

第二集七百種

總編纂者

王雲五

商務印書館發行

宋詩紀事卷四十

李保

保政和中醫學博士

題朱翼中北山酒經并序

大隱先生朱翼中壯年勇退著書釀酒僑居西湖上而老焉屢朝廷大典醫學求深于道術者爲之官師乃起公爲博士與余爲同僚明年翼中坐東坡詩貶達州又明年以宮祠還未至余一旦夢翼中相過且誦詩云投老南遷愧轉蓬會令淨土變夷風由來只許杯中物萬事從渠醉眼中明日理書帙得翼中北山酒經法而讀之蓋有禦魍魅于煙嵐轉炎荒爲淨土之語與夢頗契余甚異乃作此詩以志之他時見翼中當以是問之其果夢乎非耶政和七年正月二十五日也

赤子含德天所均日漸月化滋澆淳惟帝哀矜憫下民爲作醪醴發其真炊香釀玉爲物春投醪醴米授之神成此美祿功非人耐適安在味甘辛一醉竟與羲皇鄰薰然盈腹皆慈仁陶冶窮愁孰知貧頌德不獨有伯倫先生作經賢聖分獨醒正似非全身德全不許世人聞夢中作詩語所親不願萬戶誤國恩乞取醉鄉作封君續北山酒經

錢唐厲鶚緝

仁顧之錢唐王蘊洲勘定

蓋嶼

嶼政和。中崑山令。

讀沖邈翠微集

聖宋吟哦只九僧。詩成往往比陽春。翠微閣上今朝見。格老辭清又一人。中吳紀聞。

元 助

助字不伐。陽翟人。政和閒。知寧國縣事。

山門靈巖

諸山深窟宅。石門限塵寰。空洞初不礙。風扉敞雲關。高廣幾何許。百夫可回環。誰託遺蹟在。冥濛煙霧閒。羽駕此來往。朝昏想清班。西風翠屏近。藤蘿莫容攀。因循再閱歲。見亦以艱。忻茲固殊特。獨冠江南山。少陵惜未到。我語憑誰刪。寧國府志。

吳 沆

沆字德遠。撫州崇仁人。政和中。與弟澥各獻所著書。解得免解。沆抵廟諱罷歸。隱居環溪。號無莫。

居士有環溪詩話。

和友人趨寧化

聞君早晚趨寧化。尙有新詩別故人。試問幾程端可到。還憂半載不相親。傷心歲律蟬螿暮。解事梅花摘。

索新。去去冰霜頻莫厭。庭闈和氣卽如春。環溪詩話。

春遊吟

鳥語煙光裏。人行草色中。池邊各分散。花下復相逢。

環溪詩話李待制云。

此所謂詩中有畫。

首夏

積雨有餘潤。游雲無定陰。燕飛華屋靜。鶯囀碧窗深。

環溪詩話此詩

殊有富貴氣象。

句

聖主思文德。元臣獻武功。一言深悟意。五利且和戎。沈給事云是使事。天地包羞日。山河匿怨中。給事云太逼。
儒生別有淚。不是哭窮途。給事云作詩當如此。氛祲埋金闕。塵沙暝梓宮。古來嘗膽事。泣血望羣公。給事云好

語。環溪詩話。

吳 濤

濤字德劭。崇仁人。沈之伯兄。

在官阮日作

時乖事轉掘。端居徒含情。不似堦前草。春來隨意生。

絕句

遊子春衫已試單。桃花飛盡野梅酸。怪來一夜蛙聲歇。又作春風十日寒。

環溪詩話。予伯兄籀劬作詩。磨礫圓淨。都無病處。方休。在官。既日小詩。并一絕句。最爲含蓄。有氣象。

吳 沆

沆字德強。崇仁人。沆之仲兄。

暮春回文

嬌聲嚙處藏鸚小。美睡濃時落日斜。橋拂柳溪深漲水。眼驚春雨亂飛花。

環溪詩話。仲兄

詩從蘇黃中入。

句

日長人靜聞風佩。久雨堂空生水衣。簷飛謝女雪。徑掃沈郎錢。和發青亭寫處定移牆上影。捲來如寄隴頭春。墨梅朱唇不駐曉妝薄。玉頰頻啼夜雨翻。綠萼梅花覺青春半。山將白晝陰。夢過一年還是覓。心更萬事竟成灰。環溪詩話

徐端崇

端崇字崇之。壻子。政和閒。隱居禦兒。

春清紀聞東坡帥杭日與徐璣全父坐雙檜堂公指二檜曰二疏辭漢去璣應聲曰大老入周來公爲駭節久之繼而其子崇之亦復少年俊偉落筆千字有人得山谷道人清江詞示之崇之曰山谷當今作者所知漁父止此耶或請爲賦授筆立就識者奇之其末云魯邦司寇陳義高三閭大夫心徒勞相逢一笑無言說去宿蘆花又明月識者奇之

爲蝨所擾得一絕句

空堂夜合勢如雲溝壑寧知過去身滿腹經營盡膏血那知通夕不眠人

春清紀聞時蔡京引用小人賦外

橫斂崇之此詩殆託以規諷云

方元脩

元脩字時敏桐廬人元英先生之後殿中侍御史蒙之子政和初審察監大觀庫後通判濬州奉同程致道著作次鮑溶冬成答客韻送趙叔問奉議歸南都

清秋不相借白髮日更多塵埃困煩促原野懷經過聊當倚滴潤資以生吾禾豈不念離羣驚鷓寧釋窠王孫別都去澹若依松蘿暫別亦復難廣詩飲無何我行聊爾爾渺邈踰江河賸須□佳句相我滄浪歌

宋文鑑

翁挺

挺字士特崇安人彥約子政和中以季父彥國恩補官調宜章尉朝臣交薦改授少府監終尙書

考功員外郎號五峯居士有集

讀許太史祭黃長睿文

祕書丹旆返旅殯尙丹陽海路三山遠江流萬古長交情惟太史傳業冀諸郎誰與銘泉壤臨文淚數行

東觀餘論附

曾續

續字元嗣政和閒人

贈呂居仁

呂家三相盛天朝流澤于今有鳳毛世業中微誰料理卻收才具入風騷

紫微詩話

曾釋

釋字仲成

還家塗中

疎林殘嶺起昏鴉臘盡行人喜近家江北江南春信早傍籬穿竹見梅花

墨莊漫錄

左緯

緯字經臣黃巖人政和中以詩鳴有委羽居士集

石公弼跋云經臣

之詩六義之雋也

委羽山

委羽不知何處是。倩人扶上木蘭橈。欲尋去路花梢密。爭認行雲酒浪搖。流水忽隨山脚轉。洞天疑把杖頭挑。逡巡不覺東風晚。殆有仙人弄玉簫。

石新婦山

煙蘿爲髻霧爲巾。獨立江邊經幾春。無故被人呼作婦。不知誰是畫眉人。以上赤城志。

許少伊被召追送至白沙不及。

短棹無尋處。嚴城欲閉門。水邊人獨自。沙上月黃昏。

詩人玉屑此二十字可謂道盡

惜別之情至今使人黯然魂消

春晚

池上柳依依。柳邊人掩扉。蜨隨花片落。燕拂水紋飛。試數交遊看。方驚笑語稀。一年春又盡。倚杖對斜暉。
後村千家詩

臨海崇教寺

只把山爲界。紅塵自此分。竹窗吟聽雪。苔石坐看雲。意靜詩先到。心清道自聞。深慙王許輩。猿鶴舊同羣。
輿地紀勝

梅花

幾度尋春信。空歸及暮鴉。試搖枝上雪。恐有夜來花。望月穿深塢。迎風立淺沙。若同桃李發。誰肯到山家。

送別

騎馬出門三月暮。楊花無賴雪漫天。客情惟有夜難過。宿處先尋無杜鵑。以上詩林萬選。

天台道中

亂山深處是仙家。海變桑田日未斜。爲有慈親倚門望。卻愁溪上見桃花。天台山志。

句

一別又經無數日。百年能得幾多時。

赤城集。委羽居士集。黃裳序。政

和癸巳陳璠跋。稱其招友句云。

荆溪林下偶談。陳了翁喜左經臣此句。以爲非特辭意清遠。可玩味也。老於世幻。逝景迅速。讀之能無警乎。然此乃古人已道之句。戴叔倫寄朱山人云。此別又萬里。少年能幾時。杜荀鶴送人遊江南云。能禁幾度別。卽到白頭時。但經臣語尤婉而不迫。

爾。

巢禽先覺曉。穴蟻未知霜。落葉。荆溪林下偶談。

孫邦

邦、杭州人。宣和元年進士。官郎中。

唐氏林亭在新城

華屋沈沈野外居。茂林清蔭繞門閭。移花植果心無事。抱子弄孫歡有餘。閑過西疇觀利穫。嬾尋南郭命巾車。問君爲圃嗟予晚。便擬歸休學二疏。咸淳臨安志。

何宏中

宏中字定遠。先世居雁門。宣和元年武舉。廷對第二。調滑州韋城尉。後爲河東河北統制。有成眞通理二集。

齊東野語。定遠爲韋城尉。汴京被圍。獨韋城不下。後爲兩路統制。接應副使。以糧盡被禽。金人憐其忠。授之以官。定遠投牒于地曰。我嘗以此物誘人出死力。若輩乃欲以此嚇我耶。囚西京獄。久之免爲黃冠。自號通理先生。起紫微殿。遷徽宗東華君御容以事之。後病歿。

臨終作

馬革盛屍每恨遲。西山餓死亦何辭。姓名不到中興歷。自有皇天后土知。齊東野語。

程俱毛隨

俱字致道。開化人。以外祖鄧潤甫蔭入仕。宣和二年。賜上舍出身。高宗朝。擢中書舍人。兼侍講。罷。提舉江州太平觀。除徽猷閣待制。卒。有北山集。

石林葉氏曰。致道詩章。兼得唐中葉以後名士衆體。

穹窿葬事回邑有感

生別萬里餘。會面終有期。死別不轉眸。一朝千古非。白日光在天。元陰闕泉扉。盈盈閨中秀。土化成枯骸。冠笄共甘苦。謂見素髮垂。那知生死變。不待桑蔭移。室有病時茵。篋有嫁時衣。了了眼中事。閑妝靜容儀。垂楊手曾折。爲我當春稀。迅流無迴波。落英無還枝。空房閨無迹。新墳草離離。傷心北門道。同來不同歸。

善權洞

嘗聞包山境中有林屋天。旁通號地脈。岳瀆潛鉤連。茲山豈其類。瀕洞皆中穿。二巖岌山足。瑋淙激奔泉。牛羊走大石。吐受無窮年。金堂下石液。雪積如烹煎。從來米鹽稱。浪播里俗傳。一洞啓山腹。穹窿亦聯縣。誰題九斗字。大篆仍深鑄。中藏丈五百。屹若龍騰淵。回頭問主人。謂仲嘉我輩定不凡。云何逐官牒。常得我所耽。向來共幽討。九鎖藏芝巖。而我自林屋。翩然游皖瀆。洪崖儻可俯。不在南山南。

詠勸酒胡

簿領青州掾。風流麴秀才。長煩拍浮手。持贈合歡杯。屢舞回風急。傳籌白羽催。深慙偃師氏。端爲破愁來。

墨莊漫錄。飲席刻木爲人而銳其下置之盤中。左右敬側。傲傲然如舞狀。久之力盡乃倒。視其傳籌所至。酬之以杯。謂之勸酒胡。或有不作傳籌。但倒而指者。當飲。程致道詩云。

和張敏叔遊滄浪亭

醉倒春風載酒人。蒼髯猶想見長身。試尋遺址名空在。卻笑張羅事已陳。稍置曲欄穿徑竹。別開高閣俯汀蘋。擘舟更欲陪清賞。要看毫端藻繪春。

南園

王子池臺迹已荒。年來華構壓高岡。長林不礙千山月。老榦猶含九夏霜。便覺平泉冠東洛。還依綠水記南塘。蝸廬卻喜通幽徑。岸幘時來一嘯長。

蒼蝸廬吳下

四海無廬著此翁。故營松竹儘囊空。明知計出栢馬下。正擬身全木雁中。東郭易成生草舍。南村先怯卷茅風。向來豪氣今如此。敢與元龍較長雄。

九日寫懷

節物驚心兩鬢華。東籬雖繞未開花。百年強半仕三已。五畝就荒天一涯。豈有白衣來剝啄。亦從烏帽自敲斜。眞成獨坐空搔首。門柳蕭蕭噪暮鴉。

龍尾硯同毛彥時隨聯句

歛水清以駛。歛山文且堅。程誰持玉斧琢。製此月樣圓。想當結繩後。要使鳥跡傳。雕鏤見骨格。豈與瓦礫全。毛坡陁百氏圃。澄泓九經淵。墨海不復見。柯窟那可肩。星稀涵緯象。眉綠生春妍。程規模異鎔鐵。濡寫殊懷鉛。正當秋兔穎。發此霜松煙。毛一從毛楮游。幾作蟲魚箋。徵辭想妃子。搵首懷張顛。寧同李生瘞。聊續胡公鑄。程常疑老蚌殼。浸潤成膏研。毛堅逾鵝池鑄。質射銅臺堦。程紛紛況多僞。渴雀同梔鞭。程琳坳隱多水。十手寄所宣。池光激墨色。雲氣開毫聯。翔鸞及垂露。逸勢徒飛翥。毛誰云過珪璧。或用磨戈鋌。吾今欲焚棄。負耒歸園田。程以上北山集

遊大滌

太湖隱吏疎且頑。手板拄頰看西山。筆牀茶竈向何許。往來洞庭林屋閒。側聞餘杭隱大滌。故整煙艇尋茗川。相從喜得二妙士。金庭老客南昌仙。早行不憚踏曉月。逸思自覺奔春泉。岡迴澗轉若無路。但見老翠漫秋煙。中峯一柱萬山表。勢與太華爭擎天。神仙古洞絕壁下。蓬萊別館青雲閒。天壇無人石室冷。借問白鶴何時還。人生但爲形體累。會當去之如蛻蟬。金庭客南昌仙。他時待我乘八景。舉手少別三千年。

洞霄詩集。

胡理

理字德輝。晉陵人。宣和三年進士。紹興初。史館校勘。出守嚴州。有蒼梧集。

楊誠齋序云。陳少陽上書德輝視其草。投畀蒼梧。召用爲郎。又以參政李公秦發之客。見惡於秦丞相。坐廢飢寒。困窮以死。

天慶觀畫龍

道人龍中來。醉與神物會。寫茲蜿蜒質。日月爲冥晦。崩翻江海姿。素壁起濤瀨。呼吸見雌雄。抉石疑可碎。蕭森殿陰古。衆真儼飛旆。注觀恐騰躍。夜半失像繪。飛光者明珠。靈祕一何怪。爛爛照葦棟。那得久在外。偷兒伺酣睡。不怕嬰鱗害。願言慎所託。未用期一快。

梁溪漫志。吾州天慶觀龍。姑蘇道士李懷仁所畫。懷仁者酒豪不羈。嘗呼龍松江之上。狎而觀之。遂畫龍入神品。過毘陵天慶觀。大醉。素墨灑數斗。曳苴帚裂巾袂。濡墨號呼奮躑。斯須龍成。觀者失聲辟易。懼將搏也。懷仁後不知所終。而好事者每呼畫。

工就龍模寫。工運筆之際。輒眩暈欲仆。竟不能成。觀者駭異。郡人胡德輝因
與客論近世名畫。曰。予每至畫龍處。輒諦玩。猶時不能休。乃賦古風云。

遊秀峯寺

攝身下蓬萊。放浪雲水迹。非無簡書畏。心賞寄泉石。亭亭雲間塔。勝地聞自昔。梯空上青冥。如鳥著兩翼。
化城出天半。寶甃坦如席。環山劃中斷。裂地開震澤。峩峩東西峯。觀闕倚空碧。千尋采香逕。劔臥漣漪直。
當年館娃宮。六月避暑夕。琴臺延薰風。萬女曳阿錫。牛耳爭齊盟。烏喙已薦食。百家甬東村。託足歸無宅。
焉知陵谷變。大廈響千鳥。矧茲風塵際。樓殿踊山脊。安隱大火中。顯允象教力。興予浩劫歎。萬法本空寂。

楓橋

朝辭海涌千人石。暮宿楓橋半夜鐘。明日館娃宮裏去。洞庭呼起一帆風。

滄浪亭

昔聞滄浪亭。未到滄浪水。先賢眇遺跡。壯觀亦何侈。飛橋跨木末。巨浸折湖壘。糟牀行萬甕。繚牆周數里。
廢興固在天。庶用觀物理。緬懷嘉祐世。周道平如砥。相君賢相君。子美東南美。如何一網盡。禍豈在故紙。
青蠅變白黑。作俑茲焉始。所有醉翁文。垂耀信百世。無忘角弓詠。嘉樹猶仰止。同來二三子。感歎咸興起。
縹盜醉新汲。毀譽均一洗。恕逢醒狂翁。一別垂二紀。雋哉老益壯。論事方切齒。我欲裂絳幔。推著明光裏。
安得上天風。吹落君王耳。以上吳郡志。

張致遠

致遠字子猷。南劍州沙縣人。宣和三年進士。高宗朝。歷戶部侍郎給事中。出知廣州。以顯謨閣待制致仕。

題明月樓

明月樓前可萬家。鳳山菴下日初斜。風流耆舊消沈盡。空睇寒江耿暮霞。

能改齋漫錄。廖尚書剛用中。嘗夢中作詩。其末句云。家住五湖明月樓。其後公薨。葬於沙縣二十五里交溪鳳山之下。其子遂建樓。以明月目之。張給事致遠賦詩。

胡寅

寅字明仲。安國弟淳之子。初生棄不舉。安國收育之。舉宣和三年進士。高宗朝。歷官禮部侍郎兼侍講直學士。忤秦檜。以徽猷閣直學士奉祠致仕。坐通李光落職。新州安置。檜死。復元官。卒。諡文忠。學者稱致堂先生。有斐然集。

紙帳

細皺卷寒波。輕明籠白霧。何以相徘徊。歲晚正凝沍。枕破一尺竹。被展幾幅布。賢哉楮先生。不以貧不顧。夜玉圍紅綃。羞澀強自賦。書生說富貴。志士安貧素。風驚銀海潮。春在明月庫。先生睡方濃。不覺糟牀注。
翰墨大全

和趙宣

冠月裾雲佩綠霞。百年將此送生涯。愁心別後無詩草。病眼燈前有醉花。落筆擅場聊寫意。背山臨水遂

成家也須南畝多栽秫。休似東陵只種瓜。滿奎律髓。

劉一止

一止字行簡。湖州歸安人。宣和三年進士。紹興初召試。除祕書省校書郎。歷給事中。進敷文閣待制。致仕。有茗溪集。

識舟亭

渺渺歸帆江北渚。脈脈相望那得語。舟中賈客嬋娟女。朝樂瀟湘暮荆楚。我欲招之問計然。浮名唾去如飄煙。買魚沽酒嘯儔侶。搥鼓弄笛殘彫年。

宿溪口

溪聲來天邊。風水共豪縱。夜氣劇奔馬。侵曉不能控。書生有清癖。詠雪寧忍凍。胡爲枕寒流。故遣不成夢。

和巒整二子寒食少天色五字

霧雨昏不醒。東風曉能酸。我食日不足。寧憂三日寒。

人言二月時。霏雨生樹杪。天色何時無。要問寒食少。里語春雨樹頭生。

聞杭州亂

飢來命餉寒索衣。官家養兵如養兒。時平軍健久玩弛。轅門笑歌驕莫隨。往時金陵囚刺史。今者杭州漕臣死。稽天烈焰窮朝昏。千丈紅霞炫江水。鄰州之兵如此兵。嗚呼世難何時平。

睡足齋

此地誰令著此翁。角巾敲倒鬢如蓬。興高絕壁松聲外。夢破寒花啞雀中。睡債幾時償賽足。書淫前日洗除空。故人若問安心法。一酌村醪薦晚菘。

次韻宋希仲侍郎見貽

今日宦游此作客。每逢佳處欲忘年。頗將幻境觀塵世。始信臞儒是列仙。野色分橋山帶邑。晚雲藏寺水黏天。公身未屬煙波管。莫向津頭買釣船。

冥冥寒食雨

冥冥寒食雨。客意向誰親。泉亂如爭壑。花寒欲傍人。生涯長刺促。老氣尙輪囷。不負年年債。清詩斷送春。

訪石林

山行不用瘦藤扶。度石穿雲意自徐。夜過西巖投宿處。滿身風露竹扶疎。

過梅溪省妻父臧翊善墳感歎

寂寞松岡鎖暮煙。平生忠信事茫然。臧孫有後真虛語。伯道無兒可問天。以上苦溪集。

李質

質字文伯。參知政事。昌齡曾孫。爲內侍。梁師成所引。授右列睿思殿應制。

揮塵後錄。質少不檢。文其身。

賜號錦體謫仙。後隨從北狩。

艮岳百詠。奉詔同曹組作。存十八首。

長嶽

勢連坤軸近乾岡。地首東維鎮八方。江不風波山不險。子孫千億壽無疆。

極目亭

千里飛鴻坐上看。山川風月在憑欄。不知地占最高處。但覺恢恢天宇寬。

跨雲亭

地高天近怯憑欄。下視浮雲咫尺閒。只怪輕雷起崑際。不知飛雨過山前。

散綺亭

斷虹飛雨過天涯。碧落浮雲不復遮。明日陰晴真可卜。倚欄來此看餘霞。

蟠桃嶺

不到瑤臺白玉京。海中仙果但聞名。何人爲報西王母。嶺上如今種已成。

三秀堂

窗戶深沈晝不開。鳳凰時下九層臺。月明夜靜聞環佩。知有霓旌羽扇來。

書館

蓮燭詞臣在外庭。青錢學士已登瀛。回廊屈曲隨巖阜。挾策何妨取次行。

林華苑

連雲複道映樓臺。茂苑奇花日日開。但得如春天一笑。芳菲何必曉風吹。

和容廳

白羽流星一點明。上林飛雁幾回驚。弓開月到天心滿。風外惟聞中的聲。

漱瓊軒

淺碧分江入衆山。山深無處不潺湲。開軒最近寒溪口。噴薄松風響佩環。

崑春堂

桂影亭亭漾碧溪。尋芳曾被暗香迷。碧桃開後晴風暖。花外幽禽自在啼。

鑑湖

水天澄澈瑩寒光。一片平波六月涼。移得會稽三百里。不教全屬賀知章。

蘆渚

萬葉梢梢秋意初。斜風細雨憶江湖。誰知雪壓波澄後。更與宮中作畫圖。

松谷

雲藏煙鎖畫蒼蒼。得地何須作棟梁。聞道九龍扶輦過。一山風又作笙簧。

蠟梅屏

冶葉倡條不受羈。翠筠輕束最繁枝。未能隔絕蜂相見。一一花房似蜜脾。

紫硯壁

沒水攀蘿琢馬肝。齋持堅潤出風湍。潛滂每恨端硯遠。疊作山中峭絕看。

濯龍峽

山東蒼煙細路通。噴泉飛雨灑晴空。眞龍豈許尋常見。故作雲閒飲澗虹。

柳岸

牽風拂水弄春柔。三月花飛滿御樓。不似津亭供悵望。一生長得繫龍舟。

揮塵後錄。元符末。掖庭詭言崇出。有茅山道士劉混康者。以法籙符水爲人祈禳。且善捕逐鬼物。上聞。得出入禁中。極有驗。崇恩尤敬事之。寵遇無比。至於卽其鄉里。建置道宮。甲于宇內。祐陵登極之初。皇嗣未廣。混康言京城東北隅地叶堪輿。儻形勢。加以少高。當有多男之祥。始命爲數仞岡阜。已而後宮占熊不絕。上甚以爲喜。繇是崇信道教。土木之工興矣。一時佞倖因而逢迎。遂竭國力而經營之。是爲良嶽。宣和壬寅歲始告成。御製爲記。命睿思殿應制李質曹組共作百詠。

僧祖秀陽華宮記略。政和初。天子命作壽山良岳於禁城之東。陬詔闢人董其役。工已落成。上命之曰陽華宮。大抵衆山環列。于其中得平蕪數十頃。以治園圍。以闢宮門於西。入徑廣于馳道。左右皆大石林立。僅百餘株。以神運昭功。數慶萬壽峯而名之。獨神運峯廣百圍。錫爵盤固。侯居道之中。東石爲亭以庇之。高五十尺。御製記文親書。建三丈碑。附於石之東南。陳其餘。巨石並與。賜名。惟神運峯前巨石。以金飾其字。餘皆青黛而已。此所以第其甲乙者。又有大石二枚。配神運峯作亭庇之。實于寰春堂者。曰玉京獨秀太平巔。實于萼綠華堂者。曰慶雲萬態奇峯。括天下之勝。藏古今之美。於斯盡矣。靖康元年閏十一月。大梁陷。都人相與排牆。避處於壽山良嶽之巔。時大雪新霽。丘壑林塘。宛若畫本。祖秀周覽累日。咨嗟驚愕。信天下之傑觀。而天造有未盡也。明年春。復遊陽華宮。而民廢之矣。

曹緯

緯字元象。一字彥文。潁昌人。有俊才。釋褐卽物故。

自齊山借舟汎湖還家

十里平湖漫不流。晚風吹浪打行舟。定知歸得侵燈火。家在菰蘆最盡頭。宋文鑑

客有遺子畫梅者。淡墨暈成。因命之梅影。

憶昔神遊姑射山。夢中栩栩片時還。冰膚不許尋常見。故隱輕雲薄霧間。聲畫集

雁

雲飛水宿過炎涼。回想來時道路長。夜月照驚惟弔影。朔風吹斷不成行。人間無處逃矰繳。歲晚何曾飽稻粱。儻以能鳴免烹死。繫書猶可到衡陽。後村千家詩

次韻曹好謙負春

作計尋芳不屬貧。可憐風物自良辰。飛花有意能留客。啼鳥多情解喚人。涉世乍驚翻手薄。論交多語白頭新。十年異縣傷流落。來往山州枉過春。

春日憶西湖簡家弟元寵

天涯孤客意堪哀。病眼逢春只強開。閉戶不知花老去。捲簾方覺燕歸來。風休澗水光如拭。雨霽箕山翠作堆。遙想西湖圖畫裏。幾多車馬踏青回。以上詩林萬選

曹組

組字元寵。潁昌人。緯弟。宣和三年進士。召試中書。換武階。兼閣門宣贊舍人。仍給事殿中。官止副

使有箕穎集。

良嶽百詠 奉詔同李質作存十八首。

介亭

雲棧橫空入翠煙。躋攀端可躡飛仙。介然獨出諸山上。磊磊排衙石滿前。

璿波亭

水影搖暉動碧虛。日華陵亂上金鋪。安知不是鮫人寶。往往淵中得美珠。

飛岑亭

微雲將雨洗層巒。石磴莓苔路屈盤。正是江南最佳處。仰看蒼翠俯澄瀾。

囉囉亭

聖主從來不射生。池邊羣雁恣飛鳴。成行卻入雲霄去。全似人閒好弟兄。

八仙館

蟠桃初熟玉京春。圓屋如規戶牖新。盡是瑤池高會客。豈容塵世飲中人。

蕭閑館

書草吹來種種香。好風移韻入松篁。丹臺紫府無塵事。偏覺壺中日月長。

梅池

玉鈿勻點鑑新磨。香逐風來水上多。應爲橫斜詩句好。故教疎影寫平波。

絳霄樓

翼瓦飛甍跨閩風。捲簾滄海日曛曛。佳時自有羣仙到。笑語雲霞縹緲中。

萬松嶺

蒼蒼森列萬株松。終日無風亦自風。白鶴來時清露下。月明天籟滿秋空。

萼綠華堂

綠萼承趺正葉輕。清香續續度簷楹。天教不雜閑桃李。賜與神仙物外名。

清虛洞天

玉關金鎖一重重。只見桃源路暗通。行到水雲空洞處。恍如身世在壺中。

躡雲臺

萬本琅玕密不開。林深明碧鎖高臺。更無一點遊塵到。但覺雲隨步步來。

汎雪廳

月團攜下九重天。來試人閒第一泉。正在水聲山色裏。六花浮動紫甌圓。

景龍江

潤通河漢碧涵空。影倒山光曉翠重。聞說巨魚時駭浪。只應風雨是神龍。

雪香徑

夾徑梨花玉作英。年年寒食半陰晴。要看雪色無邊際。十二樓前月正明。

百花屏

衆香芬馥著人衣。雲母光寒露未晞。圍得春風勝繡幕。紛紛紅紫鬪芳菲。

飛來峯

突兀初驚倚碧空。翠嵐仍與瑞煙重。吳儂莫作西來認。真是蓬萊第一峯。

敷春門

帝力無私萬國通。尙思寒谷待春風。欲將和氣均天下。都在熙熙造化中。以上揮塵後錄。

輦下寒食

海棠時節又清明。塵斂煙收雨乍晴。幾處青帘沽酒市。一竿紅日賣花聲。綵毬時向梭門過。繡轂遙隨輦

路行。日暮人人醉歸去。熙熙春物見昇平。事文類聚前集。

鴛鴦

蘋洲花喚接江湖。頭白成雙得自如。春晚有時描一對。日長銷盡繡工夫。

翡翠

窺魚潛立小荷圓。照水飛鳴更碧鮮。鬪草人歸尋墜翼。綺窗將去補花鈿。以上前賢小集拾遺。

夜歸曲

飢鳥啞啞啼暮寒。回風急雪飄朱闌。瑣窗繡闌豔紅獸。畫幕金泥接彩鸞。吳粧秀色攢眉綠。能唱襄陽大隄曲。酒酣橫管咽孤吹。吹裂柯亭傲霜竹。遠空寒雲渾不動。老狐應過黃河凍。暗回微暖入江梅。何處荒

榛挂玄鳳歸來穩跨青連錢。貂茸擁鼻行翩翩。籠紗蜜炬照飛霞。十二玉樓人未眠。古今詩統

邵彪

彪字希文。鎮江人。宣和三年進士。歷國子監丞。知楚州。

丹陽懷古

故里詩人去。湖山最寂寥。草深張祜宅。花暗許渾橋。鳳髓何時續。蓬萍觸處飄。鴻冥杳難及。霜鬢兩蕭蕭。
鎮江府志

范宗尹

宗尹字覺民。襄陽鄧城人。宣和三年上舍登第。高宗朝。歷尚書右僕射。同中書門下平章事。退居台州。

雞肋編。范覺民作相。方三十二歲。肥白如冠玉。且起輿裏頭帶巾。必皆攬鏡。時謂之三照相公。

遊大有空明洞 在黃巖委羽山

暫到山中禮法壇。空明雲氣逼人寒。當年孤鶴知何處。遙想天風墜羽翰。台州府志

張邵

邵字才彥。烏江人。宣和三年上舍登第。建炎初。以直龍圖假禮部尚書。使金通問。欲降之。不屈。徙于會寧府。和議成。及洪皓未弁南歸。升祕閣。修撰。敷文閣待制。知池州。奉祠卒。有懽軒倡和集。

待制張公行實。公在會寧。士多從之授書。生徒斷木。書于其上。捧誦既過。削去復書。中圓如瓠。而首尾尖。目之曰木檄。蓋其俗兒童誦習率以此。

句

蘇甞久絕寢衣想。姜被忽分挾纊香。謝樞密王公倫惠綿衾。待制張公行實。

張嶠

嶠字巨山。襄陽人。宣和三年上舍中第。紹興中官司勳員外郎。擢中書舍人。升實錄院修撰。有集。

劉後村詩話。巨山陳簡齋之表姪。詩法似之。

夷陵

吳越相持地。江山直險固。昔聞焚夷陵。今茲但遺堵。山遠欲連天。江寬疑浸樹。左顧渚宮塗。右眺襄陽路。野迴無居人。荒村但豺虎。依依念鄉井。愴愴悲墳墓。月淡江風寒。雲深楚山暮。佇立小踟躕。蒼蒼歸鳥去。

防江

大漠與吳越。天南天北頭。虜尤涉吾地。飲馬長淮流。飲馬猶尚可。莫使學操舟。

後村詩話。語意高簡。意味幽遠。

絕句

犖确南山路。叢筠冒水生。寒梅銷落盡。猶有數花明。

十日濃陰飛細雨。清川初漲水平沙。幽人閉戶春已半。開徧山南山北花。故園墳樹想青蔥。寒食風光淚眼中。自痛不如僮父子。紙錢猶挂樹頭風。一行疎樹對柴門。又見荒煙上晚村。日日牆陰觀日影。人生消得幾朝昏。日炙櫻桃已半紅。更薰花氣滿襟風。路傍謁舍蹲遺獸。應有荒墳在麥中。以上後村詩語。

馬擴

擴字子充。中嘉王榜武舉。宣和四年。與趙良嗣使金。議割燕山。特除武翼大夫。忠州刺史。兼閣門宣贊舍人。紹興初。爲湖南宣撫司參議官。有茅齋自敍。

使金和趙良嗣

未見燕銘勒故山。耳聞殊議骨毛寒。願君共事烹身語。易取皇家萬世安。茅齋自敍。

句

未敢此時非趙括。已愁他日類田豐。

三朝北盟會編。紹興二年。曹成執湖南安撫使。向子諱。據道州。宣撫司參議官馬擴。遣使臣張布。齎劄子招成。成受招安。乃放出子諱。參謀范直方曰。曹成不可招保之。使赴行在。馬曰。彼既不願遠出。促之。是使散而爲亂也。宣撫使吳敏惑直方之議。馬以詩獻敏云。遂拂袖歸。又數日。敏以資學宮祠之命到城。成卽復亂。湖廣被其害。直方得郤而去。

王次翁

次翁字慶曾。濟南人。禮部別頭試第一。南渡。知處州。附秦檜。屢遷。至參知政事。奉祠居明州。

聞馬擴辭職作

徒薪曲突論無憑。太尉山中混耦耕。頭額爛焦曾采錄。參謀先已享專城。

近來出處事何如。先輩風流掃地無。忽有子充驚末俗。一言未契便長驅。三朝北盟會編。

傅墨卿

墨卿字國華。山陰人。以大父恩補官。宣和四年。使高麗有功。賜同進士出身。進龍圖閣學士。提舉

杭州洞霄宮。

句

百鍊鑑從天上鑄。五時花向帳前施。端午帖子。容齋五筆。

曹助

助字功顯。陽翟人。組之子。宣和五年。賜同進士出身。紹興中。僑居天台。以韋太后北還。迎鑾功。官

至昭信軍節度使。孝宗朝。加太尉。開府儀同三司。卒。贈少保。諡忠靖。有松隱文集。

夷堅志。紹興中。曹助使金。好事者戲作小詞。其後闕曰。單于若問君。

家世說。與教知。便是紅窗迴底兒。謂助父元寵。昔以此曲著名也。

乾道聖德頌并序

臣恭惟皇帝陛下膺上聖之期。繼中興之統。紹登四載。恭勤百爲。迺乾道改元。政事具舉。營戍罷屯。黎民於變時雍。廷臣小大率職。致淮北之蝗。入境自斃。秋成之積。歲登大有。是皆陛下聖德昭著。雖黃童白叟。所不待言而知。臣以草莽之賤。迫桑榆之年。際遇四朝。叨塵二府。豈不知清明之時。方深貪戀。大懼榮祿浮實。莫允清議。故控露忱悃。仰瀆天聰。特蒙賜俞。已幸晚境。安處閑退。日聽康衢熙熙之謠。顧老臣不當以翰墨。輒塵宸扆。然抃蹈之餘。有不能自己者。謹擬元和之作。極思選言。撰成乾道聖德頌。昧死上進。雖未能形容聖德之萬一。庶少伸臣子歸美之誠。其辭曰。

維聖有作。紹隆興運。天經地義。宗堯越舜。風俗醇厚。日星明潤。冰天桂海。咸祇成訓。皇矣藝祖。肇開宗祊。用集大命。再造羣生。卜世卜年。周室與京。德懋聖孫。區宇再寧。龍潛出震。握符御極。恭儉慈仁。已隆燕翼。勵精治具。羣工惟辟。斯皇聖德。以受方國。躬秉要道。化成斯民。問寢侍膳。克勤日新。刑于四海。率土興仁。至矣聖孝。悅安嚴親。猶夏餘種。久失我重。稍恢雄略。盡還尊奉。復修絳樂。亟續鴛貢。布昭聖武。式皇鉅宋。洪宣景命。爰振皇綱。詔令諭旨。粉澤八荒。宸奎逸彩。龍鳳鴛翔。煥乎聖文。彬彬日彰。誕敷武節。克柔強鷲。風靜邊柝。煙沈晚燧。穡夫力田。塞馬垂轡。巍巍聖功。允格康濟。光啓元良。鶴禁建儲。遴擇端方。贊翊詩書。濬哲文思。日親睿謨。於赫聖明。有開令圖。當天執籙。了無玩好。貴異獻輸。蕩然一掃。力敦嘉靖。詢謀政要。不鑠聖斷。坐臻是奧。從容總攬。用體乾剛。文武一道。督以經常。王化溥博。景風不祥。格天聖治。時雍時康。咫尺威顏。豁達方寸。日角珠庭。金聲玉振。穆穆皇皇。天儀明潤。洪惟聖表。萬寓朝覲。乃武乃文。止戈好生。華夏蠻貊。底於不平。罔或反汗。克斷惟明。長策遠馭。奕奕天聲。寶緒重光。密答純祐。既協皇極。昭報方茂。

堯父舜子。撫封增舊。行復九有。亘萬萬壽。大哉乾元。萬物資之。赫赫明世。吾君繼之。熾昌隆祚。惟皇造之。億萬斯年。惟皇保之。

獨不見

獨不見。誰相憶。花影上珠簾。明月穿窗隙。翡翠暗無光。蒼苔點行跡。鸞鑑挂珊瑚。寶靨銷金碧。彷彿聞簫韶。夢想見顏色。爲我報新人。好好承恩澤。君看後庭花。芳菲能幾日。

楊花曲

春光誰占得。楊花獨自知。未到傳消息。將歸送別離。隨風飛更急。入戶舞還低。大有撩人處。妝臺惱畫眉。
以上松隱集。

沈晦

晦字元用。錢塘人。遘孫。宣和六年廷對第一。歷知建康府。高宗朝。進徽猷閣直學士。出守衢州。提舉太平興國宮。

上方山居

月斜樹影穿窗入。雨過山泉繞舍鳴。野寺中宵人不睡。蒲團布衲悟前生。
天畔羣山一草亭。半溪煙雨花冥冥。老翁投老得此景。日與溪山同醉醒。
此生真與世相忘。投老生涯寄上方。洗足關門枕書睡。連山松檜雨浪浪。
括蒼彙紀。

邵棠

業、字仲甘，號西坡，南康軍都昌人。宣和六年進士。

道經柘溪靜林寺

青山萬疊倚晴空，中有招提一逕通。老衲不關塵世事，黃花紅葉共秋風。詩林萬選。

萬松嶺老僧

佛屋三間破冷開，半通雲氣半蒼苔。行人莫問僧年紀，嶺上喬松是手栽。杭州府志。

王洋

洋，字元渤，山陽人。御史資深子。以省試第二名中宣和六年甲科。官博士。歷典三郡。晚守鄱陽。洪忠宣以使金歸，人無敢過其居。洋獨候舍坐，免去。有東牟集。

琵琶洲

塞外風煙能記否，天涯淪落自心知。眼中風物參差是，只欠江州司馬詩。

容齋三筆：吾州餘干縣東千越亭，有琵琶洲，在下。唐劉長卿張祜輩皆留題。王洋一絕句云云，真佳句也。

李長民

長民，揚州人。正民之弟。南渡寓家海鹽。

題鹿苑寺一擊軒

我聽風篁是梵音，如何俗耳等閑聞。自來擊處無人會，千古知心只此君。海鹽縣圖經。

祖秀實

秀實字去華。浦城人。弱冠釋褐第一。除國子博士。高宗朝。拜禮部郎中。

寄吳晞遠

官路聲名二十年。江鄉舊仰貳車賢。推將事業歸塵外。收得功夫到酒邊。解榻幾聞招隱士。炷香終日對
韋編。公朝況是登耆哲。早晚蒲輪穩著鞭。

萬姓統譜。吳駿字晞遠。中元豐八年進士。調潞州上黨簿。太宰張商英首加薦引。知虔化縣。通判永州。未幾告老。祖秀實以詩寄之云。

綦崇禮

崇禮字叔厚。高密人。徙北海。登上舍第。高宗朝。拜翰林學士。退居台州。有北海集。

題石梁瀑布

林麓陰森徑曲盤。漸驚危步入重巒。地分寶剎臨空翠。天設飛梁跨急湍。霜暗雲蒸山氣肅。雪翻雷輓水
聲寒。我來不作多求想。試出神光徧現看。天台勝紀。

宋詩紀事卷四十一

錢唐 厲鶚 緝

平湖 葉鑾 勘定
陸銘一

王晞韓

晞韓興化軍人。宣和六年進士。紹興間。樞密樓炤宣撫關陝。辟爲屬。改京秩。朝廷欲借兵西夏。犄角金人。差管押生蕃三百餘口歸夏國。道無疎虞。累遷大理少卿。方庭實宣諭陝西。贈以詩。晞韓和之。時秦檜方主和議。誣以他獄。欲置之死。上閱其勞。移潯州。赦歸卒。

和方廷實見贈

誰憐定遠不生還。驛騎翩翩出漢關。未宵西風回馬首。要傳飛檄過千山。
莆陽文獻。

張闌

闌字大猷。永嘉人。宣和六年進士。高宗朝。累遷宗正少卿。孝宗朝。遷工部尙書。顯謨閣學士。奉祠。

卒諡忠簡。

奉祠後作

八請犯天顏。今朝出漢關。渾如倦飛鳥。日暮傍巢還。
合璧事類後集。

王之道

之道字彥猷號相山居士無爲軍人宣和六年進士建炎中保山寨攝鄉郡尋以議和忤秦檜晚起漕湖南官樞密使有相山集

蒙城早行蒙城在應天府汴河西上入京路

殘月千家閉荒城萬木號舉頭華蓋近回睇啓明高野迴霜迎面風清冷透袍十年河上路從此步金鼇瀛奎律髓

繡溪

畫橋雕檻接招提新有幽人傍繡溪千頃波明天上下兩匳光映水東西飛樓湧殿參差見古木修篁咫尺迷此景此時君信否綠楊影裏嘯黃鸝廬州志

詹度

度宣和中資政殿學士同知燕山府

送宣撫童貫平燕班師

長途春色送英雄滿目江山暎日紅劍戟夜搖楊柳月旌旗曉拂杏花風行時一決平戎策到後須成濟世功爲報燕山諸將吏太平取在笑談中三朝北盟會編

蔡柟

柟字堅老南城人嘗爲宜春別駕宣和以前人歿于乾道庚寅曾公卷呂居仁輩皆與倡和有雲

壑隱居集浩歌集

泊釣臺

高臺百尺凌空碧。維舟夜久霜月白。瓊木窸窣搖枯藤。寒瀨潺潺落蒼石。先生退隱知幾年。漢家鍾鼎徒凌煙。高風千古磨不盡。山水照映長明鮮。我來俯仰慚羈旅。衝寒愁怕元冬暮。此身不負白鷗盟。暫此遲留亦何預。起來搔首江茫茫。孤篷卻逐雁隨陽。人生遊行豈易得。惟有此夕難相忘。釣臺集

登郡學稽古閣晚望

簷外川原迴。煙中草樹微。山城暮吹角。客子淚霑衣。歲月經身老。行藏與願違。歸禽帶落日。渺渺背人飛。

詠新荷聖老嘗謁韓子蒼令賦此詩

朱闌橋下水平池。四面無風柳自垂。疑是水仙吟意嬾。碧羅箋卷未題詩。以上西江通志

陸元光

元光字蒙老。歸安人。博學善吟詠。宣和初爲嘉興令。後改晉陵。

詠蟬

綠陰深處汝行藏。風露從來是稻粱。莫倚高枝縱繁響。也須回首顧螳螂。

庚溪詩話蒙老宰晉陵時州幕官有好譏謗同列者一日同會聞蟬蒙老卽席賦此其人聞而少戢

嘉禾八詠存二首

金魚池

池上春風動白蘋。池邊清淺見金鱗。新波已縱游魚樂。調笑江頭結網人。

五柳橋

五柳先生倦折腰。孤眠千載仰風標。青衫令尹頭如雪。不厭朝昏過此橋。至元嘉禾志。

鄭強

強、閩人。宣和中。萍鄉令。

化成巖

城郭囂塵外。江山勝概中。鏗然一灘水。和以萬松風。夾徑森奇石。危亭納大空。蒼巖不能語。曾識贊皇公。袁州府志。

程瑀

瑀字伯寓。饒州浮梁人。宣和中。太學試第一。官屯田郎中。謫監漳州鹽稅。高宗朝。累除兵部尚書。龍圖閣學士。提舉江州太平宮。卒。有飽山集。

拜程剛愨公墓

早從賓客傳青屏。晚舉絲綸對紫薇。忠憤欲先同列死。胡塵驚繞屬車飛。墓閒挂劍心猶在。帳下談經事已非。太學諸生皆白髮。汪汪老淚溼征衣。

饒州府志。公名振。字伯玉。樂平人。少入太學。徽宗幸學。以右職除官。累擢國子司業。兼太子舍人。靖康元年。以吏部侍郎尹開封。金兵至。及于難。高宗立。贈端明殿學士。賜諡剛愨。墓在樂平懷義鄉。

李芬

芬、宣和進士。

吳將軍元瑜。丹青妙當世。吳王命扁舟。下海陵。貌徐神翁像。以歸。故爲詩敘其事以贈。

秦皇寤寐茅盈語。銳意長生欲輕舉。徐福藥就仙骨成。雲海茫茫但延佇。東西日月秋復春。海變桑田更幾人。忽思重看舊寰宇。驂鸞直下江淮濱。布衣野叟不耕藝。自向琳宮操祕箒。祕語親書悟世人。一坐忽驚三十歲。淮南奉道聞真蹟。命使扁舟訪消息。畫手從來獨擅長。一見仙風心自得。歸來目斷蒼煙垠。三尺生綃醉墨翻。軸上神翁不解語。彷彿白鶴乘孤雲。海陵相望一千里。嗟我塵勞未云已。授書圯上會有期。誠心願取黃公履。宣和畫譜。

黃次山

次山、字季岑。豐城人。宣和進士。建炎中。官吏部郎中。提點湖南刑獄。有三餘集。

田家春日

緯竹梁溪面。誅茅舍道傍。臘收冰下紙。春課社前薑。露草牛羊長。風花杖屨香。人生但如此。官獨爲誰忙。
前賢小集拾遺。

趙良嗣

良嗣、本遼人。馬植因童貫來降。改姓名李良嗣。薦于朝。獻策伐遼。賜國姓。累官延康殿學士。光祿大夫。以罪奪職。靖康初。戮于柳州。

宣和四年使金作

朔風吹雪下雞山，獨暗穹廬夜色寒。聞道燕然好消息，曉來驛騎報平安。馬攢茅齋自序。

上京作

建國舊碑胡月暗，興王故地野風乾。回頭笑向王公子，騎馬隨軍上五巒。

樞史趙良嗣，粹人，來降，以能文爲裕陵眷遇，曾兼史局，令續通鑑長編，重和元年十二月，推修四朝會要，帝系后妃吉禮三類，實良嗣以參詳轉秩，後坐誅，余讀北遼遺事，見良嗣與王瓌使女真，隨軍攻遼，上京城破，有詩云：五巒乃上京殿名，保機之故也。

劉 泌

泌、宣和閒，爲昌國尉。

投洩潭龍宮

未躍天衢臥寂寥，碧潭流溢海山腰。埋藏頭角雖經歲，際會風雲在一朝。既若有心成變化，豈能無意及枯焦。神蹤許爲蒼生起，願擊香車上九霄。延祐四明志。

李處權

處權，字巽伯，洛陽人。邯鄲公淑曾孫。宣和閒，與陳叔易、朱希真以詩名。南渡後，嘗領三衢，有崧菴集。

春霽

南國春光一半歸。杏花零落淡胭脂。新晴院宇寒猶在。曉絮欺風不肯飛。以上墨莊漫錄。

小醉

小醉初醒過竹村。數家殘雪擁籬根。風前有恨梅千點。溪上無人月一痕。

次韻劉元舉子規

蜀魄悲鳴楚國春。試憑清些與招魂。柔腸欲斷雲橫嶺。幽夢初回月挂村。客舍花光隨野水。故園柳色負柴門。飽聞錦里無窮樂。早晚歸來訪子孫。

遊清涼寺

延步石城塢。迢迢去興長。野田耕晚雨。寒樹倚斜陽。載酒追狂客。論才得漫郎。無因遂高蹈。時復借山房。以上前賢小集拾遺。

贈戴彥衡

病來謾喜折斂股。老去尙懷雙脊龍。他日扁舟會乘興。摩挲圭璧小從容。

羅願新安志。新安墨以黃山名。數十年來。造者乃在婺源黃岡山。戴彥衡吳滋爲最。彥衡自紹興八年以薦作復古殿等墨。其初降雙角龍樣。是來待制元暉所畫。繼作圭璧及戲虎樣。時議欲就禁苑爲窯。稍取九里松古松爲之。彥衡以松生道旁平地不可用。其後衢池工者。載他山松往造。亦竟不成。彥衡未幾死。嘗出頁餘一斗示米公。米以爲罕有其比。詩人吳可贈詩云云。

句

東風可是閑來往。時送紅梅一陣香。

優古堂詩話。李方叔喜吳可小詩云云。殊不知張芸叟餘醞詩亦云晚風亦自知人意。時去時來管送香。

趙季西

季西、宣和閒人。

丹青閣

跨壑飛簷屋數楹。上橫山色下溪聲。等閑題作丹青閣。未必丹青畫得成。

方輿勝覽。在建寧府開元寺側。元豐初太守

石禹勤建宣和中。趙季西命名且賦詩云。

章、憲

憲字叔度。吳郡人。宣和中監漢陽酒稅。有復軒集。

吳郡志。章甫字端叔。自建之浦城。徙居于吳。崇寧初。除都官郎中。尋挂冠歸。藏書萬卷。雖校精密。年六十二卒。子八人。憲其一也。憲樂道好德。操履高潔。鄉里謂之隱君子。其學師事王信伯。而與朱子發。呂居仁等游。嘗自作復軒記。謂查先人之慮。治東廡之軒。以貯經史百氏之書。名之曰復。以警其學。其後圃又有清曠堂。詠歸清閣。退觀三亭。以慕古尚賢。皆有詩。

登齊雲樓

飛樓縹緲瞰吳邦，表裏江湖自一方。曲檻高窗雲細薄，落霞孤鶩水蒼茫。固知興廢因時有，獨覺江山共古長。回首中原正愁思，不堪殘日半規黃。

題處士顧禧漫莊

何許明人眼，松閒見古堂。泉聲到棐几，山影覆繩牀。愛酒陶元亮，聽蛙孔德璋。紛紛戰鬪觸，丘壑信難忘。

遐觀亭

吾慕陶靖節，處約而平寬。涉園自成趣，矯首復遐觀。我亦散遊目，俯仰天地閒。雲煙自舒卷，湖嶺相回環。永與形役謝，豈有俗慮干。想像斜川遊，千載乃相關。

松江謁王文孺令宰

暑退涼生過雨天，鳧飛鷺浴暮江前。秋風小浪鴨頭水，斜日輕帆燕尾船。青眼卻欣逢地主，白頭相對聳詩肩。林塘勝處開尊俎，只欠冰輪特地圓。以上吳郡志

挽著作王先生疏

伊洛流風在，丘軻道益尊。遺經啓幽眇，後學有淵源。鑽仰知由戶，衰遲阻及門。三年思晤面，一旦絕微言。西觀才黔突，題輿卻佐州。濟時卑管晏，齋志在春秋。曖曖孤雲沒，沈沈厚夜幽。升堂聞禮樂，終覺媿程仇。王著作集附

南夫宣和末以太常少卿使金。紹興中知泉州。不附和議落職。

滴水巖

滴水巖高路欲窮。佩環聲響玉玲瓏。一天星斗墮青漢。萬斛珠璣瀉碧空。滄海逕歸朝夕會。曹溪不隔本
源通。何妨凝竚龕巖下。更沐如來灌頂功。廣東通志。

許安仁

安仁字仲山襄邑人。晚以特奏名得官。調南劍州順昌尉。

許彥周詩話。李父仲山所著詭奇集。自序曰。水激之以亂石。則有聲。巖藏之以襲器。則聲齊。不下者二城。田單因而縱兵。文獨不待詭而後奇乎。

和徽宗御製宮詞

輕寒慘慘透衾羅。玉箭銅壺漏水多。常是未明供服御。夢回頻問夜如何。許彥周詩話。

夢中作

山色濃如滴。湖光平如席。風月不相識。相逢便相得。

許彥周詩話。季父病中夢至一處。泛舟環水。皆奇峯可愛。賦詩云。既寤而言之。後數日卒。

植竹吏隱堂後因題

珍重勞君慰遠遊。繁聲疎影一堂秋。主人看卽官期滿。分付風塵與子猷。

斷破中庭一畝苔。主人白髮手親栽。卽今誰信清貞節。須向三冬雪後來。能改齋漫錄。

題善山院

瓦爐栢子裊殘煙。午夢醒時一暢然。不悟功名負終老。荒山飢走又三年。延平府志。

周邦

邦海陵人。居錢唐。右文殿修撰。知廣州。種之孫。官迪功郎。江東帥幕。著政和大理入貢錄。

次陳彥育遊鍾山韻

雄壓吳頭控楚腰。千峯環拱冶城橋。黃旗紫蓋旋歸漢。古刹淒涼尙號蕭。鄒后化蟒之地。鹿苑院。士人名爲蕭帝寺。

北嶽經行匪濫巾。相陪來現隱淪身。春蘿秋桂還吾輩。白浪紅塵付若人。清波雜誌。

范周

周字無外。文正之姪孫。純古之子。負才不羈。安貧自樂。所居號范家園。

中吳紀聞。范周少負不羈之才。工于詩詞。不求聞達。所居號范家園。亭安貧樂道。未嘗屈折于人。盛季文作守時。頗嬾士。嘗于元宵作寶鼎現詞投之。極蒙嘉獎。因遺酒五百壺。其詞每遇燈夕。諸郡皆歌之。

巡夜絕句

自古輕儒孰若秦。山河社稷付他人。而今重士如周室。忍使書生作夜巡。

中吳紀聞。方臘之亂。郡中令總甲巡護。雖士流亦不免。無外率府庠諸生冠帶夜行。首用大燈籠。畫一絕于其上。郡將聞之。亟爲罷去。

題崑山絕頂

萬疊青巒厭巨崑。四垂空闊水天分。夜光寒帶三江月。春色陰連百里雲。桂子鶴鳴空半落。天香僧出定中聞。不將此境憑張益。三百年來屬老文。中吳紀聞。

木香

暖風吹麝入鉛華。不肯隨春到謝家。半夜粉寒香泣露。也應和月怨梨花。墨莊漫錄。

范公稱

公稱、文正公之後。著過庭錄。

無題

赤縣東城尉。它年業舊儒。老爲知道馬。中有報恩珠。歲月侵餘齒。風埃上短鬚。賴逢同志友。襟韻不相孤。過庭錄。

燕照鄰

照鄰、字明仲。陽翟人。隱居不仕。

絕句

女駿兒癡十口餘。進時無業退無廬。一窗風雨韓城夜。火冷燈青照舊書。過庭錄。

范仲温

仲温、字元實。祖禹之子。秦少游之壻。呂居仁之表叔。學詩于黃山谷。有潛溪詩眼。

鐵圍山叢談。仲溫嘗預貴人家會。有侍兒喜歌秦少游長短句。坐中略不顧。及酒酣。慳洽。侍兒始問此郎何人。仲溫遽起。叉手而對曰。某乃山抹微雲女婿也。聞者爲之絕倒。

句

夷甫雌黃須倚閣。君卿唇舌要施行。紫微詩話。

陸宰

宰字元鈞。佃子。官朝請大夫。直祕閣。贈少師。

施宿會稽志。紹興十三年。始建祕書省于臨安天井巷之東。詔求遺書于天下。首命紹興府錄直祕閣陸宰家書來上。凡萬三千卷有奇。

句

奴愛才如蕭穎士。婢知詩似鄭康成。

陸游劍南集云。先少師宣和初。有贈晁公以道詩云云。晁公大愛賞。今逸全篇。偶讀晁公文集。泣而足之。士不逢時。勇退耕。閉門自號景迂生。遠聞佳士。輒心許。老見異書。猶眼明。奴愛才如蕭穎士。婢知詩似鄭康成。早孤遇事偏多感。欲續殘章涕已傾。

崔子方

江上逢晁適道

渺渺連江雨。微微到面風。主人留一餉。佳士得相逢。會面嗟何晚。論詩許有功。君家好兄弟。更覺此心同。

宋文鑑

田、巨

巨字元逸。陽翟人。與陳叔易、崔德符、善、建炎中。以察官召卒。

江梅

千林含凍鬱蒼蒼。只有江梅獨自芳。暗吐幽香穿別院。半敲斜影入寒塘。冰膚宛是姑仙女。粉面端疑騎省郎。若是蜜奴曾拂掠。肯收紅豔貯蜂房。

瀛奎律髓元觀梅詩三首。前二首云。趁暖不隨千卉折。凌寒先伴六花開。臨流照影爲誰好。映竹無人空自憐。皆佳。惟用索笑事不叶。故不錄。

飛鳶

旋旋晴空作鵝盤。仰空誰不羨高閑。豈知盡日勞心眼。只在塵寰腐鼠閒。

瀛奎律髓此蓋譏相國寺前資察僧而作。其爲人可知也。

王晉卿圖瀛山筆畫精緻。京師貴遊蓄之。爲希代之寶。自圖書棄擲于路。陽翟張飛卿見而得之。過九江。以遺友人傅延之。延之出以示余。余悲而賦詩。

他日緘縻屬貴遊。詎知遷徙過南州。天涯與汝共淪落。淚溼江煙雨。秋清河書畫坊。

張茂宗

茂宗、徽宗朝知潭州。

留題衡嶽觀

靈嶽峯前遊古觀。此中何別藥珠宮。五雲仙客形皆異。十洞煙花景不同。鍊藥爐香金石氣。醮星壇冷薜蘿風。因聞大道修真訣。咫尺三清路可通。南岳總勝集

李先輔

先輔、廬陵人。

題朱陵洞水簾

一片挂蒼崖。分明不惹埃。蹙成珠顆白。垂下水簾來。野燕飛難入。山風卷不開。聲聲去朝海。無意戀巖隈。南岳總勝集

蘇庠

庠字養直。澧州人。伯固之子。初以病目自號眚翁。後徙居丹陽。之後湖。更號後湖病民。紹興閒。居廬山。與徐俯同召不起。卒年八十餘。有後湖集。

鶴林玉露。紹興閒。養直與徐師川同召。師川赴。養直辭。師川造朝。便道過養直。留飲甚歡。二公平日對奕。徐高于蘇。是日養直拈一子笑視師川曰。今日須還老夫下。此一著。師川有媿色。

清江曲

屬玉雙飛水滿塘。菰蒲深處浴鴛鴦。白蘋滿櫂歸來晚。秋著蘆花兩岸霜。扁舟繫岸依林樾。蕭蕭兩鬢吹華髮。萬事不理醉復醒。長占煙波弄明月。

茗溪漁隱叢話東坡云此篇若
置在太白集中誰復疑其非也

後清江曲

層波渺渺山蒼蒼，輕霜墮木蓮葉黃。呼兒極浦下笎笮，社壘欲熟浮蛆香。輕帆漸濳鳴秋雨，日暮乘流自相語。一笛秋風萬事休，白鳥翩翩落煙渚。茗溪漁隱叢話

賦王文孺臞菴

王郎臞菴摩詰詩，煙花遠舍江邊籬。石渠東觀了無夢，筆牀茶竈行相期。古人已往不可作，甫里顧有今天隨。東鄰蟹舍肯著我，請辦簞笠懸牛衣。

中吳紀聞吳江王份字文孺自號臞菴嘗築園于松江之側買樹作址計三百萬錢圍成極東南之勝蘇庠詩云

前題

笛弄松江明月，蓑披笠澤歸雲。若道青霄快活，五侯何處如君。

浮天閣

玉蟾飛入水晶宮，萬頃琉璃碎晚風。詩就雲歸不知處，斷山零落有無中。秋落空江動碧虛，黃蘆洲渚雁飛初。我來欲訪鴟夷子，爲挂西風十幅蒲。

平遠堂

柳外西風六幅蒲。野塘睡鴨對春鉏。如何喚得王摩詰。畫作江南煙雨圖。

吳郡志。臞菴在松江之濱。邑人王份有超俗趣。營此以居。圍江湖以入園。故多柳塘花嶼。景物秀野。名聞四方。一時名勝喜遊之。皆爲題詩。園中有與閑平遠種德及山堂四堂。烟雨觀橫秋閣。凌風臺。鬱峨城釣雪灘。琉璃沼。臞翁澗。竹廳。龜巢雲關。顯林楓林等處。而浮天閣爲第一。總謂之臞菴。份字文孺。以特恩補官。嘗爲大冶令。歸休老焉。

送子經歸臨安

牛背行將老。鷗沙盟已寒。蓴鱸付張翰。書札報任安。古學飽胸次。驚瀾翻筆端。西湖十頃月。留取醉時看。

宿飛來峯下

吳中未歷佳山水。湖上懷思去惘然。雲去雲歸兩峯寺。鷗飛鷗沒夕陽天。客愁官渡落花雨。歸夢下湖春水船。想得對牀成夜話。何須隴月向人圓。以上咸淳臨安志。

題張公洞

銅官之南山復山。捫蘿絕壁苔蘚斑。只今何處可容足。乞我石房雲一間。毘陵志。

德友近在咫尺。乃不相過。因成一詩。

十日已吹梅信風。絕憐未許一尊同。喜君不減習主簿。媿我殊非龐德公。

德友求舊菊花栽。戲作小詩代簡。

問訊雲蘿小隱家。剡藤醉墨半欹斜。酒餘落筆已殊絕。發興不須舊菊花。

鐵網珊瑚。紹興中。建安徐謝跋云。蘇公隱丹徒。五召不起。周君德友。主縣簿。願從之遊。文書往來。委曲如瓊。求之古人。未易一二也。

題塘埵山風漪軒

竹陰既疎明。流泉復清駛。佳響聞山泉。涼風澹然至。幽人此安禪。閱世一遊戲。何必周八垠。是中有能事。至湖上。

沙晚水痕碧。蕭蕭蒲葦秋。鴻飛遵遠渚。木落見滄洲。藤杖吟還倚。風帘行可休。有懷誰共語。暝色起林丘。
以上鎮江府志。

張彥智

句

兩岸更無通步路。四時常有避風船。

咸淳毘陵志。蔡三舍在宜興縣西。洧洧。四圍皆澤國。宣和間。張寶文彥智遇風寄宿。贈以詩。有句云云。和者盈卷。

薛然

答賈支使寄鶴

瑞羽奇姿踉蹌形。稱爲仙馭過蒼冥。何年厚祿曾居衛。幾世前身本姓丁。幸有遠雲兼遠水。莫臨華表與華亭。勞君贈我清歌侶。將去田園夜坐聽。
合璧事類集。

楊軒

牡丹

楊妃歌舞態。西子巧譏魂。利劍斬不斷。餘妖鍾此根。光華日已盛。闌檻豈長存。寄語尋芳者。須知松桂尊。
合璧事類別集

鄭鋼

鋼宣和中承議郎

題資州東巖

逕轉得幽谷。雲巖屹相向。啗訝偃重簷。彎環依疊嶂。緬想融結初。鑄鑱自天匠。了無斧鑿跡。但覺盤根壯。深可數千尺。廣逾八九丈。洞穴既窈窕。松門亦昭曠。廓含三千界。中列五百像。巨楠布幢蓋。翠蔓垂帷帳。木靈不知名。境幽或難狀。我時馳征輶。奔走倦塵鞅。獲此一段奇。欣然愜微尚。欲去興未闌。行行重回望。
名勝志

宋詩紀事卷四十二

錢唐厲鶚輯

錢唐許松勘定

陳序

序字彥育。句容人。從蘇庠學詩。受知于浙漕向伯恭。邀與同行。妻以愛姬。姬寇萊公元孫也。伯恭聞于朝。授和州文學。終刪定官。有碧巖集。

遊鍾山題八功德水菴壁

寒騎瘦馬度山腰。目斷清溪第一橋。盡是帝王陵墓處。野風荒草暝蕭蕭。
十年塵土暗衣巾。亂走江鄉一病身。西第將軍成底事。北朝開府是何人。清波雜誌。

方千里

千里官舒州簽判。

題真源宮

萬歲丹霞府。千函藁笈書。時時瞻絳節。往往下雲車。近與剛風接。高連上帝居。登前望南岳。清蹕滿空虛。
宋藝圃集。

錢惟岳

曹娥碑

曹娥廟貌樹豐碑。千古行人誦色絲。苦恨當年題八字。不旌賢孝只旌辭。方輿勝覽。

胡致隆

致隆字藏之。臨江人。自號蕭灘居士。父彥明。與山谷進士同年。故藏之以詩。取知于山谷。無子。遺藁不傳。

題吳生畫桃源圖

王宰十日畫一石。左思十年賦三都。誰似今時吳道子。咄嗟能辦武陵圖。武陵不與人閒隔。可憐舊日無尋覓。蒼蒼煙水只依然。試倩漁舟問消息。聲畫集。

題瘞鶴銘

當年誰爲裹元黃。潮打孤城草木荒。華表竟無新信息。斷碑空有碎文章。雲埋紫蓋峯何在。煙鎖青田路正長。遙想華亭披道氅。夜隨明月過錢唐。蘆浦筆記。

星子樓

葛巾藤杖竹籬籬。靜夜江樓縱目初。海獸擎山出彭蠡。玉龍銜水下匡廬。三更雲盡猿啼露。十里月寒人捕魚。已問湖山借圭角。他年來此老樵漁。方輿勝覽。

山谷坐上分題賦藕

平生冰雪姿。七星羅心胸。豈無有絲毫。上裨天子聰。而不自見達。胡爲乎泥中。沈疴正無賴。安得君從容。

其子亦可憐。風味如乃翁。合璧事類別集。

喜曹劉二從事見過

蕭蕭細雨鎖柴門。喜見風流二使君。俊逸萬春猶錄事。清新子建尙參軍。飄零世路詩千首。寥落江湖酒一尊。多病楊雄謝來往。暮年誰更可論文。詩林萬選。

羅從彥

從彥字仲素。南劍州羅源人。從龜山遊。以累舉恩授惠州博羅縣主簿。紹興初卒。學者稱豫章先生。淳祐閒諡文質。有集。

題一鉢菴

可憐萱草信無憂。誰謂幽蘭解結愁。欲得寸田荆棘斷。祇應長伴赤松遊。豫章集。

熊蕃

蕃字叔茂。建陽人。宗王安石之學。長于吟詠。嘗作茶錄。

登金山

注海銀成壑。浮空玉作堆。鼇翻三島出。鷺駕一峯來。塔影波搖動。鐘聲潮拍回。猶嗟禪伯老。虛入妙高臺。金山志略。

何麒

麒張丞相商英外孫。

外大父丞相初登科爲雒縣主簿經攝埧窰鎮稅官留詩護國寺中令狐監征錄以見寄謹再拜追和而記其後

傳翁遺墨臘咨嗟四海當年尙一家大老不爲今日用小詩徒遣後人誇興來思跨巴滇馬歸去方乘下澤車燕麥兔葵僧舍裏何如夢得訪桃花成都文類

虎丘

平地涌巖壑。樓層驚大雄。何曾遠人世。眞欲傍天宮。白虎威靈在。赤烏緣影空。生公能說法。音與塔鈴同。吳郡志

龍多山

世路聲牙赤水過。故升天險問龍多。書中舊識唐公昉。圖裏又聞馮蓋羅。

方輿勝覽在合州赤水縣北按唐孫職方樵龍多山錄有至道觀東有大池卽唐武后時放生池中峯有唐鷲臺院東有佛慧院有萬竹竹徑圍尺有東廡廣五十丈多唐人刻字又有靈山院泉自巖出潄爲方池大旱不竭其山高明窈深變態萬狀有駕鶴軒下視涪水如帶烟雲出沒山之偉觀也圖經云廣漢人馮蓋羅煉丹于此晉永嘉三年舉家十七人仙去何麒麟詩云云

董瞿老

黃彥與從無逸求妻埋銘以硯謝之無逸邀予作歌

君不見昌黎翁南遷益覺文章工滑稽戲作毛穎傳陶泓之族稱弘農又不見東坡翁生涯寄食破硯中

詆訶龍尾尊鳳味。更誇丹石蒸赤紅。古來文士耽翰墨。十有八九坐此窮。怪君落筆妙言語。四壁才堪蔽風雨。幾年結柳送奴星。文窮跳梁推不去。硯能窮人君不鄙。爾來諛墓得龍尾。緹巾什襲不安觀。碑字三縑何足擬。玉堂視草乃稱之。只恐元文似揚子。君誇此硯文似羅。奈君鹿裘帶索何。我雖忍窮亦好事。尙能搜句爲君歌。嗚呼魯公乞米家。食粥不費銀鉤寫珠玉。前賢小集拾遺。

杜東之

雲安玉虛觀南軒感事偶書

古觀久荒涼。寂然外人境。草木旣榛蕪。風雨亦頽隕。我來一糞除。地淨窗爲回。晨光散桐陰。夕照落柏影。置以六尺牀。度此三伏永。終朝饜清涼。半夜或凄冷。客至共浮瓜。睡餘獨煮茗。遙聞斗筲兒。爭奪沸蛙黽。街頭米十千。旱井費糜綆。對我脫粟盤。徐餐休祝鯁。

穉梧值歲首。擢起青琅玕。其葉大如掌。其陰勻若攤。弱幹尋丈展。氣已雲霄干。期之四五載。定足容棲鸞。我老無定居。僦屋蝸螺跽。平生輞川宅。面勢胸中盤。何當遂誅茅。規庭十步寬。非無松柏堅。未易蒼龍搏。種此南窗下。醉眠風雨寒。

至自雲安題淨戒院

山口出雲鳩。喚雨三月巴。山蒸溽暑。濁流來作虎眼文。一葉孤舟命如縷。道傍綠樹清陰涼。中有金仙古道場。去家纔餘二百里。且復看此青篋簞。出門滿目傷羈旅。歸舍還煎碎兒女。欲問閨黎借榻眠。臥對龕燈淡無語。麥芒焦。桑椹紫。田家夫婦忙欲死。蠶入蔴。麥登場。夫婦飽煖孰可當。道傍書生空有婦。不蠶而

衣真汝負功名富貴老不來。書劍風塵一生誤。何時即買百株桑。身耕婦織策最良。董生莫厭徵租吏。蘇子無由黑貂弊。

雲安下巖

濤江翻雪卷湖灘。晚泊巖屏暫解顏。夙有淨緣逢寺喜。老無生理伴僧閑。殘雲已斷獨飛雨。落日將沈卻照山。半夜秋聲驚客夢。一簾珠貝冷珊瑚。以上全蜀藝文志。

李 祁

祁字蕭遠。尚書郎。謫監漢陽酒稅。

郎官湖春日

兩山收雨暗平沙。遮斷溪梅隔水花。留得煙林作圖畫。依稀松磴有人家。空山玉蕊照瓊瑰。到處尋花共往回。欲識春風最奇處。試來同看雨中梅。朦朧花影月黃昏。著意春風入酒痕。知是江梅喜佳客。倒垂花蕊照清樽。十日春陰到水亭。水邊楊柳一時青。梅花過盡桃花惡。乞取山礬入淨瓶。能改齋漫錄。

張師中

楓橋寺

吳門多精藍。此寺名尤古。距城七里餘。冠蓋日亭午。古逕通采香。遠岫對棲虎。巖扉橫野橋。塔影落前浦。靈樓鳴曉鐘。夕舸帆雙櫓。方丈中有人。學佛洞禪語。跡忙心已閑。道樂行彌苦。不爲喧所遷。意以靜爲主。

何必深山林，峯巒繞軒戶。吳郡志。

徐忻

西清詩話：徐忻作詩，有唐人風氣。嘗和雪詩云：著衣輕有暈，入水淡無痕。

劍池

劍去池空一水寒，遊人到此凭闌干。年來是事消磨盡，只有青山好靜看。西清詩話。

周李

李、字德紹，海陵人。燁之季父。

悅川碾茶

獨抱遺經舌本乾，笑呼赤脚碾龍團。但知兩腋清風起，未識捧甌春筍寒。清波雜誌。

晁載之

載之，字伯宇，仕封丘丞，有封丘集。

晁公武郡齋讀書志：世父封丘君黃魯直薦于蘇子瞻云：晁伯宇謹厚守文，從遊多長者，願一語教戒之。子瞻答云：晁伯宇詩騷細看甚奇麗，信乎其家多異材也。

感時事作

森森月裏栽丹桂，歷歷天邊種白榆。雖未乘槎上霄漢，會須沈網取珊瑚。

曲清齋聞政和以後花石綱
漫盛晁伯宇有詩人多傳誦

昭靈夫人祠

殺翁分我一杯羹。龍種由來事杳冥。安用生兒作劉季。暮年無骨葬昭靈。能改齋漫錄

劉旦

旦，敞之孫。樞密奉世之子。

句

膺門昔忝登龍客。董墓今悲下馬人。

能改齋漫錄劉仲馮樞密之子旦能詩傳
康伯嘗薦之旦後過公墓賦詩人多稱傳

祖德恭

德恭，字肅之。無擇弟。提刑無頗之子。宣政閒。待普州太守闕。寓居安陸。

致政張安卿承事挽詩

重歎張夫子。神襟遠弗寧。摧山傾嶽算。萎哲奄椿齡。舊室惟圖像。新阡但刻銘。何堪聽歌挽。埋玉在幽垌。

祖龍學集附

翟望

望汴京人。大父光圖爲安定靖王教授。望年二十喜讀騷經。寓詞衛杜閒。每水邊沙外。屬思幽放。人莫測其意。

寄言

洞簫吹兮春煙綠。風光粲兮人如玉。寥木蘭兮溯流波。懷彼美兮憂心若何。曹助松隱文集。

李愆

愆字去言。公擇尙書猶子。

春晚

花瘦煙羸可奈何。不關渠事鳥聲和。無人掃地驚□□。分付輕紅上碧莎。墨莊漫錄。

句

去國春城桃李花。楓林葉病尙天涯。今年九日風前帽。北客扁舟雨後沙。蒼黃避地小兒女。漂泊連牀

老弟兄。紫微詩話。

晁貫之

貫之字季一。曰瑄。按朱弁風月堂詩話。稱爲晁季一。檢討。又云。晁察院季一。蓋其歷官也。

春渚紀聞。晁季一。一生無他嗜。獨見墨丸。喜動眉。字其所製銘曰。晁季一。寄寂堂造者。不減潘陳。

句

草堂不見杜陵老，折得青松度水歸。訪杜師輿不遇。紫微詩話。

晁謙之

謙之字恭道，居信州。紹興閒，以敷文閣直學士知建康。

南巖

南巖夫何爲，山作天倚蓋。山南谿山複，飛頂壓其外。當空橫廣額，架屋喉舌內。嘗聆釋氏說，仰覆各世界。千閒未可著，五畝良不隘。清冷氣射人，熱惱從此潰。崖奔木疎瘦，谷遠鳥幽怪。榻子與二子，高興偶相戒。松舟下清江，毛髮數蝦蟹。籃輿上峻嶺，幢節望杉檜。李侯勳門胄，文彩山作繪。趙君儒林孫，嫵美蘭結佩。不爲城府遊，繼此日于邁。寧知老逾拙，意在精力退。得居溪南山，食飲與山對。夔魍入奧突，雲雨出紳檜。顧此誠未逢，欣然與心會。彭湖兩崖蹙，泉作一線霈。禪月古臺空，靈境自明晦。平生所驅使，詩酒俱好在。天涯得吾侶，物外從所快。便欲登赤城，一觀天宇大。廣信府志。

章 綽

綽字伯成，欒之子。終戶部郎中，權知揚州。

句

船尾淮山青未了，馬頭隋柳綠相迎。送龔校書。中吳紀聞。

范季隨

季隨學詩于韓子蒼，有陵陽室中語。

南源寺

嬾逐兒曹載酒行。搗來蕭寺作清明。江湖萬里此身健。風雨一春今日晴。露地野花雙戲蝶。並湖煙樹獨啼鶯。挂冠神武何時見。只合深藏諱姓名。撫州府志

呂知止

知止本中從叔。

絕句

彭澤有琴嘗無弦。大令舊物惟青氈。我亦四壁對默坐。中有一牀供晝眠。

初涼

西風吹木葉。庭戶作涼時。夜有愁人歎。寒先病骨知。以上紫微詩話。

許彥國

彥國字表民。青社人。有詩集。

周邦彥云。寬平優游。中極物情。惜乎
流落不偶。故世人知之者或寡也。

紫騮馬

黃金絡頭玉爲觮。蜀錦障泥亂雲葉。花閒顧影驕不行。萬里龍駒空汗血。露牀秋粟飽不食。青芻苜宿無顏色。君不見東郊瘦馬百戰場。天寒日暮烏啄瘡。

秋雨歎日鑿按此詩宋藝圃集作許顛

霖雨不出動隔旬。門外秋草長于人。江湖浩渺欲無岸。錦石最小猶生雲。微陽片月何曾見。只有莓苔昏筆硯。田家禾穗未暇悲。茅屋且爲螢火飛。以上宋文鑑。

虞美人草行

鴻門玉斗紛如雪。十萬降兵夜流血。咸陽宮殿三月紅。霸業已隨煙燼滅。剛強必死仁義王。陰陵失道非天亡。英雄本學萬人敵。何須屑屑悲紅妝。三軍敗盡旌旗倒。玉帳佳人坐中老。香魂夜逐劍光飛。清血化爲原上草。芳心寂寞寄寒枝。舊曲聞來似斂眉。哀怨徘徊愁不語。恰如初聽楚歌時。滔滔逝水流今古。楚漢興亡兩丘土。當年遺事總成空。慷慨尊前爲誰舞。

若溪漁隱叢話冷齋以此詩爲曾子宣夫人魏氏作。余昔隨侍先君守合肥。嘗借得許表民家集。中有此詩。又合肥老儒郭全美乃表民席下舊諸生。云親見渠作此詩。今曾端伯編詩選亦列于表民詩中。覽者可以無疑。亦知冷齋之妄也。

采蓮吟

湖邊日落鴛鴦飛。羅衣香轉蘭舟移。蓮根斷處手滿絲。手滿絲不能理。秋雲深隔君子。

臨高臺

高臺跨崇岡。簷宇鎖空霧。新晴洗雙目。千里在跬步。霏霏漁浦煙。冉冉富春樹。風花不我私。何以理愁緒。誰疏白玉窗。中有浮雲度。浮雲吹不開。不見行人去。以上前賢小集拾遺。

漁父

榮辱從來總不知。幾閒茅屋對漁磯。江鷗散處夜無伴。荷葉老時秋有衣。

後村千家詩。

晚宿江漲橋

鳥徑青山外。人家苦竹邊。江城懸夜鎖。魚市散空船。岸靜涵秋月。林昏宿水煙。又尋僧榻臥。夜冷欲無眠。

咸淳臨安志。

葉大年

挽王學正偉

書劍當年遊上都。賢關蟲篆校諸儒。文華燦燦九苞鳳。俊氣駸駸千里駒。妙質競誰揮墨壘。白頭空此死樵蘇。遺編殘藁應猶在。搔首令人益歎吁。

遺文膾炙在吾鄉。賦罷誰能少薦揚。聲迹有妻先夢虺。行藏無子付泠方。雲蘿煙蔓新泉宅。秋月春花舊野堂。交倡彩牋眞翰墨。幾人知爲寶巾箱。

中吳紀聞。王偉字康國。居太學有聲。鄉人謂之王學正。識與不識皆尊敬之。有堂名逸野。以累試不利。日遊適其中。讀書自娛。其持身治家。鄉中率以爲法。生平無子。王氏舉族祀之不絕。葉大年挽之云云。

李遠

遠字器之

僕久客錢唐。有吹笛月下者。同旅聞之。凄然皆有歸思。屬令賦之。

柯亭之椽不復得。蘄州黃竹今尙存。蒼崖翠壁產修幹。千頃蕭索煙雲昏。羌人眼力發天巧。長笛裁成鳳

膺飽老龍餘響出空星。欲噴炎天作秋曉。西湖夜寂涼風生。山頭一鉤新月明。商聲悽悲羽聲壯。行子忽忽難爲情。時無綠珠清音激皓齒。野王臨風三弄亦已矣。唯有愁端無古今。舉刀不斷東流水。深閨蘭燈照空牀。笛聲不如離恨長。曲終人散一惆悵。回首江山非故鄉。萬事浮雲過寥廓。且醉杯中琥珀薄。君不見玉管橫吹黃鶴樓。江城五月梅花落。前賢小集拾遺。

陳君嚮

絕句

無形今古垂楊岸。客舍不禁風絮亂。佗年若解拂人頭。只恐青青顏色換。

陶朱新錄。君嚮少年

在京悅一小巖作。

李若水

若水本名若冰。欽宗賜名若水。字清卿。曲周人。靖康初。以上舍登第。由太學博士歷吏部侍郎。京師陷。從欽宗幸金營。不屈死之。建炎初。贈觀文殿學士。諡忠愍。有集。

靖康小雅。靖康之難。死節之士。公爲第一。弔之詩曰。烈烈李公。實備全德。義動幽冥。氣貫金石。扈蹕虜營。爰定忠烈。杞人之憂。廢立大厄。公挺不顧。二酋面叱。勇甚雷霆。天地動色。命輕鴻毛。名高斗極。燎原之火。不變藍瑩。滔天之禍。砥柱獨立。死得其所。

震耀
方冊

奉使太原途中呈王坦翁副使

舊持漢節媿前人，消息傳來苦不真。
五鼓促回千里夢，一官妨盡百年身。
關山吐月程程遠，詩界含秋句句新。
孤館可能忘客恨，脫巾聊進一杯春。
三朝北盟會編

衣襟中詩

胡馬南來久不歸，山河殘破一身微。
功名誤我等雲過，歲月和雪飛。
每事恐貽千古笑，此心甘與衆人違。
艱難唯有君親重，血淚斑斑染客衣。
能改齋漫錄

化成巖

翠石黏雲溼，寒巖帶蘚深。
樹函懷古意，水印讀書心。
經濟神猶在，幽棲逕可尋。
青甃吾舊物，稅駕臥山陰。
江西通志

句

東風無迹秀芳草，野鳥不言銜落花。
一庭鳥跡天書怪，八尺簾紋人字寒。
蜚聲千里暮，雁影一天秋。
合璧事類後集

毛寶

寶字文友，靖康元年以朝請大夫延康殿學士知杭州。

冷泉亭詩并序

昔人以爲冷泉未極其妙，因加小亭，然泠然水光，滃然山翠，以故去者過半，子以謂不必加功，但去其

尤賢者斯善也。如明鏡而加績畫，非不美好，所以爲清明者逝矣。拂拭舊翳，舊觀復還。

面山取勢俯山中，亭外安亭自蔽蒙。眼界已通無礙物，胸中陡覺有真空。試尋櫓響驚時變，洞中事。卻聽

猿啼與舊同。白猿事。萬事須臾成壞裏，我來閱世一初終。咸淳臨安志。

富直柔

直柔，字季申，弼之孫。以父任補官。靖康初，賜進士出身。高宗朝，累除同知樞密院事，提舉洞霄宮。

題萬象亭并序

燕堂後本登覽勝處，窘于短垣叢薄中。未見識拔觀文葉公，政成之暇，命鑿垣策臺，建亭其上，遂爲一府面勢殊特之觀。落成有日，謹賦拙詩，少見欣快之意。

堂後山川面面通，向來奇觀竄蒿蓬。元戎小試經綸手，萬象都歸指顧中。雨罷卷簾憑爽氣，酒酣極目送飛鴻。明年鳳閣鸞臺上，好寄新詩下北風。淳熙三山志。

鄧肅

肅，字志宏，沙縣人。欽宗朝，召對，補承務郎。張邦昌僭位，奔赴南京，擢左正言，罷歸家居。紹興三年，卒。有栢欄集。

花石詩

蔽江載石巧玲瓏，雨過嶙峋萬玉峯。鱸尾相銜貢天子，坐移蓬島到深宮。浮花浪蘂自朱白，月窟鬼方更奇絕。繽紛萬里來如雲，上林玉砌酣春色。

皇帝之圃浩無涯。日月所照同一家。北連幽薊南交趾。東極蟠木西流沙。
安得守令體宸衷。不復區區踵前蹤。但爲君王安百姓。圃中無日不春風。
耕欄集。

宋史本傳。肅少入太學。時東南貢花石綱。作詩十一章。言守令
搜求擾民用事者見之。屏出學。欽宗嗣位。召對便殿。補承務郎。

寄朱韋齋

歸帽納毫真得策。要牋留帶計還疎。公如買菜苦求益。我已忘腰何用渠。
閉戶羽衣聊自適。推窗柿葉對人書。帝都聲價君知否。寄付新傳折檻朱。

陸文裕溪山餘話。韋齋鶴客。耕欄以冠帶寓之。醉起。韋齋曰。留以質紙筆。明日如約。韋齋受
筆還冠。而以紙少留帶曰。儻無千幅。終不還。故耕欄爲寄此詩。前輩風流調笑。譎譎如此。

會如驥

如驥、秦和人。爲寶慶通判。死金兵之難。建炎改元。贈敷文閣待制。諡忠愍。

題考功印紙

謹將節義二字。結果印紙一宗。了卻神遊何處。澄江明月清風。

豫章詩話。金兵薄寶慶。通判秦和會公如驥遣弟如駿歸曰。吾旣以身許國。不得顧先人宗祀矣。汝其圖之。涕泣與別。復取考
功印紙題其上云云。澄江指秦和故鄉也。事亟矣。書舍生取義一章于壁。以明己志。城將陷。左右請迎降。公吐之。登子城。投資
江死。郡人義而斂厝之。明年建
炎改元。太學生上書敘其功。

何迂叟

迂叟字次仲黃州人

遊赤壁和答韓子蒼

兒時宗伯寄吾州，諷誦高文至白頭。
二賦人閒真吐鳳，五年溪上不驚鷗。
蟹嘗見水人猶怒，鶴有危巢孰敢留。
珍重使君尋故跡，西風悵望卞城樓。

能改齋漫錄：東坡謫居于黃五年，赤壁巨鶴棲于喬木之上，後賦所謂攀栖鶴之危巢，俯馮夷之幽宮，是已。韓子蒼靖康中守黃州，三月而罷，因遊赤壁而鶴已去，作詩示何次仲迂叟，次仲和答。

王以寧

以寧字周士，湘潭人。由太學生仕，鼎澧帥幕。靖康初，徵天下兵，以寧走鼎州，乞師解太原圍，建炎中，以宣撫司參謀制置襄鄧，有詞一卷。

道中聞九里香卽木犀花，湖南呼九里香。

不見江梅三百日，聲斷紫簫愁夢長。
何許綠羈紅轍客，御風來獻返魂香。
墨莊漫錄。

人情千里白頭浪，世事幾番黃葉風。
和人。茗溪漁隱叢話。

熊彥詩

彥詩字叔雅，安仁人。靖康中，太學博士。

三朝北盟會編。自帝蒙塵。虜人館于齋宮。日遣齋慶須。索城中物。校書郎劉才邵。傅宿。國子監主簿葉將。博士熊彥詩。上官悟等五人。押經書印板并館中圖籍。往營中交割。

屏山夜雪和劉彥沖潭溪四景之一

夜深寒妥帖。前村人斷絕。何許小茅茨。開門滿山雪。翰墨大全

司馬朴

朴字文季。溫公之姪孫。以外祖范純仁恩補官。欽宗時。爲兵部侍郎。以奉使見留。金人挾以北去。居于祁陽。授以官。不可。竟握節而死。高宗贈兵部尙書。諡忠潔。

無餘居士齋壁有沈傅師遊道林岳麓詩石刻。穆仲等和之。因亦次韻。

湘西勝景豈易論。羣山騰闢萬里奔。鶴泉一麓鶩鵬嚼。松風十里藏祇園。當時侍御偶題寫。筆力孰敢爭榮尊。東京少年妙詞藻。南陽舊族齊陰樊。天心月脇出奇語。使我展讀忘朝昏。差差戈劒隱一敵。落落旗鼓嚴千屯。無餘居士勵幽志。細研六藝方專門。凍軒嬌兒惜腸蕝。啼飢瘦婦餘淚痕。唯君德義允相愜。每窮道妙角與根。他人勸酒逐驚魂。二子頻酌勤空樽。醉中詩成渺江海。風外帆影徒飛翻。卷藏篋笥何哉。風生襟褰何軒軒。嗟乎我亦有餘腐。陋哉羊政囚華元。中州集

句

積雪日出杲。雪飛梅已殘。朋遊要及時。閣鄰有遐觀。乘此蕪穢平。快覽天宇寬。霽色混銀界。曠望連江干。山如白毫相。滉溢清揚端。一氣轉浩渺。萬里皆瀾漫。優哉賦梁苑。想像排廣寒。

中州集文季工書翰有晉人筆意興陵萬機之暇嘗購其遺墨學之有雪霽同韓公度登圓福寺閣和李效之詩今略載于此云云此下不可讀當俟善本考之

季炳

炳號寄菴

弔危翁一

南鄉老人危翁一歲晏雨晴扶杖出驚聞二帝塵再蒙歸闔柴門哭三日眼空愁絕聲遂止里人唁翁翁死矣凜然生氣申包胥萬古千秋葬忠義

邵武府志危翁一光澤人家貧業樵聞二帝

北狩哭三日骨立而死季寄菴以詩弔之

余淳禮

淳禮靖康丙午海康令

題遺直軒

二蘇翰墨仙同謫百蠻裏時有田舍翁結茅住行李邇來三十年聞名輒掩耳天定能勝人稍復蒙料理公卿尋斷編臺隸藏敝屣敗屋亦見修變故乃如此開軒畫遺像凜凜有生氣卻恨封德彝不見盛時死兄弟對牀眠此意孤一世騎鯨儻相逢笑人真好事

廣東通志海康城南吳國鑑館蘇子由之所時子瞻亦謫儋耳同

處月餘靖康丙午令余淳禮買地開軒給二公像于中且賦詩

顏博文

博文字持約。德州人。靖官初。官著作佐郎。金人立僞楚。時充事務官。草勸進表。南渡初。竄澧州。移賀州死。

清河畫舫。顏持約晚有鄭虔之貶。作山水橫看頗有清致。在五羊賣畫自活。竟死瘴鄉。

末利花

竹梢脫青錦。榕葉隨黃雲。嶺頭暑正煩。見此萼綠君。欲言嬌不吐。藏意久未分。最憐月初上。濃香夢中聞。蕭然六曲屏。西施帶微醺。叢深珊瑚帳。枝轉翡翠羣。譬如追風騎。一抹萬馬羣。銅瓶汲清泚。聊復爲子勸。願言少須臾。對此髯參軍。

墨莊漫錄。末利。嶺外人或云抹麗。謂能掩衆花也。顏持約謫官嶺表時作詩云云。

題李叔班山水橫卷

青山爲誰高。影壓三百里。竹深已迷橋。荷密半藏水。區區名利人。坐瞑真可鄙。慨想雲屋中。恐是古君子。通江石泉滑。崩崖朝雪重。牧兒心苦飢。牛寒挽不動。誰人倚長松。胸有九雲夢。西風吹屋動。一笑無與共。

後村詩話。

王希深合和新香。煙氣清灑。不類尋常。可以爲道人開筆端消息。

玉水沈沈影。銅爐裊裊煙。爲思丹鳳髓。不愛老龍涎。卓帽眞閑客。黃衣小病仙。定知雲屋下。繡被有人眠。
香乘。

宋齊愈

齊愈字文淵。靖康初。官諫議大夫。建炎初。以推舉僞楚論死。

絕句

向來松檜喜無恙。坐久復聞南澗鐘。隱隱修廊人語絕。四山滴瀝雪鳴風。

宮詞

禁城春水碧溶溶。洗出桃花萬片紅。葉上細看無一字。始知無女怨春風。

睢陽道中

竹溪晴絕雨纔通。無數深紅閒淺紅。山店落英春寂寂。青旗吹盡柳花風。
以上能改齋漫錄。

張澂

澂字達明。舒州人。靖康初。官監察御史。建炎南渡。至尙書右丞。寓居臨川。有澹巖集。

源潭

露漿依灘急。霜颿入髮清。秋痕到晴樹。江勢擁孤城。野鶴疑仙羽。檣烏伴水程。故園千嶂外。白首不勝情。

撫州府志。

仰山

蕭寺藏幽谷，谿流燕尾分。松蘿諸澗合，鐘鼓上方聞。寶塔開晴日，龍潭隔暮雲。躋攀窮勝境，發鶴似爲羣。
袁州府志

賀允中

允中字子忱，靖康中爲郎中，紹興中拜參知政事。

李伯紀丞相挽詩

已矣經邦業，茫然造物心。人生固有定，天意頗難諶。此日嗟亡鑑，當年用作霖。吾皇方願治，十事想遺箴。
梁溪集附

李儻

儻，汴京留守，靖康閒陷于金。

挽張忠文公叔夜

命世文章伯，鴻樞柱二臣。殞身因衛社，嗣德豈無人。丹旄西原路，輜車萬里春。一門蒙待遇，徒有淚沾巾。

雲麓漫抄：張忠文公叔夜，稽仲靖康閒，以南道總管知鄧州，首提兵勤王，以不推戴異姓，取過軍前，既議和，傳到訃音云：靖康丙午閏十一月內，提兵次安上門，除簽書樞密院，在國子監街東陶潛園子內住。十二月二十五日，京城破，以不推戴異姓，取過軍前。丁未年三月二十七日，離京北去，道中不食，至白溝，或曰過界河也。仰天大呼，遂不復語。明日薨在易州孤山寨。五月十六日也。擡三程，遂火化。第六子仲熊，字慈甫，隨行祭祀。丁巳年十一月十八日，到東京相國寺慧林禪院，後于天壽院前，葬于陽士馮直家下。戊午年十月十七日，葬于陽翟縣旌忠功德墳寺，及錄到挽詩四首。

上官仲恭

句

君不見喬木參天獨樂園。至今猶是溫公宅。

朱子語類。蔡京父子在京城之西南坊。對賜甲第四區。極天下土木之工。一曰太師第。乃京之自居也。二曰樞密第。乃攸之居也。三曰駙馬第。乃攸之居也。攸妻劉。乃明達明節之族。有寵而二劉不能容。乃出嫁攸。權寵之盛。亞之京攸。四第對開。金碧相照。嘗見上官仲恭詩一編。其間有城西曲。言蔡氏侈奢敗亡之事。最爲豪健。末句云云。仲恭乃上官彥衡之子也。惜其詩不行于世。

呂渭老

渭老字聖求。嘉興人。宣靖間朝士。

有感

塵斷征車杳。雲低毳帳深。古今那有此。天地亦何心。橋李詩繫。

宋詩紀事卷四十三

錢唐 厲鶚 輯

錢唐 汪啓淑 勘定

朱弁

弁字少章。徽州婺源人。建炎初。授修武郎。借吉州團練使。副王倫使金通問。被拘。凡十九年。紹興十三年。始與洪皓。張邵。南歸。易宣教郎。直祕閣。主管佑神觀。卒。有聘遊集。輶軒唱和集。曲洧舊聞。風月堂詩話行世。

宋史本傳。弁留金。王倫先歸。以弁奉送。徽宗大行之。文爲獻。其辭有曰。歎馬角之未生。魂消雪窖。攀龍髯而莫逮。淚灑冰天。帝讀之感泣。

北人以松皮爲菜。予初不知味。虞侍郎分餉一小把。因飯素。授廚人與園蔬雜進。珍美可喜。因作一詩。

吾老似出家。晚悟媿根鈍。滋旨卻羶葷。禪悅要親近。偉哉十八公。茲道亦精進。舍身充刀几。割體絕嗔恨。鱗皴老龍皮。鳴齒溢芳潤。流膏爲伏龜。千歲未須問。便堪奴筍蕨。詎肯友芝菌。跣跣得一飽。萬事皆可擯。侍郎文懿後。落落衆推俊。澹然世味薄。內典得所信。香廚留淨供。頻食不言頓。宴然默不語。草木雷音震。得法於此公。骨髓傳心印。應憐持節人。餉此爲問訊。欲將無上味。爲我洗塵釜。食之不敢餘。感激在方寸。

予以年事漸高氣海不能熟生暖冷旅中又無藥物遂用火攻之策灼艾凡二百壯吟呻之際得詩二十韻

不作漳濱臥年侵氣血衰據鞍思少壯攬鏡歎清羸有病方求艾無營莫問蓍心知出下策理勝遇中醫陽燧神逾速銅仙術盡施論功鄙炮製取穴辨毫釐火帝恩光異炎官績用奇書螢比差似珠蟻迫方知忖物嗟炮斃觀形笑灼龜煙微初炙手氣烈漸鑽皮閉目書徒展支頭枕屢移發狂還自哂賈勇僅能支宋鷁追風日吳牛喘月時忠言勞緩頰善諫爲開眉服氣工夫遠燒丹歲月遲衛生防後患伐性釋前疑展轉那成夢呻吟且當詩因心念民瘼出位歎身卑欲已七年病當從百世師保身將保國未可廢箴規元夕有感

朔雪餘千里東風徧九州關河中土異燈火上元愁綠蟻嘗新釀青貂戀故裘紫姑無問卜世事正悠悠炕寢三十韻

風土南北殊習尚非一躡出疆雖仗節入國暫同俗淹留歲再殘朔雲滿崖谷禦冬貂裘敝一炕且跽伏西山石爲薪黝色驚射日方熾絕可邇將盡還自續飛飛湧元雲燄燄積紅玉稍疑雷出地又似風薄木誰容鼠棲冰信是龍銜燭陽曦助喘息未害搖空腹惠氣生袴襦仍工展拳足豈惟脫膚鱗兼復平體粟負暄那用詫執熱定思沃收功在歲寒較德比時燠雖餘炙手焰寧有爛額酷矧當凝沍晨炎帝獨回轂元冥真退聽祝融端可錄嗟予亦何者萬里歌黃鵠偃仰對窗扉妍暖謝衾褥壯懷羞竈媚晚悟笑突曲因思墮指人暴露苦皸瘃頻年未解甲蹈此鋒刃毒遙知革輅中盱食安豆粥陪臣將命來意懇誠亦篤

有奇不能吐。何術止南牧。君心想更切。臣罪何由贖。此身雖自溫。此志轉煩促。論武貴止戈。天必從人欲。安得四海春。永作蒼生福。聊擬少陵翁。秋風賦茅屋。

客懷

兵氣常時見。客懷何日開。形骸病自瘦。鬢髮老相催。已負秦庭哭。終期漢節回。風雷識我意。一雨洗氛埃。

白髮

白髮使車前。煙波思渺然。霜清穫稻日。風急授衣天。客館但愁坐。釣舟誰醉眠。乘槎會有便。真到斗牛邊。

劉善長出示李伯時畫馬圖

俯首舉尾拳一蹄。掣韁欲嗅驕不嘶。奚官聳肩兩足垂。意貌自與造父齊。雞目麟鬣鳳凰臆。玉山禾遠未容食。籟雲追電有餘地。置之畫圖人豈識。精神權奇孰可班。當在白兔青龍閒。君知此馬從何來。龍眠胸中十二閑。

謝崔致君餉天花

三年北饌飽羶葷。佳蔬頗憶南州味。地菜方爲九夏珍。天花忽從五臺至。崔侯胸中散千卷。金甌名相傳雲裔。愛山亦如謝康樂。得此攜歸豈容易。應憐使館久寂寥。分餉明明見深意。堆盤初見瑤草瘦。鳴齒稍覺瓊枝脆。樹雞溼爛慚叩門。桑蛾青黃漫趨市。赤城菌子立萬釘。今日因君不知貴。乖龍耳僅免一割。沙門業已通三世。偃戈息民未有術。雖復加飧祇增媿。雲山此去縱不遠。口腹何容更相累。報君此詩永爲好。捧腹一笑萬事置。

送春

風煙節物眼中稀。三月人猶戀褚衣。結就客愁雲片段。喚回鄉夢雨霏微。小桃山下花初見。弱柳沙頭絮未飛。把酒送春無別語。羨君纔到便成歸。

攄抱

客滯殊方久。山圍絕塞深。秋風入橫笛。夜月傍霑襟。造膝他時語。捐軀此日心。飛霜滿明鏡。髮短不勝簪。李任道編錄濟陽公文章。與僕鄙製。合爲一集。且以雲館二星名之。僕何人也。乃使與公抗衡。獨不慮公是非者。紛紜於異日乎。因作詩題於集後。俾知吾心者不吾過也。庚申六月丙辰。江東朱弁上絕域山川飽所經。客蓬歲晚任飄零。詞源未得窺三峽。使節何容比二星。蘿蔦施松慙弱質。蒹葭倚玉怪殊形。齊名李杜吾安敢。千載公言有汗青。濟陽公謂宇文叔通。叔通受官而少章以死自守。恥用叔通見比。故此詩以不敢齊名自託。至於書年爲庚申。與稱江東朱弁者。蓋亦有深意云。以上中州集。

句

平生所愛會莫倦。天遣花王慰吾願。姚黃三月開洛陽。曾觀一尺春風面。謝范祖平朝散惠姚花。曲洧舊聞。

陳東

東字少陽。鎮江丹陽人。以貢入太學。欽宗時。率其徒伏闕上書。論蔡京王黼等誤國姦狀。又上書請留李綱。高宗卽位。召至行在。上書乞罷黃潛善。汪伯彥。會布衣歐陽澈亦上書言事。潛善遽以語激怒高宗。與澈同死于市。越三年。高宗感悟。贈東承事郎。紹興四年。加朝奉郎。祕閣修撰。有盡

忠錄。

戴埴鼠璞靖康中孫觀論太學生陳東誘衆伏闕爲亂建炎中黃潛善輩寘東極刑觀潛善不足道也張魏公亦奏胡瑗筆削東書欲使布衣挾進退大臣之權幾至召亂遂以譏諍狂生規搖國是將理追勒編置或謂魏公乃潛善客理則李綱客也因借此去之公爲一代人物宗主亦復有此失高宗特以靖康之闕爲懼不欲伏闕卻不以言罪人他日贈東官祭東墓瞻其家而官其後以生前布衣爲身後法從于東亦無憾嘗曰朕卽位聽用非人至今痛恨之贈官推恩未足稱朕悔過之意死者不可復生追痛無已聖心惻怛如此予深爲魏公惜之

與虞章舜卿二表弟季明游兼勝亭有作

野曠湖山遠林深松竹幽舊題看壁立前事逐萍浮荏苒荒三逕依稀度九秋故人應念我雅會莫遲留

與士繇遊金山翌日分袂

早別金山恰曉鐘離帆分破一江風瓜洲渡口波聲遠後夜相思明月中以上盡忠錄

句

飛廉囚下鄴都獄急使飛雪作水流潺潺東方出日還照耀坐令和氣生人寰大雪在太學作梅磧詩話

歐陽澈

澈字德明撫州崇仁人建炎初徒步走行在伏闕上書請誅汪黃等與陳東俱死于市紹興中贈祕閣修撰有飄然先生集

秋試下第有感

離菊金英歎異香。杜門岑寂獨持觴。風掀脫葉橫斜舞。雲襯平林淺淡黃。塞管有情增哽咽。野花無緒伴淒涼。不禁景物撩秋眼。剩與新篇付錦囊。

重游寥陽洞有感

尋眞曾到寥陽殿。小立廊腰花影轉。飛瓊仙子下瑤臺。綽約雲鬢眼波剪。水沈煙斷一簾秋。醉睡海棠紅玉軟。武陵歸去探年華。揚州夢覺江波遠。重來風物恰依然。愛日融融素煙卷。洞門寂歷鎖長春。異木槎枒插天半。霞衣冉冉媚東風。綠瑣窗前重識面。酒酣春筍理琵琶。曲終依約含幽怨。人間名利幾時休。馬蹏不駐空留戀。桃花流水古猶今。回首碧雲人不見。

戲促朝宗酒約

雨收雲海湧金盆。簾卷香絲破篆紋。雙陸無心酬白璧。十千有約醉紅裙。哦詩誤許聯師服。載酒眞當過子雲。待遣秋娘呈妙舞。春衫已把水沈熏。

臨溪弱柳

柳弄嬌黃暖律催。臨溪約略笑殘梅。鴨頭春水回環綠。龜甲屏山掩映開。媚日依依籠霧閣。搖風裊裊拂煙桅。柔絲恨不同攀折。獨立江臯首重回。

曉發吳城山

風掃陽侯雪陣平。雨催摩詰畫圖成。氣吞浦溆重林盡。秋著江湖去鳥明。厚祿故人無一字。長年三老伴

餘生會須滿意開懷抱。到眼廬山不世情。以上飄然先生集。

曲端

端字平甫。一字師尹。鎮戎軍人。建炎初。累官威武大將軍。涇州防禦使。爲張浚所忌。誣以反。下恭州獄。糊其口。燬之以火。乾渴求飲。予以酒。九竅流血死。

三朝北盟會編。張浚既失全陝。退保蜀中。復欲用曲端。王庶曰。不可。富平之戰。宣撫與曲端有勝負之約。今日宣撫以何面目見端。吳玠亦懼端之嚴明。乃書曲端謀反四字於手心。浚雖有殺端之意。而未有罪。庶等曰。曲端作詩題柱。有指斥乘輿之意。曰。不向關中興事業。卻來江上泛漁舟。此其罪也。浚乃送端萬州羈管。復令恭州取勸。康隨先在鳳翔。遭端決背一百。浚以康隨爲提點刑獄公事。端聞之曰。吾其死也。呼天者數聲。端有馬名鐵象。日馳四百里。惜之過於子息。連呼鐵象。可惜者又數聲。既死不旬日。鐵象亦斃。

蜀中作

破碎江山不足論。何時重到渭南村。一聲長嘯東風裏。多少未歸人斷魂。寶退錄。

鶴林玉露。曲端在陝西。甚有威望。張魏公宣撫擢用之。金人萬戶婁室與撒離曷等寇邠州。端擊敗之。至白店原。又大敗之。撒離曷乘高望師懼而號哭。金人因目之爲啼哭耶君。後以端恃功驕恣。廢不用。又懼其得士心。竟殺之。自端之死。衆心稍離。金人再戰于富平。我師詐張端旗以懼敵。婁室知端已死。撫掌笑曰。何給我也。于是盡銳力攻。我師敗績。自是陝西非我有矣。宋淳熙間。高廟配享。洪景盧舉此爲魏公罪。迄不得侑食。昔孔明斬馬謖已爲失計。魏公襲其事。幾于自壞。萬里長城。至于詐張。

端旗大爲拙謀，徒足以召敵人之笑。沮我師之氣，且端亦知書。嘗作詩云：破碎山河不足論，幾時重到渭南村。昔人詩欲挂衣冠，神武門先尋水竹渭南村。卽此事也。

岳飛

飛字鵬舉，相州湯陰人。宣和閒，應真定宣撫，募累立戰功。南渡，歷少保、河南、北諸路招討使，進樞密副使，封武昌郡開國公，罷爲萬壽觀使，爲秦檜所陷，殞大理寺獄。淳熙六年，賜諡武穆。嘉定四年，追封鄂王。淳祐六年，改諡忠武。有集。

題鄱陽龍居寺

巍石山前寺，林泉勝境幽。紫金諸佛相，白雪老僧頭。潭水寒生月，松風夜帶秋。我來屬龍語，爲雨濟民憂。

池州翠微亭

經年塵土滿征衣，特特尋芳上翠微。好水好山看不足，馬蹄催趁月明歸。以上岳武穆王集。

題青泥市寺壁

雄氣堂堂貫斗牛，誓將真節報君讎。斬除頑惡還車駕，不問登壇萬戶侯。

寶鑑錄：紹興癸丑，岳武穆提兵平虔吉羣盜，道出新淦，題詩青泥市蕭寺壁。開淳熙閒，林令梓欲摹刻于石，會罷去不果。今寺廢壁亡矣。其孫類家集，惜未有告之者。

秀都華嚴院

手持竹杖訪黃龍，舊穴空遺虎子蹤。雲鎖斷崖無覓處，半山松竹撼秋風。贛州府志。

題池州翠光亭

愛此倚欄干。誰同寓目閑。輕陰弄晴日。秀色隱空山。鳥樹蕭騷外。征帆杳靄間。予雖江上老。心羨白雲關。
清河書畫舫。

毛國英

國英、衢州人。

投岳侯

鐵鎖沈沈截碧江。風旗獵獵駐危橋。禹門縱使高千尺。放過蛟龍也不妨。

娛書堂詩話。毛國英。澤民之從子也。以詩自鳴。嘗經岳侯駐兵之地。江禁方嚴。國英投詩云云。侯曰。詩人也。委舟以渡之。

李易

易字順之。江都人。建炎二年。高宗駐蹕維揚。策進士為第一。授簽書江陰軍判官。紹興元年。為太常博士。轉工部員外郎。為太常少卿。遷中書舍人。改直祕閣。知揚州。官至敷文閣待制。提舉江州太平觀。卒于秀州。

貴門卜築

亂後亦擇居。筮山山輒許。居民百餘家。喜甚手欲舞。云久聞公名。此幸殆天與。感茲鄭重意。時節共雞黍。剡川非沃野。地僻民更窶。趁時務擷茗。餘力工擣楮。寡婦念遺秉。汚池憐數罟。我欲教耦耕。盡力循南畝。

桃杏種連山，深居可長處。東鄰有節士，酒酣乃發語。公昔起布衣，高誼掩前古。親擢類平津，決見逢真主。兩宮佇六飛，萬乘思一舉。交侵正倔強，蠱起益旁午。浩然公獨歸，偶出寧有補。默塞復何言，長歎汗如雨。

剡溪幽居

勝絕剡溪邊，巢枝度半年。燕回衙落絮，魚涌接飛泉。丹鼎山頭氣，茶爐竹外煙。幽居已成趣，佳致若爲傳。
以上刻錄。

竹西懷古

淮南昔繁麗，富庶天下稱。管弦十萬戶，夜夜聞喧騰。不徒竹西寺，歌吹相豪矜。一朝烽火急，塵市爲溝塍。風月無歡場，睥睨皆射棚。荒荒野月白，照地如寒冰。自從畫江守，歲歲輸金縢。蕭條閭井閒，水旱又頻仍。我來經故里，日暮此一登。隋唐倏已往，遺跡幾廢興。江山極蒼莽，望之涕沾膺。
揚州府志。

俞處俊

處俊，字師郝，新淦人。登建炎龍飛乙科，未及仕而卒。

傷春

黏天芳草綠蒙茸，久客傷心望不窮。山色自隨人遠近，鶯聲只在水西東。

搜春

千林欲暗稻秧雨，三月尙寒花信風。九節老筇應不惜，步隨流水看殘紅。
以上合璧事類前集。

句

叫月子規喉舌冷，宿花蝴蝶夢魂香。獨醒雜誌。

胡銓

銓字邦衡，廬陵人。建炎二年進士甲科。紹興五年，以賢良方正薦，除樞密院編修官。抗疏詆和議，累謫吉陽軍。孝宗朝，歷權中書舍人，兼國子祭酒，權兵部侍郎，以資政殿學士致仕。卒，謚忠簡。有澹菴集。

鶴林玉露：胡澹菴十年貶海外，比歸飲於湘潭胡氏園，題詩云：君恩許歸此一醉，傍有梨頰生微渦，謂侍妓黎倩也。後朱文公見之，題絕句云：十年浮海一身輕，歸對梨渦卻有情。世上無知人欲險，幾人到此誤平生。

瀛奎律髓：紹興十八年，新州編管人胡銓移吉陽軍編管。先是廣東經略使王鈇問知新州張棣曰：胡銓何故未過海？銓嘗賦詞云：欲駕巾車歸去，有豺狼當轍，棣奏銓倡和毀謗，而有是命。棣選使臣游崇，部封送小項洞過海。銓徒步赴貶，人皆憐之。至雷州，守臣王邕捕游崇私茗械治厚餉銓，邕後亦得罪。

雷州和朱彥秀才詩時欲渡海。

何人著眼覩征驂，賴有新詩作指南。螺髻層層明晚照，蜃樓隱隱倚晴嵐。仲連蹈海徒虛語，魯叟乘桴亦謾談。爭似澹菴乘興往，銀山千疊酒微酣。澹菴集

到瓊州和李參政

落網從前一念斜，崖州前定復何嗟。萬山行盡逢黎母，雙井渾疑似若邪。行止非人十年夢，廢興有命一

浮家此行所得誠多矣。更願從今泛北槎。

貶朱崖行臨高道中買愁村古未有對馬上口占。

北往長思聞喜縣。南來怕入買愁村。區區萬里天涯路。野草荒煙正斷魂。以上方輿勝覽。

題自畫瀟湘夜雨圖

一片瀟湘落筆端。騷人千古帶愁看。不堪秋著楓林港。雨闊煙深夜釣寒。梅堯詩話

題畫扇

誰向生綃白團扇。畫將羈客據征鞍。南遷萬里知前定。壁上崖州莫怕看。

陳郁話腴。胡澹菴於福州僉廳分扇。得一扇畫古木閒。

一人騎驢向西南行。及有新興之行。方知爲先兆也。

登南恩望海臺

君恩寬逐客。萬里聽歸來。未上凌煙閣。先登望海臺。山爲翠浪涌。湖拓碧天開。目斷飛雲處。終身愧老萊。

豫章詩話。時孝宗登極起。

爲祕書少監。將歸朝作。

句

盈尺子魚來丙穴。一餅女酒敵新興。

夷堅志，胡邦衡獲罪，來福州，黃思憲致子魚紅酒爲餽。
胡報以詩，以子對女，丙對新，爲工，新興酒闔人重之。

陳宗古

宗古，字述之，候官人。建炎二年進士，終朝奉郎。

遊大滌山

洞天三十六，奇邃此無儔。笙鶴有時下，神仙何處遊。
巖花自照水，谷鳥不啼秋。盡日松陰底，閑聽寒澗流。

洞霄詩集

鄧柞

柞，字成林，沙縣人。建炎二年進士，累官知隆興府、江西安撫使，有焦桐集。

題白蓮院

古樹紛紛千嶂雨，遠寺鳴鐘迷處所。一水東流浮落花，隔雲應有秦人住。
海風不斷長松路，萬籟寒生蒼玉塵。此去江南山更深，
枕榔葉暗猿啼苦。南安縣志

陳剛中

剛中，字彥柔，閩清人。祥道從子。建炎二年進士，紹興閒任太府丞，應詔上封事，
胡銓貶韶州，剛中作啓事賀之，忤秦檜，謫定遠縣卒。

陽關詞

客舍休悲柳色新。東西南北一般春。若知四海皆兄弟，何處相逢非故人。北窗炙輿。

石材廟題柱

疏爵新剛應。論功舊石材。能形文母夢。還訝佞人來。海市爲誰出。衡雲豈自開。乞靈如見告。逐客幾時回。

鶴林玉露。寺丞南行時。吉州江濱有石材廟。隆祐太后避金兵。泊舟廟下。夢神告以兵至。卽發舟。指章貢金兵追至。造口不及而還。寺丞題詩廟柱云云。卒不如願。悲夫。

飛來峯

寒峯插天出。玲瓏萬菡萏。微風起松際。怪石勢搖撼。上有百尺松。幽花綴紅糝。野猿忽躍去。滴下露千點。回首冷泉亭。天鏡光潏潏。游姬脩眉青。嬌童兩鬢髮。平生山水癖。如人嗜昌歠。對此一壺酒。玉色翻醉臉。路逢老祝髮。絳袍金光閃。茲山信自佳。恨爲緇塵染。置之且復醉。天竺鼓統統。咸淳臨安志。

阮閱

閱字閱休。舒城人。宣和中。知郴州。建炎初。知袁州。有詩話總龜。松菊集。

郴江百詠并序 存六首

郴古桂陽郡。陳迹故事。盡載圖史。亦閒見于名人才士歌詠。如杜子美寄聶令入郴州。韓退之郴江柳子厚登北樓。沈佺期望仙山。戴叔倫過郴州之類是也。山川寺觀之勝。城郭臺榭之壯。未經品題者尙多。亦可惜爾。余官于郴三年。常欲補其闕。愧無大筆雅思可爲。然因暇日時。強作一二小詩。遂積至於百篇。雖不敢比迹前輩。使未嘗到湖湘者觀之。亦可知郴在荆楚。自是一佳郡也。宣和甲辰二月中和。

日舒城阮閱序

東樓

危城雉堞對東山。誰翬高樓十二欄。獨鶴不來松已老。春風動處日三竿。

山陰堂

脩竹蒼蒼似剡川。浮觴可繼永和年。不知誰有羲之筆。欲寫蘭亭第二篇。

碧虛亭

筇竹枝彎屐齒搖。登臨身覺在煙霄。千峯險似三川峽。一水深如八月潮。

湖亭

城外高堂俯碧灣。山如螺黛水如環。有時鼓棹來尋勝。直到斜陽未欲還。

蘇仙觀

寂寂星壇長綠苔。井邊橘老又重栽。城頭依舊東樓在。未見當時鶴再來。

東山

藜杖芒屨過水東。紅裙寂寞酒尊空。郡人見我應相笑。不似山公與謝公。以上郴州文志。

宣風道上

馬蹄西去夕陽催。濃淡寒山翠作堆。北鴈無情怕秋熱。帶將寒信過江來。

題春波亭

數葉荷衣一短蓑。春波亭上倚斜暉。無人會得詩中畫。凭盡闌干又獨歸。以上袁州府志。

胡嶧

嶧、嶧。字仲達。崑山人。建炎初。任安遠尉。有如村橐。

遊慧聚寺

政欲相攜紫翠閒。不堪風雨徑催還。何時更上月華閣。細認仙山是假山。玉峯詩集。

黃大輿

大輿。字載萬。南渡初蜀人。號岷山耜耕。嘗輯梅苑。

華亭山房象山

客游厭城市。僧房見巖壑。偉石羅衆峯。寒砂結層嶠。爲谷旣窈窕。置嶺復緜邈。溪源互相注。花草紛已錯。空聞先王夢。徒觀楚臣作。行雲在俛仰。北渚應酬酢。天機契如幻。意匠起冥漠。周流屬多豫。寤寐欣所託。有懷山中人。從爾芳杜若。成都文類。

王銍

銍。字性之。汝陰人。自稱汝陰老民。南渡寓居剡中。建炎初。爲樞密院編修官。有雪溪集。

追和周昉琴阮美人圖

龍眠李亮工家藏周昉畫美人琴阮圖。兼有宮禁富貴氣象。旁有竹馬小兒欲折檻前柳者。亮工官長沙。而黃魯直謫宜州。過見之。嘆愛彌日。大書一詩於黃素上。曰。周昉富貴女。衣飾新舊兼。髻重髮根急。

薄妝無意添琴阮。相與娛聽弦不觀手。敷腴竹馬郎。跨馬要折柳。此畫後歸禁中。胡馬驚塵。流落何許。而詩亦世不傳。獨僕舊見之。位置猶可想像也。病中追和其詩。當令善工試圖之耳。

丹青有神藝。周郎獨能兼。圖畫絕世人。真態不可添。卻憐如畫者。相與落誰手。想像猶可言。兩重春籠柳。

雪後渡西溪

雪後孤村一段煙。晴光遠照玉山川。酒旗隔步招閑客。獨上西溪渡口船。

上方

松閒清月佛前鐙。菴在孤峯更上層。犬吠一聲秋意靜。敲門知有夜歸僧。以上雪溪集。

王文孺臞菴

全家高隱白雲關。事不縈懷夢亦閑。欸乃交撐漁市散。隔江城郭是人間。

山村

家依溪口破殘村。身伴渡頭零落雲。更向空山拾黃葉。姓名那有世人聞。墨莊漫錄。

雲門寺

青山春又到。白髮策烏藤。已是他鄉客。還同寄住僧。瘦松黏凍雪。流水帶寒冰。更覺蒼崖路。雲深不可登。越詠。

周 芑

芑字秀實。錢唐人。邦彥弟邦式之子。南渡初。廬陵倅。

贈劉美中尙書

劉郎校書天祿閣。太白下觀光照灼。心知漢祀厄中天。夜半瞻星涕零落。

獨醒雜志。宣和中。太白見甚高。尙書劉公才邵時在中祕。見而歎曰。是兵象也。國家其有外患乎。因與僚友同觀。憂形于色。未幾虜犯畿甸。後周芑秀實來倅廬陵。贈詩云。

鄭 昺

昺字彥明。南渡初人。

題閣立本十八學士圖

閣公十八學士圖。當時妙筆分鐫銖。惜哉名姓不題別。但可以意推形模。十二匹馬一匹驢。五士無馬應直廬。五鞍施絨乃禁從。長孫房杜王魏徒。一人醉起小史扶。一人欠伸若挽弧。一人觀鵝憑闌立。一人運筆無乃虞。樹下樂工鳴瑟筚。八士環列按四隅。笑談散漫若飲徹。盤盃勺一物無。坐中題筆清而攢。似是率更閑論書。其中一著道士服。又一道士倚枯株。三人傍樹各相語。一人繫帶行徐徐。後有一人豐而鬚。獨吟芭蕉立踟躕。一時登瀛客若是。正觀治效真不誣。書林我昔曾曳裾。三局腕脫幾百儒。雄文大筆亦何有。餐錢但日糜公廚。邦家治亂一無補。正論出口遭非辜。時危玉石一焚埽。覽畫思古爲嗟吁。

獨醒雜志。予嘗得登瀛圖本。規模布置。氣象曠雅。每思創始者必非俗筆。又有石本。皆書名氏。後有李丞相伯紀贊跋。乃欽廟在東宮得閣立本此畫。親爲題識。以賜詹事李詩。二本絕不同。嘗見鄭昺所賦長句云云。考其所序列意。鄭必爲畫本賦之。然

長孫王魏元不在其中。不知鄭詩何爲及之耶。按翰林盛事記。開元中。張燕公等十八人

爲集賢學士於東都含象亭。圖寫其貌。意二本必居其一。而後人皆以爲正觀學士耳。

李宏

宏字彥恢。宣州人。宣和初。以左丞直郎署涇縣。建炎中。呂好問知宣州。得士四人。詹友端、周紫芝、王相如、與宏也。紹興初。李光爲守。復檄署縣。累遷轉運使。

遊金泉觀

昔時謝女昇天處。此日遺蹤尙宛然。蟬蛻舊衣留石室。龍飛勝地涌金泉。碑書故事封蒼蘚。殿寫眞容鎖翠煙。薄暮松巔聽鶴唳。凌空髣髴是神仙。四川總志。

許顥

顥字彥周。建炎中。襄邑人。有詩話。

夢中作

閑花亂草春春有。秋鴻社燕年年歸。青天露下麥苗溼。古道月寒人迹稀。

彥周詩話。宣和己亥。僕在洪州。宿城北鄭和叔家。夜夢行大路中。寒沙沒足。其傍皆田。苗丘隴。一婦人卓衣素裳。行田間。曰。此中無沙。易行。僕從之。不能登。婦人援僕手登焉。月明如晝。彌望皆野田。麥苗。婦人求詩。僕藉草坐。有矮瓢壺。一上有紙筆。僕題詩四句云。拍筆瓢上。有聲驚覺。宛然記憶。是歲大病後。亦無他故。

秋雨

零雨不出動隔旬。門前秋草長于人。江湖浩渺欲無岸。錦石最小猶生雲。微陽片月何曾見。只有莓苔昏

筆硯田家黍穗未暇悲。茅屋且爲螢火飛。宋藝圃集

秦湛

湛字處度少游子。

句

大勝商山老同居一木奴。

詩說雋永秦處度爲韓偓冒作枝葉詩建炎
間在會稽先得兩句以語偓未知成篇不

蔡向

建炎中承議郎提舉兩浙常平事。

題隱真宮

福地流傳號隱真。麻姑曾款蔡翁門。白春雲子自堪飽。井溢丹泉便可吞。山露五峯疑指爪。溪盤百疊想
裙痕。我來旣躡靈蹤後。知是仙家第幾孫。赤城志

聞人偲

偲天台寧海尉。

淨因院建炎兵火獨存紀事

湖海浮家二十年。重來春色尙依然。杏花籬落歎紅霧。楊柳林塘護綠煙。草暖邦人出遊地。鳩鳴刺史勸

耕天覺場獨在三災外。試問支郎第幾禪。至元嘉禾志。

張瓊

瓊官舒州守。

雨中自萬壽宮歸

草草登臨未擬回。煙昏雨溼賦歸哉。山寒未放遷鶯出。地勝先聞駕鶴來。老去春光都是夢。嬾邊心事總如灰。歸尋藥裏扶筋力。準擬東風得屢陪。安慶府志。

顏岐

岐字夷仲。復子。建炎中累官至門下侍郎。

句

念昔從學日。同升夫子堂。

萬姓統譜。顏夷仲嘗從滎陽呂公學。呂居仁爲濟陰主簿。時夷仲適在曹南。贈居仁詩云。夫子蓋謂滎陽公也。居仁罷官歸。作詩留別夷仲云。昔日同升夫子堂。如今俱是鬢蒼浪。蓋用其語也。

李方敬

秋蜨

粉蜨爾何知。秋深尙戲飛。憐渠迷節物。猶若弄春暉。露葉今非昔。霜叢疇可依。籬邊菊無幾。薄命寄餘菲。
合璧事類別集。

陳石齋

葵花 俗名一丈紅。

恐是牡丹重換紫。又疑芍藥再翻紅。嬌饒不辨桑間女。蔽芾深迷苧下翁。合璧事類別集。

徐月溪

麗春花

照眼裝新就。扶頭酒半醒。妖姿隨變化。薄命易飄零。合璧事類別集。

唐觀

南郊仗迴

傳警千門寂。南郊綵仗迴。但驚龍再見。誰識日雙開。德澤施雲雨。恩光變燼灰。閱兵貔虎振。聽樂鳳凰來。合璧事類外集。

陳貫道

貫道字致一閩人。

題嚴陵釣臺

足加帝腹似癡頑。詎寫折腰求好官。明主莫將臣子待。故人只作友朋看。

庚溪詩話云。

白出新意。

程宿

送葉善卷致仕歸吳

衛尉新除蓋次公，便拋簪紱向江東。秋鱸正與蓴絲美，夜鶴休驚蕙帳空。滿腹詩書元未試，會心林壑許誰同。自憐華髮無歸處，慚媿冥冥物外鴻。吳郡志。

唐 耜

耜南渡初人。

題巫山神女廟

楚澤隱巫山，翠壁開鴻濛。萬流束長峽，怒浪日簸舂。朝暉澹高唐，岳阿闕彤宮。罽毼散煙霧，榮光繞長虹。恭聞雲華君，少陰體沖融。受道紫清闕，飛化凌三空。徜徉江海上，千騎馳蒼龍。羽節回天津，央央弭層峯。悽惻下土人，昏墊無所容。寶書授神禹，百靈倏奔從。蛟螭委鞭策，山川奠西東。九州免爲魚，遂成萬世功。嗟余晚聞道，蓬心蔽倥侗。維舟垂崖邊，再拜望遺蹤。嶙峋山頭石，雲衣尙溶溶。縹緲玉瑛臺，如在指顧中。童律不可問，至言誰擊蒙。仰首天壇下，松柏悲回風。名勝志。

令狐慶譽

慶譽南渡初人。

題雲安下岳

地遠塵寰絕點埃，懸崖屈曲寄層臺。山頭玉溜隨檐滴，岳下金容就石開。寺影不妨流水過，松香長逐好

風來徧游未盡無窮景。爲報舟人且莫催。名勝志。

宋詩紀事卷四十四

錢唐厲鶚輯

江都陸鍾輝
吳江王藻
勘定

何遠

遠字子遠號韓青老農浦城人去非之子東都遺老入南渡尚存著春渚紀聞

章序臣得銅雀硯屬余作詩

阿瞞示姦雄挾漢令天下惜時無英豪磔裂異肩踝終令盜坏土埏作三臺瓦雖云當塗高曾有食槽馬
人愚瓦何罪淪墊翳梧欖錫花封雨苔鴛彩晦雲罅當時丹油法銅雀瓦用鉛丹雜胡桃油搗治火之取其雨過即乾
實非謀諸野因之好奇士探琢助揮寫歸參端歛材堅澤未渠亞章侯捐百金訪獲從吾詫興亡何足
論徒足增忿罵但嗟瓦礫微亦以材用捨徒令瓴甃餘當擅瓊塊價士思德不備不憂老田舍春渚紀聞

何遠

遠字子薦遠從兄寓居餘杭與友張圖南伯鵬俱早世遠集二人遺句名南金錄

不使翠分旁牖去卻緣清甚畏人知賦藏筠軒春渚紀聞

張圖南

圖南字伯鵬餘杭人

句

坐中競病分明久。驢上推敲兀未裁。

春渚紀聞圖南督予分韻詩未就有詩云云用事精穩如老作者惜乎天不少假之年以觀其所止也

鄭魁

賦林叔睿端硯

仙翁種玉芝。耕得紫玻璃。磨出海鯨血。鑿成天馬蹄。潤應通月窟。洗合就雲溪。常恐魍魎奪。山行亦自攜。

春渚紀聞永嘉林叔睿所藏端石馬蹄樣深紫色厚寸許面徑七八寸下鄭魁銘詩隸字甚奇末句所寄旨哉

莊綽

綽字季裕清源人官鄂州守有雞肋編

程致道云季裕著本草蒙求三卷甚工軒渠錄莊季裕年未甚老而體極羸瘠洪析仲本呼為細腰宮院子

建炎三年七月寓長洲白馬澗張氏舍題壁

昔年隨牒作邊侯。愁望長安向戍樓。今日衰顏來澤國。又看烽火照長洲。雞肋編

和吳正仲觀李延珪墨

賴召陳元典籍傳，寫教邊腹擅便便。竟誇削木真餘事，卻笑磨人得永年。三友不居毛穎後，五車仍在楮生前。祇愁公子從醫說，火煨生分不直錢。

雞肋編：吳弁正仲家蓄唐以來諸李所製墨，無出廷珪之右者。其堅利可以削木，王彥若墨說云：趙韓王從太祖至洛行宮，見架上篋取視，皆李氏父子墨也。因盡以賜王。後王之子婦孳中血運危甚，醫求古墨爲藥，因取一枚投烈火中，研末酒服即愈。諸子欲各備產乳之用，乃盡取墨煨而分之，自是李氏墨世益少得。

姜光彥

光彥字仲謙，號松菴，淄州人。

己酉中秋，任才仲陳去非會飲岳陽樓上，酒半酣，高談大笑，行草閒出，誠一時俊遊也。爲賦之。

岳陽樓高幾千尺，俯視洞庭方酒酣。萬頃波光天上下，兩山秋色月東南。興來鸞鶴隨行草，夜永魚龍駭笑談。我欲煩公釣鼈手，盡移雲水到松菴。岳州府志

周莘

莘字尹潛，錢唐人。邪之孫，爲岳陽決曹掾，與陳去非爲友。

野泊對月有感

可憐江月亂中明，應識逋逃病客情。斗柄闌干洞庭野，角聲淒斷岳陽城。酒添客淚愁仍濺，浪卷歸心暗

自驚欲問行朝近消息，眼中羣盜尙縱橫。瀛奎律髓

康輿之

輿之字伯可，渡江初，以詞受知高宗，官郎中，有順菴樂府。

鵝林玉露：建炎中，大駕駐維揚，伯可上中輿十策，名聲甚著。後秦檜當國，乃附會求進，擢爲臺郎，值慈寧歸養，兩官燕樂，伯可專應制爲歌詞，諷豔粉飾，于是聲名掃地。世但以柳耆卿輩矣。檜死，伯可亦貶五羊。

題宣和御畫扇

玉輦宸遊事已空，尙餘奎藻繪春風。年年花鳥無窮恨，盡在蒼梧夕照中。

樞史：康輿之在高皇朝，以詩章應制，與左璫狎，適睿思殿有徽祖御畫扇，上時持玩流涕，璫偶下值，竊攜至家，而康適來，留之燕飲，漫出以示康，給璫入取着核，輒泚筆几閒書一絕于上，有頃璫出見之大恐，而康已醉無可奈何，明日伺閒叩頭請死，上

大怒，亟取視之，天威

頓露，但一慟而已。

僻居

巷僻過從少，柴門盡日關。鶯聲常在柳，雲影不離山。有道難言□，雖貧未厭閑。川原煙四暝，春思有無閒。

鷺

春暗汀洲杜若香，風標公子白霓裳。碧天片雪忽飛去，何處人家水滿塘。

琵琶

夜深琵琶聲似裂一曲霓裳一庭月曲終人影在西階困倚東風步搖折

可惜

簾幕重重下玉鉤。隔簾春在柳梢頭。東風著意相料理。吹去楊花不自由。以上前賢小集拾遺

題清江慧力寺

天涯芳草盡綠。路傍柳絮爭飛。啼鳥一聲春曉。落花滿地人歸。

江上濃陰曉未開。瘦筇支我上蒼苔。春寒前日去已盡。今日又從何處來。詩人玉屑

招真詞并記

自姑蘇出齊門。沿而北。望山如巨鼇。常熟縣之虞山也。邑去江不及程。陂湖畝澮之積自南至者。傾馳會于江。江河既應。則迅瀾倒流。二水相制。移時而不能去。山無奇谷。惟荒墟白草。醜石陂陀。迤邐而西。有修林橫抹。隱見于兩山之閒。其中爲招真菴。元祐中。道人申氏。海陵徐處士弟子也。松林森茂。庭宇簡寂。如隱君子之居。通州道士喻抱元增治之。舊名竹陵。自是更以招真請記于僕。乃歌招真之詞以系之曰。

白鶴巢兮丹井空。蓬山杳兮煙霞濛。陵谷變兮今古。木葉下兮秋風。飛仙去兮朝太微。黃冠野服兮以遊。以嬉。餐霞臥月兮世不我違。與世滌映兮天門可馳。蒼龍嗥兮雲漫扉。石泉冽兮山芋肥。俯仰宇宙兮日月蔽。麴靈秀回薄兮野芳呈姿。山中之樂兮萬化莫移。仙人不來兮隱者曷追。蘇州府志

李唐

唐字希古，河陽三城人。徽宗朝，補入畫院。建炎間，太尉邵宏淵薦之，授成忠郎、畫院待詔，賜金帶。

圖繪寶鑑：李唐年近八十，善畫人物山水，筆意不凡，尤工畫牛。

高宗雅重之，嘗題其長夏江寺卷云：李唐可比唐李思訓。

畫繼補遺：建炎南渡，李唐如杭，得幸高宗，余家有唐畫胡笳十八拍。

高宗親書劉商辭，留空絹俾唐圖寫，亦見高宗雅愛唐畫也。

題畫

雲裏煙村雨裏灘，看之容易作之難。早知不入時人眼，多買燕脂畫牡丹。

邵氏書畫題跋記：錢唐宋杞云：唐初至杭，無有知者，貨楮畫以自給，日甚困，有中使識其筆，曰：待詔作也。唐因投謁，中使奏聞，而唐之畫杭人即貴之，嘗有詩云云。

張九成

九成字子韶，號無垢居士，開封人。徙家錢塘。紹興二年進士第一。歷宗正少卿，兼侍講，權刑部侍郎。累謫南安軍，起知溫州，丐祠卒。贈太師，封崇國公。諡文忠。有橫浦集、心傳錄、日新錄、論語詩。

南安寶戒院作

苦無人事擾閑居，贏得終年學著書。今日欣然出門去，秋風吹意滿芙蕖。

橫浦心傳錄

菩提寺

高僧居物外，有戶書常扃。海闊知天大，泉甘識地靈。一簾春月靜，數點別山青。便卜歸歟計，移文休勒銘。

遺樊茂實硯詩刻硯後

端溪石硯天下奇，紫光夜半吐虹霓。不隨凡石追時好，真與日月爭光輝。韜藏久矣不亂用，唯恐翰墨汙染之。樊子文章有餘地，汪汪萬頃誰能窺。贈君此硯無輕棄，經史妙處其發揮。飛流濺沫徧天下，要使咳唾皆珠璣。游官紀聞

施德操

德操字彥執，鹽官人。與張九成子韶、楊璇子平、號三先生。著北窗炙輿。

廣福禪院

在鹽官有雪峯禪師手鑿井。

何處登臨眼最明，雪峯佳處一川平。潮從海月生時上，峯在雲天盡處橫。幢蓋神扶喬木影，風雷井閉古泉聲。靈蹤鑿盡翻惆悵，何日□山報道成。咸淳臨安志

楊璇

璇字子平，鹽官人。與施德操同時。里人號德操爲持正先生，璇爲謹獨先生。

東山廣福院

在鹽官院有葛仙翁井。

櫟擢青山下來尋，薊子家人魚皆靜樂。水木亦清華，松老已成蓋。菊寒殊未花，何須覓句漏。此地有丹砂。咸淳臨安志

西山廣福院

在海寧紫微山

地勢連滄海。名山號紫微。景閑僧坐久。路僻客來稀。峽影清相照。河流石自圍。塵喧都不到。安得此忘歸。
海寧縣志

刁文叔

文叔不知其名。張橫浦子韶之友。

春日旅中

來時江梅散玉葉。歸去麩麥如人深。桃花只解逞顏色。惟有垂楊知客心。

橫浦心傳錄云。思

致尤遠。不止工也。

陳棠

棠字德召。紹興二年進士。官祕書少監。

晚步

晚步沙頭倚小晴。南山正與暮雲橫。棲鴉啼處野煙合。飛鳥去邊孤月生。樹暗風微花氣度。溪深雨漲水痕平。夜闌衣溼迷歸路。髣髴前村燈火明。
前賢小集拾遺

鄭仲熊

仲熊字行可。衢州西安人。紹興二年進士。累官權參知政事。忤秦檜落職。孝宗卽位。復端明殿學士。

桂花

天公憐我太岑寂。每歲殷勤兩度開。收拾落英將底用。博山香裏薦清杯。全芳備祖

鄭剛中

剛中字亨仲。婺州金華人。紹興二年進士。累除祕書少監。出爲四川宣撫使。爲秦檜所忌。能謫桂陽軍。徙封州卒。檜死。復原官。謚忠愍。有北山集。

老學菴筆記。蜀人任子淵好譏。鄭宣撫剛中自蜀召歸。其實秦檜欲害之。鄭公有惠政。衆皆太息。或曰。鄭不來矣。子淵對曰。秦少恩哉。人稱其敢言。方萬里跋。北山文簡古詩峭健。在封州詩尤佳。

脩脩窗前蘆

脩脩窗前蘆。孤瘦倚青玉。心虛知夜涼。風葉亂相觸。使我入幽夢。如在江湖宿。方茲困炎曦。愛爾眼中綠。奈何柔脆姿。行犯秋霜肅。霏霏霜露中。菱荷等摧覆。大抵無勁節。不及歲寒竹。

過越江見人家臨水竹可愛

何人此地得幽居。水竹中間宅一區。無盡江山千萬里。有情花木兩三株。應無俗客來驚犬。時有扁舟過賣魚。我欲他時成卜築。更添幾架古人書。

寒意

嶺南霜不結。風勁是霜時。日落晚花瘦。山空流水悲。棲鴉尋樹早。凍蟻下窗遲。季子家何在。衣單知不知。
辛未元夜

輕寒擁山城。遠綠生春草。迎神樂元夜。笑語聞蠻獠。惟有團圓月。報我時節好。寸燈豈爲孤。卮酒未爲少。
微醺短檠旁。人靜茅屋小。以上北山集

范達夫硯

范郎紫玉餘半圭。翻手作雲雨雹隨。龍蛇起陸孔翠飛。雲收雨霽千首詩。硯箋

王伯庠

伯庠字伯禮。鄞人。參政次翁之子。紹興二年進士。官至夔州路安撫。

和潘良貴題明州三江亭韻

使君不受二毛侵。杖履逍遙得勝尋。撥遣簿書聊永日。登臨山水亦何心。殘梅隨雪垂垂白。弱柳搖春淡
淡金。倚闥大江供一笑。幾多襦袴在謳吟。延祐四明志

陳栖筠

和潘良貴題明州三江亭韻

紅塵一點不相侵。下瞰澄江幾萬尋。地接海潮分鼎足。簷飛鳳翼峙天心。三山有路雲垂幕。午夜無風月
涌金。欲識黃報新政。滿城爭唱使君吟。延祐四明志

贈泊宅翁方勺

學道悠悠未見功。敢云凡質有仙風。他年一鉢江湖去。先向茗溪訪葛洪。金華府志

謝 伋

級，字景思，上蔡人。參政克家之子。官至太常少卿。紹興初，侍父寓居黃巖，自號藥寮居士。有藥寮叢藁。

妙庭觀

蕭蕭六轡天邊路，雲竹風松正歲寒。欲洗衰顏換凡骨，應須九轉大還丹。
雲輶一去遠難追，丹鼎埋光固不疑。承露仙人辭漢後，幾重深杳隔瑤池。杭州府志

陳用中

用中，字彥才，永嘉人。

戲作

賦命安能比鉅公，偶然年月與時同。只因日上爭些子，笑向連江作醉翁。

竹坡詩話：紹興初，有退相寓永嘉，獨陳用中彥才，雖鄰不謁，及再相，有薦之者。止就部注邑連江，戲作小詩云：蓋其所生年月時適與時宰同，但日差異耳。

陳述

述，紹興初，知袁州。

化成巖

出郭二三里，覽勝適願言。羣山接天際，一水經巖根。參差崖上屋，蕭閑松下門。真趣自往古，聊可開清尊。
袁州府志

董穎

穎字仲達。德興人。紹興初。從汪彥章徐師川遊。有霜傑集。

江上

萬頃滄江萬頃秋。鏡天飛雪一雙鷗。摩挲數尺沙邊柳。待汝成陰繫客舟。前賢小集拾遺

句

雲壑釀成千嶂雨。風蘋吹老一川秋。夷堅志

高登

登字彥先。漳浦人。宣和間為太學生。與陳東等上書乞斬六賊。不報。紹興二年。廷對極言。授富川簿。轉古縣令。以不肖祠秦檜父。胡舜陟誣奏。下靜江獄。會舜陟以他事下獄死。乃得白。編管容州。卒。有東溪集。

思歸

忽忽已秋杪。言歸欣有期。接物想吾廬。青藜繁東籬。流匙白雲子。蘸甲黃鵝兒。對此憶羈旅。多應歌式微。喜慰倚門心。愁銷舉案眉。穉子鬧檐隙。繞膝牽人衣。歸心念如許。兼程猶苦遲。明朝秋色裏。烏帽風披披。冒寒行風雨有感。

號風撼枯枿。凍雨凝路塵。乾坤祕日月。八荒同一雲。遙知沙漠寒。黯黯愁殺人。天涯望不極。流淚滿衣巾。

水漲謝邑宰送米

心知一字不堪煮。矻矻窮年黃卷中。食粥由來未爲拙。儲瓶況乃嗟屢空。令君好賢媿韓愈。賤子受賜慚盧仝。春水從教繞舍北。癡兒不復啼門東。

中秋對月

繡江再見中秋月。歲去月圓人尙缺。相望千里共嬋娟。苦恨亭亭照離別。今夕一樽誰與同。孟光舉案對梁鴻。衆雖立侍儼成列。以此持杯壽乃翁。乃翁看月揩病目。手足傾頽頭髮禿。但願團圓三十秋。不計東西與南北。以上東溪集

劉儀鳳

儀鳳字韶美。普州人。紹興二年進士。孝宗朝。累遷祕書少監。兵部侍郎。斥歸。復起。知漢州果州。

詠范志元

誰家遊冶郎。鬪首窺幽闥。但見臉如花。不知心是鐵。一夕變其軀。雪姿映雲髮。昔爲桃李顏。今作松篁節。

方輿勝覽。純陽山在合州石照縣北。唐女冠范志元得道處。天寶間。天使任安者。至山中慕之。而志元變爲男子。劉儀鳳有詩。

自歸州陸行至夔州

戶口村無幾。犁鉏力不堪。林荒樗櫟壽。月黑虎狼貪。幽絕雲眠穩。清閑谷飲甘。故山深未極。壤斷蓋茅菴。曠野無人宿。危亭犯雨過。嶺雲堆最巔。利海現兜羅。酒觸秋懷壯。天留暮色多。不勝行役苦。裁入竹枝歌。
顧氏積書巖選

李衡

衡字彥平。號樂菴。江都人。紹興二年進士。累遷監察御史。出知溫婺台三州。召除起居郎。祕閣修撰。致仕。居崑山。

慧聚寺作

盡日用登陟。跏趺聊對牀。巖空炫層碧。草細涵幽香。弔古漫秋思。開尊已月光。隨身有筇木。作戲且逢場。天面無纖靄。平川灑氣吞。搗笳臨閣道。拂石憩雲根。柳映山前路。煙搖水北村。醉歸風滿袖。斜月在蓬門。

樂菴初成

老子平生百不足。菴成那管食無肉。終朝閉戶只讀書。四面開窗都見竹。以上玉峯詩藁

薛靖

靖。鄞人。紹興二年進士。

望金山

一柱支空立。濤聲春寺聞。消來巴地雪。飛到潤州雲。寂寞江山色。縱橫盜賊羣。不堪形勝裏。北望涕紛紜。

薛氏世風集

孫雄飛

雄飛字暈之。吳郡人。紹興二年進士。祕書省正字。

靈隱寺蓮峯堂

堂開金色界。梵客爲鉤簾。山影碧侵座。水聲清繞簷。粉雲埋石腳。珠露泣松髯。終擬攜孤笛。凭闌喚玉蟾。
咸淳臨安志

楊愿

愿字謹仲。清江人。紹興二年進士。歷簽書樞密院事兼參知政事。罷提舉太平觀。

伏承駒父祕校惠示見和鄙句七言四韻二首。降歎之餘。因成二絕往謝。

冷官廳事客來稀。衆綠陰陰結夏帷。忽得君詩愜人意。陶家風到北窗時。

只今侍讀周夫子。屢說君詩似杜詩。速把冠塵盡彈卻。玉堂宵直伴王維。

愿數見侍讀侍郎周公盛稱駒父詩有

句法。故後篇及之。周益公題跋。

汪應辰

應辰字聖錫。玉山人。紹興五年進士第一。孝宗朝。歷吏部尚書翰林學士。出知平江府。卒諡文定。

有集

輓宣撫吳郡王

節義家傳久。艱難始見忠。一心惟徇國。百戰竟平戎。環列周廬肅。官儀道路同。細看麟閣上。誰得似初終。
太傅元功首。汾陽異姓王。恩榮兼二美。聲迹遠相望。名載風雲會。神遊水月鄉。維師空贈典。無復見鷹揚。
分韻送胡丈歸建康

先生高臥武夷巔。一旦趨朝豈偶然。報國自期如皦日。歸田曾不待來年。懷鉛共笑揚雄老。鞭馬今輸祖

逃先册府風流久寥落。送行始復有詩篇。以上汪文定公集

湯莘叟

莘叟字起莘。寧化人。紹興五年進士。終饒州推官。

馬上吟

宿雨洗山新綠嫩。曉風吹杏淺紅乾。沙頭路暖日初上。行客揚鞭不覺寒。

句

葛巾簪下無多髮。茅舍門前有好山。幽居 以上汀州府志

孫起卿

起卿。吳郡人。紹興五年進士。

江纂墓碑

家有古冢碑。近自田家獲。藏之五六年。未甚見省錄。古苔侵文理。封結殆莫識。偶然嗟其窮。一一爲磨剔。始若漫無文。細尋適可讀。文云晉江纂。長夜垂茲刻。貞石殊不用。塊然但埏埴。合葬無別銘。背面書反覆。一字不涉華。本枝記明白。二父遂兼書。于適乃宗嫡。自注。誌云。養父。諱本。父適也。考諸晉史。篇真是小出入。字畫亦嶮勁。然不類鑄。斷漢魏尙豐碑。茲獨何褊迫。豈時丁喪亂。不暇治品式。于時義熙季。處次實庚戌。五

胡剖中華。典午竄南極。苟簡理宜爾。寧詒不孝責。審訂昭昭然。疑去喜自適。歷年七百餘。警爾駒過隙。名

節苟不傳。埃化先庀石。實茲當眼前。用代銘几席。

吳郡志江蘇江適子也。木瀆孫起卿。頃于天平山下地名上沙。獲墓碑。乃以大方飄刻之。字畫俱存。與石無異。起卿爲賦詩。

吳詠

詠字永言。仙居人。第從兄。紹興五年進士。仕西安令。有西安集。

殊聖寺和孟戎幕韻

院靜僧疑少。門幽客自稀。山寒雲近屋。逕狹石侵衣。松鬣蒼髯古。薑芽紫筍肥。騷人詩戰罷。踏月夜深歸。

台州府志

魯嘗

嘗字季卿。號冷齋。海鹽人。紹興五年進士。仕至太府卿。注杜詩行于世。

樂郊私語。杜少陵集。自遊龍門至過洞庭詩目次第。爲此州先正魯季卿編定。大都一循少陵生平行跡。可以見其詩法升降。隨其年自少而壯而老。愈入于細而化也。

春詞

疊穎叢條翠欲流。午陰濃處聽鳴鳩。兒童賭罷榆錢去。狼藉春風漫不收。詩林萬選

沈作喆

作喆字明遠。吳興人。丞相該之姪。紹興五年進士。嘗爲江右漕屬。作哀扇工歌。忤洪帥魏良臣道弼。据深文劾之。奪三官。有寓山集。

哀扇工歌

黃州竹扇名字著。織扇供官困追捕。史君開府未浹旬。欲戴綸巾揮白羽。新模巧製旋剪裁。百中無一中。程度犀革鑄柄出。蟲魚麝煤熏紙生。煙霧叢山老姥羞翰墨。漢宮佳人掩紈素。衙內白取知何名。帳下雄擊不知數。供輸不辦筮楚頻。一朝赴水將誰訴。史君崇重了不聞。嗚呼何以慰黎庶。聞道園家賣菜翁。又說江南打魚戶。號令亟下須所無。官不與錢期限遽。歸來痛哭辭妻兒。宿昔投繯挂枯樹。一雙婉婉良家子。吏兵奪取名爲顧。弟兄號叫鄰里驚。兩家吞聲喪其嫗。死者已矣可奈何。冤魂成羣空號呼。去聲殺人縱欲勢位尊。貪殘無道天所怒。邦人蓄憤不敢言。君其拊馬章臺路。清波別志

鴨按章居安梅欄詩話云。哀扇工詩不傳。今從清波別志檢得無名子哀扇工歌一首。當卽是沈詩。佚其姓名。爾陳直齋云。哀扇工詩。罵而非諷。今讀之良然。仍以還沈。

鄭若谷

若谷、鄞人。紹興五年進士。

和潘良貴題明州三江亭韻

遠望登高萬象侵。元戎端不爲花尋。未誇駕鶴蓬山路。應壯斬鯨遼海心。小艇鱸肥盤膾玉。危闌客醉椀揮金。中流擊楫雄圖遠。回笑三閩澤畔吟。延祐四明志

關注

注。字子東。崇仁子澗弟。紹興五年進士。教授湖州。至太常博士。自號香巖居士。有關博士集。

記夢

元衣仙子從雙鬢，緩節長歌一解顏。滿引銅杯效鯨吸，低回紅袖作弓彎。舞留月殿春風冷，樂奏鈞天曉夢還。行聽新聲太平樂，先傳五拍到人間。

墨莊漫錄：宣和二年，睦寇方臘起，黨浙西震恐。關注子東在錢塘，避地攜家於無錫之梁溪。明年臘，就擔子東貧未能歸，儲寓毗陵郡崇安寺古柏院中。一日忽夢臨水有軒主人延客，年可五十，儀觀甚偉，元衣而美須髯，揖坐使兩女子以銅杯酌酒。謂子東曰：自來歌曲新聲，先奏天曹，然後散落人間。他日東南休兵，有樂府曰太平樂，汝先聽其聲，遂使兩女子舞，主人抵掌爲節，已而恍然而覺，猶能記其五拍。子東以詩紀之云。

松聲

夢破松聲枕上聞，睡魔夜半戰吟魂。初疑夜雨連江岸，乍覺寒潮上海門。招引好風來古寺，追隨月色下前村。晚行欲向聲來處，鬱鬱蒼波盡日奔。南窗紀談

句

鐘聲互起東西岸，漁火遙分遠近村。

春渚紀聞：此余友關子東西湖夜歸所
作，非身到西湖，不知此語形容之妙。

夜長何時日，苦寒不成寐。

強行父唐子西先生文錄：關子東一日寓辟澗，朔風大作，因得句云云。以問唐先生云：詩律雖不到，對亦似不穩。先生云：正要如此，一似藥中要存性也。

朱敦儒

敦儒字希真洛陽人以薦起紹興五年賜進士出身爲祕書省正字兼兵部郎官遷兩浙東路提點刑獄上疏乞歸居嘉禾晚除鴻臚少卿有巖壑老人詩文一卷又有獵較集

二老堂詩話希真詩詞獨步一世秦丞相晚用其子某爲刪定官欲令希真教秦伯陽作詩遂落致仕除鴻臚少卿蓋久廢之官也蜀人武橫作詩嘲之未幾秦丞相薨希真亦遭臺評高宗曰朕用明臺薦以隱逸命官置在館閣豈有始恬退而晚奔競耶其實希真老愛其子而畏避風逐不敢不起識者憐之

小盡行 避地廣中作

藤州三月作小盡梧州三月作大盡哀哉官歷今不頽憶昔昇平淚成陣我今何異桃源人落葉爲春花作春但恨未能與世隔時聞喪亂空傷神 竹坡詩話

絕句

輕陰小雨晚難收柳瘦梅窮卻似秋可恨水仙花不語無人共我說春愁

春怨

梨花雨送海棠風不借胭脂作小紅幾日無人吹玉笛鴛鴦飛入館娃宮 以上後村詩話

絕句

青鞵包裹自行纏不是凡人不是仙家在洛陽城裏住臥吹銅笛過伊川

澄懷錄。陸放翁云。朱希真居嘉禾。與朋儕詣之。聞笛聲自煙波間起。頃之。櫂小舟而至。則與俱歸室。中懸琴筑阮咸之類。簷間有珍禽。皆目所未觀。室中籃缶貯果實脯醢。客至。挑取以奉客。其詩云。

句

過時不語鶯解事。怕客深藏魚見機。人閒萬事老無味。天下四時秋最愁。翦茅編鶴屋。篩米聚雞糧。

燈昏鼠窺。雨急犬穿籬。後村詩話

孫松壽

松壽字嵩老。郟縣人。紹興五年類試進士。嘗爲漢嘉守。除直祕閣。

觀古魚鳧城。在溫江縣北十五里有小院。

野寺依脩竹。魚鳧迹半存。高城歸野壠。故國竊荒村。古意憑誰問。行人謾苦論。眼前興廢事。煙水又黃昏。

賦成都碧雞坊李氏石君。原注事見成都古今記中。蓋湖石之最大而奇者。著名舊矣。

造化小兒斲山骨。幾年流落蛟龍窟。太湖一碧浸玻璃。瀾吞浪吐窮奔突。瑰奇未許困泥沙。漂出江臯空傲兀。清寒偃蹇如高人。冑向蓬蒿念埋沒。曩聞上苑饒奇珍。千形萬狀高嶙峋。當年搜索困山海。氈包席裹車麟麟。規模豈但肖五岳。氣象直欲凌三神。一朝胡馬窺城下。倒隨矢石荒荆榛。憐君分落幽人手。不逐爾輩汗塵垢。首陽寂寞伯夷清。瀟湘冷落三閭瘦。李侯胸中飽雲夢。得君不用斯瓊玖。館之舊隱與周旋。竹士松賓三益友。相看一洗名利心。眉宇更清元德秀。君今幾世德未衰。霜寒玉立癯而壽。咄嗟世眼多嗜好。玩形忘理十八九。奇章所蓄森琅玕。名標甲乙空紛然。到溉奇疆高峯嶽。一擲徒爲負進錢。石君

於汝非不厚，較其所得無何有。願公世濟此君爲不朽。以上成都文類

王灼

灼字晦叔，遂寧人。嘗佐總幕有頤堂先生集。

贈王道成

龍鍾健兒須如棘，幼事秦府持鞭勒。戰塵撲面心已灰，徑上三峯弄泉石。乾坤變化五百年，人間未識地行仙。布囊落魄荆州市，丹經祕法爲君傳。散盡千金何所有，腹中氣作蛟龍吼。功成直欲投紫霄，尙愛岷峨山下酒。年來我亦厭樊籠，乞取微言爲指蹤。君不見葉縣雙鳧緱嶺鶴，古來度世多吾宗。

夷堅志：王道成先生者，夔州人。射利江湖間爲買客。政和六年，忽遇異人傳內丹之妙，遂破家從王鼎學道。遨遊東西二蜀，鼎亦時見荆南市中，不與人交一談，無能識其誰何者。身長七尺，廣目美髯，狀貌如四十許人。荆南父老自兒童時蓋已見之。日與道成飲，自通姓名曰：吾洛陽人。唐武德初，事秦王爲御者，奔走兵間，後得仙法，隱華岳山中，以至於今。酒酣別去，不知所往。道成本愚民，不能從其詞，訪大業武德中事，且驗其是否。紹興六年，道成見王灼晦叔於金川，講巖盟之好，爲作古風一篇。與之，此篇見頤堂集中。不終言道成之究竟也。

銅馬歌并序

郫城村民鑿古墓，遂得一銅馬。高三尺許，制作精妙。前簡池守景季淵取以歸，中宵風雨，輒聞嘶聲，怪之不敢留，移送佛寺。紹興丙子，予以事至成都，黃伯淵見索作銅馬歌。

君不見武皇逸志凌九垓。追風躡影思龍媒。魯班門外立銅馬。天廐萬匹皆塵埃。又不見伏波將軍破交
賊。歸來殿前獻馬式。據鞍習氣殊未衰。想見老子真嬰鑠。兩京翻覆知幾秋。只有山河供客愁。孤煙落日
蠶叢國。出此神物于荒丘。千年黃壤誰作主。猶把歸心泣風雨。但恐一朝去無蹤。有似豐城寶劍化雙龍。
以上顧堂集

宋詩紀事卷四十五

錢唐 厲鶚 輯
仁和 徐元杜 勘定

陳淵

淵字知默。初名漸。字幾叟。南劍州沙縣人。權之從孫。紹興五年。賜進士出身。累遷右正言。終宗正少卿。有默堂集。

錢清堰待潮

江潮來去自有時。扁舟閣淺心如飛。岸容霜竹青照眼。春信梅花香撲衣。天寒鄞江道路阻。歲晏錢清風俗非。故園回首二千里。落日看盡行雲歸。

題綠波亭

南浦江波綠。陽關柳色青。夕陽千古恨。分付短長亭。

寄內

明月向人圓。愛之不能睡。坐久風露寒。忽忽心如醉。念君一適我。所遇無歡意。況乃久別離。相思到夢寐。我生百不堪。謬學屠龍技。于今半世人。升斗亦未遂。賴有室中友。素懷隱居志。官與梁伯鸞。扁舟共東逝。天姥寺

浮雲作秋陰，細雨如朝霧。放形山水閒，意適無艱步。忽遇古招提，空翠森回互。倚杖聽泉鳴，悠然不能去。季修舍舟趨諸暨，謁劉元成，獨泛錢清江，有懷其人。

人遠牛羊暮，春深草樹滋。野橋低映水，浦岸曲縈籬。風雨江湖思，乾坤杖履疑。論心竟誰是，短棹欲何之。邑中諸公見和再用前韻。

看盡愁人萬點紅，曉來雙鬢白于茸。他時儻記江南夢，畫我黃梅細雨中。

錢唐江

潮頭駕月衝殘夢，水色浮空送峭寒。十幅輕蒲連夜發，不知身到海門山。以上默堂集

題善山院

拄頤長劍上凌煙，自古功名亦偶然。鍾鼎山林俱不惡，一瓢可飲盡吾年。延平府志

秦梓

梓，字楚材，檜弟。歷知台秀，袁太平常湖六州。除翰林學士，出知宣州，再移湖州，進資政殿學士，致仕。

溧陽貞女祠

史氏之女生寒門，白璧粲粲貞義存。上無所天漂爲業，春風三十報母恩。斬奢芟尙白日昏，子胥脫身閒道奔。遠來困窮乞于此，分以壺漿救虛餒。子胥還吳雪讐恥，貞女可憐身已死。一飯之德古必償，遺以千金投瀨汜。謫仙高才解幽沈，奕奕穹碑照江水。有客停舟臨古祠，涼颼動木興遐思。蕉黃荔丹幾千古，煮

蒿悽愴若見之。更憐扶日人已去。姑蘇臺上草萋萋。貞烈集

鄭樵

樵字漁仲。莆田人。居夾漈山中。自稱溪西逸民。紹興中以薦召對。給札歸。鈔所著通志。書成入爲樞密院編修官。有夾漈遺稿。

北山巖

西風洩洩片雲閑。一夜寒泉臥北山。倚杖巖頭秋獨望。稀疎煙壠是人間。興化府志

黃公度

公度字師憲。莆田人。紹興八年進士第一。簽書平海軍節度判官。累仕考功員外郎。有知稼翁集。

悲秋

萬里西風入晚扉。高齋悵望獨移時。迢迢別浦帆雙去。漠漠平蕪天四垂。雨意欲晴山鳥樂。寒聲初到井梧知。丈夫感慨關時事。不學楚人兒女悲。知稼翁集

包孝肅清心堂

千里有餘刃。一堂聊賞心。庭虛延遠吹。簷敞受繁陰。休吏簾初下。忘懷機自沈。人閒足塵土。無路到清襟。肇慶府志

分水嶺

嗚咽流泉萬仞峯。斷腸從此各西東。誰知不作多時別。依舊相逢滄海中。

肇慶府志黃公度爲秘書省正字貽書臺官言者謂其譏訕時政罷爲主管台州崇道觀過分水嶺有詩云及公歸莆趙丞相鼎謫居潮陽讒者傳會其說謂公此詩指趙而言將不久復借還中都也秦檜怒令通判肇慶府

題嵩臺二絕

四山如畫古端州。州在西江欲盡頭。漫道江山解留客。老夫歸思甚東流。

松菊壺山手自栽。二年羈宦客嵩臺。無端卻被東風誤。又作恩平一夢回。廣東通志

陳俊卿

俊卿字應求莆田人。中紹興八年進士。累遷尙書右僕射。同中書門下平章事。兼樞密使。淳熙二年。除少保。判建康府。以少師魏國公致仕。卒。贈太保。謚正獻。有集。

其樂堂

在興化軍治四州峯之巔。爲城中登眺勝處。

其樂堂前花木深。登臨當暑豁塵襟。紅垂荔子千家熟。翠擁篔簹十畝陰。老退已尋居士服。清歡時伴醉翁吟。憑闌四望豐年稼。差慰平生憂國心。方輿勝覽

哭林艾軒

出爲嶺嶠澄清使。歸作甘泉侍從臣。百擔有書行李重。十金無產橐中貧。經旬把臂言猶在。昨日題詩墨尙新。清曉訪君呼不起。寢門一慟淚霑巾。合璧事類續集

題夾漈草堂

流水三間屋。公會半席分。帝嘗招此老。天未喪斯文。人去留青竹。山空只白雲。升堂時想像。金石恍猶聞。

方 焘

焘字次雲。莆陽人。紹興八年進士。調閩清尉。召對除祕書省正字。補外卒。焘與鹽官施廷先遊。傳楊龜山之學。林艾軒亦定交焉。

癸酉冬赴部。除夜宿信州客舍。

隔屋青燈一點明。臥聽簷雨落三更。無因作得還鄉夢。門外兒童爆竹聲。

讀老子

且惝流沙青犢車。蔥蔥佳氣滿城闕。白頭不解家人語。枉學司空城旦書。

呈柔立兄

雞犬還家自識村。重營生理長兒孫。時平戰地逢華屋。歲久他鄉是故園。別後塵埃如我老。歸來耆舊幾人存。雁行疇昔從遊者。莫話凋零恐斷魂。以上林慮齋續集

寺中別林謙之兼寄諸鄭

遊從忘朝晡。尊酒輕招呼。笑語恣玩狎。翻覆雲雨疎。我友數君子。古心相與娛。每見輒賓敬。衣裳儼而趨。惡石寓規誡。美疾疾佞諛。深山足風雨。零落梅花株。亭亭巖上松。霜姿一何孤。感茲各努力。勿以歲事徂。

莆陽文獻

句

秋明河漢外。月近斗牛旁。

楊誠齋詩話。林謙之

嘗稱其友方次雲句。

山寒一杯酒。歲晚兩窮人。和鄭處易溪邊贈別可惜聽泉夜。還當殘月時。游石泉 林鷹齋續集

龔茂良

茂良字實之。興化軍人。紹興八年進士。孝宗朝。累除敷文閣待制。禮部侍郎。尋拜參知政事。安置英州。卒後復官。謚莊敏。有靜泰堂集。

靈源菴

遲回不忍去。復作抱衾留。斷續雲閒雨。蕭騷木末秋。勞生那有此。漸老欲相投。最愛千山暮。鐘鳴處處幽。莆陽文獻

王之望

之望字瞻叔。穀城人。紹興八年進士。孝宗朝。附湯思退。拜參知政事。兼同知樞密院事。罷爲資政殿學士。知温州。有漢濱集。

涪溪中興頌碑

蜀日旣衰。落日亡前星。靈武騰光芒。元功百戰。兩京復。萬里阿瞞歸故鄉。干戈紛紛徧四海。涪碑已立。湘江旁。太師艱難喜初定。作此大字龍鸞翔。紙翠縑搗四百載。家家傳寶踰琳琅。唐文中世未變古。燕許偶

儷爲班揚。次山之文可也。簡此頌未追周魯裔。嶽山滔天等窮澆。春秋之法誅無將。騁兵二字斥邊將。此語豈足懲姦強。末篇三章頗辭費。筆力不復能鏗鏘。磨崖勒銘亦何有。反復自贊乃爾詳。向來各人過許與。舉世附和無雌黃。淮西仆碑無墨客。惜哉不得逢鍾王。

房公湖 在漢州。又名西湖。房瑄上元開爲牧。始鑿湖。治平間韓標序云。今亭館皆非房公時事。

金雁橋南二頃湖。房公遺墨未湮蕪。人遊杜牧晚晴賦。境對王維別墅圖。經始園林心自巧。折衝廊廟術何迂。常時只作幽人計。留得陳濤四萬夫。以上方輿勝覽

過石城

滄浪渡口莫愁鄉。萬頃寒煙落木霜。珍重使君留客意。一樽芳酒對斜陽。
江上危亭思黯然。追遊陳迹欲經年。別來西望應相憶。郢樹荆門共一川。湖廣總志

陳長方

長方字齊之。號唯室。福州長樂人。徙居吳中。紹興八年進士。終宣教郎江陰軍教授。有唯室集。

題定武本蘭亭

昭陵一入見無從。鑄石猶將贖本供。八法典刑今在此。華山天外立三峯。
不須苦恨厭家雞。自是鹽車後月題。弄筆數行書紙背。莫教人喚庾安西。
此甥此舅兩風流。翰墨相傳不誤投。大似曹溪付衣鉢。臨池他日看銀鈎。

蘭亭續考跋吾友胡少明教官以王文正家所得蘭亭惠其甥王立之定武石刻屢經牧守私易此本信非近年撫搨失真者所能髣髴也紹興乙卯上元日閩人陳長方齊之題于笠澤寓舍

葛立方

立方字常之丹陽人徒吳興勝仲之子紹興八年進士隆興開官至吏部侍郎有西疇筆耕韻語陽秋歸愚集

避地傷春

洛陽宮闕半成灰。草草花枝濺淚開。國色天香消息斷。妝臺誰奉紫金杯。石門連日動征鼙。花柳無情自繞溪。回首故園今好在。杜鵑花落子規啼。

新城中

已去日邊遠。宜春程尙賒。呼童秣征馬。帶月趁啼鴉。橋斷復揭水。路窮還渡沙。誰能飾廚傳。裹飯野人家。
以上歸愚集

喜子郟登第

吾家五世十三人。競擷丹枝撼月輪。慶歷賢科開後裔。隆興儒業繼前塵。泥金帖報家庭喜。燒尾筵開帝里春。從此傳芳應未艾。桂香早已襲天倫。

余居吳興泛金溪上。暇日率同志拏小舟。載魚鼈蝦蟹。命五比丘誦寶勝佛名。若十二因緣法。作梵唄捨之溪中。坐中有請作詩以紀事者。余輒爲書云。

漁師竟日漁。水族作斤賣。小捐使鬼兒。滿載獲鱗介。鯤鯨未易羅。所得亦殊態。青蛙盡公私。朱鮪兼小大。霜鱸尙貫針。土負或黏塊。輪囷積文螺。郭索走蒼蟹。溼沫相响濡。自分煮薑芥。豈知慚隱人。規作江湖貸。因呼小青翰。收留舞澎湃。趺坐延黑衣。號佛指清瀨。經飛流水篇。流水長者事見金光明經。梵起魚山頤。傾盆帶寒藻。圍圍看于邁。驚疑或依蒲。喜躍或生喝。快若鷹辭鞫。歡如囚破械。定非校人池。恐是餘不派。願汝藉佛力。永脫鉤網債。口腹聊爾耳。香餌莫渠愛。以上韻語陽秋。

李 燾

燾字仁父。號巽巖。眉州丹棱人。唐宗室曹王臯之後。紹興八年進士。孝宗朝。歷官祕閣修撰。同修國史。拜禮部侍郎。除敷文閣學士。致仕卒。贈太師。諡文簡。

從何使君父子遊墨池。分韻得名字。成都縣治前有洗墨池。揚雄草太元經處。

蜀學擅天下。馬王先得名。簧如巧言語。于道蓋小成。子雲最後出。振策思遐征。斯文大一統。欲使聖域清。富貴盡在我。絨冕非所榮。旁皇天祿閣。聊亦觀我生。懷哉不能歸。舊宅荒荆榛。寂寞竟誰顧。正路今莫行。使君蓬萊仙。弭節歸赤城。門無俗賓客。家有賢父兄。慨念此耆老。不登漢公卿。臨池一尊酒。尙友千載英。拜呼嚴與李。月旦共細評。區區可無憾。彼重適我輕。竭來成都市。塵土汗冠纓。古人不可見。見此眼自明。請爲懷古詩。玉振而金聲。成都文類。

客懷

寂寞三秋節。淒涼萬里風。關河盡形勝。人物幾英雄。秦葉隨流水。周禾滿故宮。此心懸象闕。夢繞浙西東。

久客厭塵土。幽居懷翠微。只餘清夜夢。長作故山歸。菊已開三選。松應長十圍。晨鐘忽驚覺。猶有露霑衣。
曹氏歷代詩選

登金山

金山何處好。四顧不相連。窗迴前無地。波澄下有天。堂留三楚客。門泊五湖船。暝色關詩思。江籠兩岸煙。
金山志略

陳巖肖

巖肖字子象。東陽人。紹興八年。以任子中詞科。仕至兵部侍郎。著庚溪詩話。

洗竹

直榦解新籜。低枝蔽舊叢。芟繁留嫩綠。引月更添風。
庚溪詩話

范正國

正國嘗爲太和通判。

重經快閣

時紹興庚申閣燬。獨跨牛菴存。

僑寓窮滄海。心棲快閣閒。煙雲浮四座。几席對千山。闌檻何由見。神明悵未還。興崇應有待。高躅付誰攀。
快閣紀存

王逵

逵。壯節王公之孫。伯之子。

送田諤

兩地音塵隔死生，十年常效執珪吟。羨君已作遼東鶴，顧我空存魏闕心。日下旣蒙新眷遇，海邊休忘舊知音。儻憐萬里親庭在，爲向雲山處處尋。

蘆浦筆記：王復，字景仁，淄川人。高宗詔公知徐州，結罕寇徐，公領兵圍城拒守，城陷不屈，爲虜殺。凡圍門百口俱遇害。時建炎三年正月二十九日也。天子震悼，特贈資政殿學士，諡壯節。先是公長子侑以太僕丞從高宗過淮陽，紹興八年和好成，奏乞訪先臣遺骸，優詔許之。行至泗州，馬上得疾暴卒。侑子遠留淄川，南北隔絕，紹興十年承宣使田諤扈從顯仁太后回鑾，遠以詩送諤云云。詩至而侑卒已一歲矣。聞者哀之。

洪适

适初名造，後更今名，字景伯，皓長子。紹興十二年，中博學宏詞科。孝宗朝，歷尙書右僕射、同中書門下平章事兼樞密使、提舉太平興國宮。卒，諡文惠。有盤洲集。

寧國寺

幾日山南北，端期汗漫遊。水痕秋雨過，竹色曉煙收。宦海何時了，僧房爲少留。卻尋歸去路，餘興漫回眸。

曉發泰安驛在臨海

秋夢不能曉，起行山徑迷。小車驚宿鷺，列炬誤鳴雞。冷怯霜華重，光瞻斗柄低。金庭有佳處，芳桂想幽棲。

題三瑞堂

久矣馳魂夢，今登三瑞堂。故山有喬木，近事話甘棠。展驥慚充位，占熊憶問祥。白雲留不住，極目是吾鄉。

以上盤洲集。

方輿勝覽。洪公弼爲寧海主簿。時建適以荷花桃實竹
幹有連理之瑞。已而生。故適以貳車行縣。題詩云。

書懷

早歲那知世事艱。中原北望氣如山。樓船夜雪瓜洲渡。鐵馬秋風大散關。塞上長城空自許。鏡中衰鬢已
先斑。出師一表眞名世。千載誰堪伯仲閒。詩林萬選。

洪遵

遵字景嚴。皓仲子。與兄适同中博學宏詞科。賜進士出身。歷徽猷閣直學士。出知平江府。孝宗朝。
召除翰林學士承旨。拜同知樞密院事。江東安撫使。資政殿學士。提舉洞霄宮。卒。謚文安。有小隱
集。

丁香花

來自丁香國。還應世所稀。叢生盛花葉。亂結罽巾衣。冷豔璠爲色。低枝翠作圍。蔓連疑鎖骨。時見玉塵飛。
全芳備祖。

洪邁

邁字景文。黃介子紹。

邁字景盧。鄱陽人。皓季子。紹興乙丑中博學宏詞科。孝宗朝。累遷中書舍人兼侍讀。直學士院。拜
翰林學士。進煥章閣學士。知紹興府。以端明殿學士致仕。卒。贈光祿大夫。謚文敏。有野處類稿。容

齋五筆夷堅志萬首唐人絕句行于世。

四朝聞見錄洪邁鄱陽與兄丞相迺酬唱鵲詠于林壑甚適偶得史氏瑤花種之別墅名曰瑤野樓曰瑤樓園曰瑤圃。

秋日漫興

江湖久客日思家。坐覺微霜上鬢華。節序又催秋後雁。風光爭發雨前花。倦遊已夢莊生蝶。不飲何憂廣客蛇。怪底朝來衣袖薄。一川白露下蒹葭。

一夕西風木葉飛。畫梁落月淡餘輝。銀燈夜照還家夢。金剪親裁寄遠衣。霜信早隨新雁至。素書深訝故人稀。無因爲謝東曹掾。鱸熟蓴香莫便歸。野處類稿

鎖院同葉晦叔作兼簡謝景思

紹興十九年晦叔爲福建帥屬子嘗因春補諸生白于府主邀與同考核鎖宿真院兩旬

沈沈廣廈清如水。市聲人聲不到耳。一閑十日豈天賜。慙媿紛紛白袍子。相逢更得金玉人。久矣眼中無此士。連牀夜語不成寐。往往雞聲忽驚起。是中差樂真難名。昔者相過安得此。但憐時節不相謀。正墮清明寒食裏。梨花已空海棠謝。外間物色知餘幾。只恐風雨摧折之。負此一春吾過矣。謝公尋山飽閑暇。應笑腐儒黏故紙。錦囊得句應已多。萬一相思頻寄似。容齋三筆

車駕宿戒幸玉津園命下大雨將曉有晴意已而天宇豁然至晚歸邁進一詩歌詠其實

五更猶自雨如麻。無限都人仰翠華。翻手作雲方悵望。舉頭見日共驚嗟。天公的有施生妙。帝力拱同造物誇。上苑春光無盡藏。可須羯鼓更催花。容齋五筆

和朱子淵賦石柏

海底靈根石效奇。山經地志不曾知。凝紅幻出珠千顆。染紫裝成玉一枝。鶴骨龍姿隨質見。鸞棲鳳宿與香宜。元戎高唱真難和。媿我年來筆力衰。夷堅志

寄題兄景伯清闕堂

台州通判廳

昔聞王子猷。借宅亦種竹。此君固可喜。人亦清不俗。伯氏貧而擢。一飯不飽肉。堂前自經始。護此無盡綠。一官歲強半。餘日如轉燭。待其長稚子。而已牽歸轂。何由享嘉蔭。償我志願足。應煩彼邦人。日報平安福。赤城志

王龜齡王嘉叟木蘊之同過小園用郡圃植花韻

節到中和暖尚餘。東風隨後起芳華。自慙翳翳松三逕。相對蕭蕭馬五花。老去醉鄉爲日月。年來痼疾在煙霞。午橋別墅歸公手。早定淮西取白麻。文翰類選

泛舟遊武夷九曲

武夷之山如畫圖。中有玉洞藏仙都。一溪穿空舞澎湃。九曲度盡方盤紆。細看直疑路中斷。已轉始覺川平鋪。諸峯削成烏亦怖。危磴豈復人能踰。巖巖學館第傳授。鼓樓石牀知有無。坐令丹梯化一鶴。又喚立筍成三姑。遊人來觀但借問。道士指說猶驚呼。神君曾孫在何許。想見幔亭空藥爐。千崖萬壑心賞倦。正喜松風清坐隅。歸舟警然箭脫手。醉目眩我雙明珠。武夷山志

秀川館聯句

并序

鄱陽洪邁景盧。還自衡岳道宜春。買舟東下。永嘉方雲翼景南。置酒秀川館。餞之。邵武黃介景達。開封向灑巨源。歷陽許子紹季。詔與焉。坐中屬聯送行。且強景盧同之。人賦十許韻。賓主皆醉。不復續。惟巨源止酒。不開涓滴。獨又唱出八十字以成章。且書之。明日以遺景盧云。紹興二十七年九月乙亥。景南序。

江聲牀搖寒。山色窗拗綠。方歸舟著沙邊。客夢遶鄉曲。洪簪盍豁秋悲。筵開從夜下。黃黃花散疎籬。蒼竹圍破屋。向詩豪爭擊銅。談劇屢消燭。許借君五言城。洗我愁萬斛。方主人意無窮。客子去敢速。洪杯寬怯鯨吞。詞澀媿貂續。黃注瓦亦傾銀。聯珠仍綴玉。向天迴月明洲。霜清風隕木。許飛齊水擊鵬。揮退日斜鵬。方臭味漆投膠。芬芳蘭閒菊。洪味甘一櫛。嘗話勝十年讀。黃未用賦驪駒。方看舉鴻鶴。向行當歲九遷。勿憚晝三宿。許妙語子蟬。孤蹤吾鹿獨。方一老上星辰。三君進鳧鷖。洪平生仰高山。此夕霑膾馥。黃飛龍十九章。金馬三千牘。向儻非論石渠。定是讎天祿。許筆健翻狂瀾。辯雄噴飛瀑。方抄傳疲小胥。侍立倦更僕。洪力舉六鼈連。肘運千兔禿。方庖廚洗玉盤。萍豆鄙金谷。向豈無麟脯羞。亦有熊蹯熟。同上不須羅羶董。安用窮水陸。許搜尋到蹲鴟。餛飩兼苜蓿。方但畏酒樽空。寧知更漏促。黃勸頻難固辭。意厚敢虛辱。許一一罄餅疊。紛紛吐茵蓐。方茶甘旋汲江。火活乍然竹。向聊烹顧渚吳。更試蒙山蜀。洪清風生玉川。石鼎壓師服。黃忍醉興方新。語離情轉篤。洪明朝轉船頭。西風飽帆腹。黃去櫓響嘔啞。歸車聲輾轆。墨突諒難黔。曹裝行復促。便揚武林鑣。勿戀番江築。聖神攬權綱。賢俊登肅穆。向君恩晉接三。臣職坤用六。方夷路合騰驤。上心資啟沃。許吾道竟何憂。斯文欣有屬。洪執政猶股肱。天官乃眉目。當塔紅藥翻。規地青蒲伏。

遙知此數途。歷徧財一蹙。長吟美且箴。細酌壽而祝。端期千一逢。毋諱再三瀆。德進朝廷尊。河潤京師福。前修庶拍肩。能事當繼躅。君無廢此篇。隨車編卷軸。向 袁州府志

句

天上長留滕六在。人間會有葛三來。

困學紀聞野處雪句葛三事

出太平廣記葛仙翁第三子

向瀟

瀟字巨源。開封人。有葵齋雜藁。

從吳傅朋遊芝山。登五老亭。以駕言出遊分韻賦詩。得駕字。

茲山何巍巍。巍氣欲等嵩華。從公二三子。勝日飽閑暇。躋攀謝車輿。自辦兩不借。捫蘿覓幽磴。行椒得孤榭。側送夕陽移。俯視高鳥下。登臨記曩昔。歲月驚代謝。卻數一周星。復命千里駕。身從泛梗流。事與浮雲化。揭來共一尊。似爲天所赦。明發還問塗。合離足悲吐。

題吳傅朋遊絲書

先生著名節。百世追延陵。我評先生賢。不以能書稱。功成磨蒼崖。盛德頌日昇。勿書凌雲榜。華顛踏高層。
以上容齋三筆

方雲翼

雲翼，字景南，永嘉人。

題寶積寺

暫脫塵闈馬足埃，僧窗高臥白雲堆。青山影裏春醒解，黃鳥聲邊午夢回。坐嬾且推書冊去，吟清時喚茗甌來。要知門外無車轍，十日新生一逕苔。袁州府志

李端民

端民，字平叔。

和元微之春遊韻寄洪景伯

東閣經年別，窮愁客路難。望塵驚岳峙，懷舊各雲散。茵醉恩逾厚，檣敲興未殘。馮唐嗟已老，范叔敢言寒。玉燭調魁柄，陽春在筆端。應憐埽門役，白首滯江干。容齋五筆

葉南仲

紹興乙丑仲春遊崧臺作

斗峯遙憶舊崧臺，爲勸農耕特地來。短李高名光翠壁，僞劉陳迹沒蒼苔。洞天日永風埃淨，巖壑雲收霽色開。好景最宜供宴樂，操觚欲賦媿非材。崧臺石室志

胡憲

憲，字原仲，文定公從子。紹興中，貢入太學，賜進士出身，授左迪功郎，添差福州教授。以母老求監南嶽廟歸，起爲福建路安撫司屬官，復請祠。秦檜方用事，家居不出，檜死，以大理司直召，未行，改

祕書正字。既至，病不能朝。詔改秩與祠歸。卒。學者稱籍溪先生。

答朱元晦

幽人偏愛青山好。爲是青山青不老。山中出雲雨太虛。一洗塵埃山更好。

濂洛風雅。朱子跋云。右衡山胡子詩也。初紹興庚辰。某臥病山間。親友仕于朝者。以書見招。某戲以兩詩代書報之。曰。先生去上芸香閣。閣老新裁豸角冠。留取幽人臥空谷。一川風月要人看。甕牖前頭列畫屏。晚來相對靜儀刑。浮雲一任閑舒卷。萬古

青山只麼青。或傳以語胡子。子謂其學者張欽夫曰。吾未識此人。然觀此詩。知其庶幾能有進矣。特其言有體而無用。故吾爲是詩以箴之。庶其聞之而有發也。明年胡子卒。又四年。某始見欽夫。而後獲聞之。恨不及見胡子。而卒請其目也。因敘其本末而書之于策。以無忘胡子之意云。

胡

宏

宏字仁仲。文定仲子。幼事楊時侯仲良。卒傳其父之學。紹興中。以廕補右承務郎。卒。學者稱五峯先生。有集。

題上峯寺

百年身似客。浩蕩世閒遊。入望青山好。夢魂偏我留。我家巫山十二峯。浮江直過巴陵東。瀟湘水與蒼梧通。環遶衡嶽青冥中。扁舟白雲不可度。杖藜蠟屐乘春風。山光浮動可攬結。雲舒霞卷飛煙虹。深巖大壑翠巘巘。足力已到心無窮。羣峯迤邐勢不競。上盡祝融五千仞。祝融峯高天更高。太空人世如牛毛。風雲

萬變一瞬息。紅塵奔走真徒勞。

西林寺廓然堂有懷

超然峯頭秋氣清。廓然堂延秋月明。我乘清秋弄明月。中有所感思冥冥。峯勢凌蒼穹。上有煙林封去天。不盈尺。路斷心忡忡。虛名過耳如松風。以上五峯集。

李侗

侗字愿中。南劍州劍浦人。從羅仲素遊。學者稱延平先生。諡文靖。有語錄行世。

和靜菴山居

勝如城市宅。花木擁簷前。一雨曉來過。羣峯翠色鮮。採荆烹白石。接竹引清泉。車馬長無跡。逍遙樂葛天。
延平府志。

李繪

繪字參仲。號鐘山。婺源人。所著有論語西銘解義等書。朱子尊稱之。

曉步

曉步閑隨蛺蝶行。村南村北雨新晴。山花野草自幽意。布穀一聲春水生。
新安文獻志。

張元幹

元幹字仲宗。長樂人。向伯恭之甥。紹興中。坐送胡邦衡詞。得罪除名。有蘆川歸來集。

茗溪漁隱叢話。余宣和閒居泗上。于王周士處見張仲宗詩一卷。因備錄之。後三十年于錢唐。與仲宗同館。數初方識之。因戲謂仲宗曰。三十年前已識公于詩卷中。仲宗請余舉其詩。渠皆不能記。反從余求之。

夜宿宗公丈室。求詩甚勤。爲賦五字。

林表登層閣。秋聲聽暮鐘。鴉鳴苦竹寺。雨闇亂雲峯。屢乞留新句。重來訪舊蹤。松門罕車馬。似喜老夫逢。

次韻晁伯南飲彥達官舍心遠堂

今夕知何夕。眞成累十觴。爐薰飄月影。蜜炬剪花香。政嬾還詩債。無從發酒狂。故人憐久客。舞袖要須長。

以上蘆川歸來集

瀟湘圖

落日孤煙過洞庭。黃陵祠畔白蘋汀。欲知萬里蒼梧眼。淚盡君山一點青。

艇齋詩話

鄭汝諧

汝諧字舜舉。青田人。紹興中進士。官吏部侍郎。徽猷閣待制。致仕。有東谷集。

題盱眙第一山

忍恥包羞事北庭。奚奴得意管逢迎。燕山有石無人勒。卻向都梁記姓名。

齊東野語。南北通和時。聘使往來。旁午于道。凡過盱眙。例遊第一山。酌坡黎泉。題詩石

壁。以紀歲月。遂成故事。鐫刻題石幾滿。紹興癸丑。國信使鄭汝諧一詩。可謂知言矣。

題石門洞

每移征棹並雲根，便覺幽懷謝世喧。皓色飛來天際雪，紅塵不到水邊門。破荒康樂名猶在，紀勝元章字不存。但有好山容老子，何須更訪武陵源。括蒼彙紀

蘇雲卿

雲卿，廣漢人，與張魏公浚爲布衣交。紹興間，結廬南昌之東湖，灌園織屨自給。人稱曰蘇翁。浚爲相，訪知所在，馳書函金幣，屬洪州帥漕禮致之。翁力辭不可，期以詰朝上謁。比遣使迎之，則扃戶闔然，排闥入，則書幣不啟，家具如故，翁已遁矣。

還張德遠書幣題詩蔬圃壁間。

多年別作一番風，誰料聲名達帝聰。自有時人求富貴，莫將富貴汗蘇公。四朝詩

米友仁

友仁，一名尹仁，字元暉，自稱懶拙老人，襄陽人。芾之子。紹興中，擢工部侍郎，終敷文閣待制。

畫繼云：米友仁，元章之子。幼年山谷贈詩曰：我有元暉古印章，印刻不忍與諸郎。虎兒筆力能扛鼎，教字元暉繼阿章。遂字元暉。宣和中爲大名少尹，所作山水草草而成，不失天真風氣。每自題曰墨戲，被遇光堯，既貴甚自祕重，衆嘲之云：解作無根樹。

能描懣懣雲，如今供

御也，不肖與閑人。

題禊帖

圖契朴瑯推聖智，萬古奔沈餘末伎。蘭亭醉墨更無加，始信功名皆儻爾。庾翼兒郎豈不黠，自是家雞慙

野雉退之強聒六藝疎。見處纔能到姿媚。相公有官那得取。不與官家深自祕。卻因同好露心胸。謾使蕭郎誇末計。摸金不必曹阿瞞。温韜家有昭陵器。披沙只恐取黃金。剔軸誰能收故紙。天章寶塔高嵯峨。永表文皇好文藝。至今油蠟傳未休。善本何辭萬金棄。蘆浦筆記。

題定武本蘭亭

翰墨風流冠古今。鵝池誰不賞山陰。此詩雖向昭陵朽。刻石猶能直萬金。紹興十六年歲次丙寅。蠲拙翁米元暉在行朝天慶觀東私居之北窗跋。蘭亭續考。

自題大姚村圖

廣文當日官雖冷。可奈才名振世何。他日君家須炙手。而今聊復雀堪羅。老年尙喜管城子。更愛好山江上青。武林秋高曉欲雨。正若此畫雲冥冥。紹興戊午季春十一月。書于大姚五湖田舍。

自題山水

霄壤千千萬萬山。東南勝地熟躋攀。古人作語詠不得。我寓無聲縑楮閒。紹興己未。除守鄞郡。待次平江。寓居大姚村妹家戲作。

姚村妹家戲作。

寓意編按米氏襄陽人而宋史以爲吳人。觀海岳撰樂圃墓表云。予昔居郡與先生遊。今觀畫跋。則米老父子皆嘗居吳。故其女嫁大姚。其實非吳產也。

題董源夏山圖

崇山過新雨，蒼翠濃欲滴。林深不通人，溪迴有吟客。日落古道空，天青暮雲碧。何處一聲蟬，幽棲仍自得。

題自畫橫披與翟伯壽

司馬端衡

端衡、溫公後人，與米元暉同時。

題自畫杜詩意圖

潺潺石澗溜

峯迴石路轉，足可娛瞻聽。其中如有屋，便是醉翁亭。郁氏書畫題跋記。

吳芾

芾字明可，自號湖山居士。台州仙居人，紹興中進士，孝宗朝歷官禮部侍郎，終龍圖閣直學士。卒諡康肅，有湖山集。

見市上有賣海棠者，悵然有感。

連年蹤跡滯江鄉，長憶吾廬萬海棠。想得春來增絕麗，無因歸去賞芬芳。偶然擔上逢人賣，猶記樽前爲爾狂。何日故園修舊約，賸燒銀燭照紅妝。海棠譜。

和胡經仲卽事

世事憑誰論，羈懷只自諳。風煙悲蜀魄，桑柘老吳蠶。晚步惜殘照，春衫怯曉嵐。日來鞞鼓近，牢落愈無堪。
赤城詩集。

北望二首

延福池臺荆棘深，上皇無復更登臨。寂寥崇觀當年事，愁絕關河萬里心。
漠漠黃雲塞草稀，年年空說翠華歸。孤臣淚盡仍嘗膽，白首江湖雁北飛。
台州府志。

熊克

克字子復，建陽人。紹興進士，累除起居郎兼直學士院。

壽芮祕書三首

帝調玉燭召春還，仙袂同時度九關。萬品欲霑何處得，東風今起道家山。
歸來未對小延英，便向蓬萊作主人。要督仙宮讎玉籍，卻收衆妙入經綸。
册府都無未見書，毫端萬斛瀉明珠。若爲池上星辰履，謾與瀛洲作畫圖。
翰墨大全。

沈樞

樞字持要，一作持正，德清人。紹興閒登第，歷官太子詹事。

百福寺 孝豐縣東南。

築室最高處，軒窗八面通。鑿山流乳液，開戶納薰風。巾履隨涼設，茶瓜與客同。我來資解慍，不羨楚王雄。
湖州府志。

仲并

并字彌性，江都人。紹興中進士。歷光祿寺丞、淮東安撫司參議。有浮山集。

句

政恐崖州如有北，卻應未官受讒夫。

困學紀聞：仲彌性詠韋執誼不
看嶺南圖詩，誅姦諛之蕭斧也。

唐文若

文若，字立夫，眉山人。庚之子，第進士，仕至直敷文閣，知温州，遷中書舍人。孝宗朝，參贊張浚都督府軍事，卒。

登金山

江流出岷蜀，萬折東南傾。茲山若巨舫，勢欲扼滄溟。天高象教尊，海岳朝百靈。雲水渺四極，上下涵日星。朱薨倚霄漢，倒影魚龍驚。重遊十年舊，挂席鷗鳥驚。維揚魏公墓，回首劍戟明。行都望北固，鐵甕高崢嶸。孤舟繫煙月，六尺僧窗橫。印師支遠儔，靜對如風鈴。曠懷憐此翁，得法世慮平。塵勞霜鬢禿，風月冰壺清。乞詩寫崖壁，指月雙浮萍。金山志略。

陳世守

世守，字端厚，崑山人。

紹興壬申五月，臥病東禪之北窗，惟庭柯相對，手植綠橘枇杷，皆森然出屋，枇杷已著子，橘獨十年不花，各賦一詩。鶚按此首又見范成大集。

枇杷昔所嗜。不問甘與酸。黃泥裹餘核。散擲籬落閒。春風拆句萌。樸樾如榛菅。一株獨長成。蒼然盛屋山。去年小試花。瓏瓏犯冰寒。化成黃金彈。同登桃李盤。大鈞播羣物。斡流不作難。樹老人何堪。挽鏡覓朱顏。領銜爾許長。大笑敲巾冠。

綠橘生西山。得自髯翁家。云此接活根。是歲當著花。俛仰乃十霜。垂蠹紛相遮。芳意竟寂寞。枯枝謾槎牙。風土諒非宜。翁言豈余夸。會令反故山。高深謝污邪。石液滋舊根。山英擢新葩。黃團挂霜實。大如崆峒瓜。嘗有四老人。來駐七香車。岷山雜詠 鴨按二首又見范成大石湖集

宋詩紀事卷四十六

錢唐 厲鶚 緝

歙 洪振珂 勘定

周紫芝

紫芝字少隱，宣城人。紹興中登第，歷官樞密院編修右司，知興國軍，自號竹坡居士。有太倉稊米集及竹坡詩話。

方萬里跋：少隱嘗謂作詩先嚴格律，然後及句法，得此語於張文潛李端叔。

越臺曲

玉顏如花越王女，自小嬌癡不歌舞。嫁作江南國主妃，日日思歸淚如雨。江南江北梅子黃，潮頭夜漲秦淮江。江邊雨多地卑溼，旋築高臺勻曉粧。千艘命載越中土，喜見越人仍越語。人生腳踏鄉土難，無復歸心越中去。高臺何易傾，曲池亦復平。越姬一去向千載，不見此臺空有名。

方輿勝覽：在建康府縣西七里，今尉廳後。故老相傳云：昔越王女嫁於此，懷土思歸，故越王築臺以居之，慰其懷土之思。

秋蘭

藝蘭當九畹。蘭生香滿路。紉君身上衣。光明奪縑素。孤芳一衰歇。凋零溼秋露。佩服君子心。亦足慰遲暮。

弔洪氏女并兩侍兒

就死由來不自疑。玉顏那爲賊鋒低。了知今日投淵婦。猶勝當年斷臂妻。敵騎駸駸戰艦驕。春江漫漫溼金翹。但將紅袖供歌舞。卻爲周郎笑二喬。

梁溪漫志。中興死節之士固不乏。而女子守節者亦多有之。洪鴻父羽之女。適繁昌焦洧。一日遇巨盜於江中。欲逼之。女義不受。汗投江而死。兩侍兒大曰宜慰。小曰勻奴。姓吳氏。女兄弟也。俱有色藝。亦相隨赴水死。焦之甥徐伯遠傳其事。竹坡周少隱

爲之賦二

詩云云。

黃文若攜秦別駕侍兒像見過戲題二絕。

能事空傳王右丞。句如徐庾轉難名。明眸正似溪光樣。自古無人畫得成。謝家林下小梅花。不著紅藍染絳紗。莫笑畫師無國手。玉肌元不愛鉛華。

題錢少愚四畫

鴛浦

一點傷春恨。看成兩鬢霜。如今無此夢。莫畫兩鴛鴦。

釣雪

一作東吳去。回頭又十年。可憐江上雪。空落釣魚船。

蘭亭

事去空千載。何曾有若人。只應煙樹裏。便是水和春。

秋觀

雨足三湘岸。煙含七澤秋。可能無尺地。分得庾郎愁。以上太倉穉米集。

題淨空院

誰穿巨石貯清泉。不見超公舊講筵。龍伴白雲歸寶藏。魚隨流水下春田。咸淳臨安志。

元忠作胡人下程圖

單于獵罷臥錦紅。解鞍休騎荒磧中。蒼駒騶駱六十四。隱谷映坡分尾驥。九駝五牛羊頗倍。沙草晚牧生寒風。貴賤大小只五百。執作意態皆不同。二鷹在臂二鷹架。駿犬當對能爭功。氈廬鼎列帳幕擁。鼓角未吹驚塞鴻。上山高高置烽燧。毛囊貯獲閑刀弓。水泉在側挹其上。長河杳杳流無窮。素紈六幅筆何巧。胡瓌盡妙誰能通。今日都城有別識。別識共許劉元忠。

許貴州出蘇叔黨樹石

老坡騎鯨上天去。小坡落筆如風雨。能添老樹著巖閒。爲石傳神自翁語。兩坡俱死真可惜。君有一拳何處得。誰向九原呼此翁。爲我五日畫一石。以上聲畫集。

題湖上壁

寒食風埃滿客巾。西湖煙雨送愁頻。日高未起鳥呼夢。春晚不歸花笑人。前賢小集拾遺。

戲作小詩用少陵事

百尺寒松老幹枯，韋郎筆妙古今無。何如莫掃鵝溪絹，留取天吳紫鳳圖。

竹坡詩話：使少陵尙無

恙，當爲我一捧腹也。

句

設客元無琴裏曲，供官尙有篋中詩。

太倉稊米集云：東坡嘗言古今語，未有無對者。琴家謂琴聲能娛俗耳者爲設客曲。頃時有作送太守詩者，僕嘗問之，其人曰：此供官詩不足觀。于是設客曲乃始有對戲作俳體詩云。

關耆孫

耆孫，字壽卿，蜀人，紹興閒進士，官著作佐郎。

送劉朝美侍郎歸蜀

清議久不作，世無公是非。祗因翻故紙，不覺蹈危機。東壁夢初斷，西山巖正肥。十年成底事，贏得載書歸。

庚溪詩話：兵部侍郎劉朝美，儀鳳蜀之普州人，性酷嗜書，喜傳錄。初以禮部侍郎攝祕書少監，後卽眞。凡祕府書傳寫殆徧，如國史之類，又置副本，親自校讎。至杜門絕交，遷兵侍，猶傳寫不絕。張持國之綱爲副端，言其書辭至曠廢職事，以是罷歸蜀。關

壽卿以詩贈行，鷗按宋

史劉悵風傳亦載此事。

劉、憫

憫字寬夫。吉水人。沆孫。紹興進士官至待制。

青原臺在廬陵郡西射圍東南隅。

春臺百尺枕蕪城。傑檻層軒入紫清。坐嘯風雲生畫棟。劇談河漢瀉朱甍。山圍蘭若青螺遠。江帶蘋州白練橫。挂席會凌南斗去。羽人遼海看騎鯨。豫章詩話。

陳鵬飛

鵬飛字少南。永嘉人。紹興進士官太學博士。崇政殿說書。忤秦檜。謫居惠州卒。有羅浮集。

文獻通考陳氏曰秦檜子燿嘗從之游。在禮部時燿爲侍郎。文書不應令。鵬飛輒批還之。燿漫不平。鵬飛說書崇政殿。因論春秋母以子貴。言公羊非是。檜怒。謫惠州以歿。

贈邕管察推陳仲輔

幕下誰人識。呆之微聞贊畫向蓮池。登樓不恨鄉關遠。拄笏只言山色奇。直道自能消鬼魅。高人何處不軒羲。佗年坐上話銅狄。可是蓬萊清淺時。惠州府志。

唐仲友

仲友字與政。金華人。登紹興進士。復中宏詞科。累官知台州。爲同官高文虎譖于提刑劾罷。主管武夷冲道觀。有說齋集。

遊蓋竹山在台州臨海縣。

監輿東出初雨收。衆山捲霧奔蒼蚪。麥田幪幪連千疇。去年見種今有秋。農家椀大卽快活。使君不去能無羞。春光欲盡誰挽留。千林蕤蕤新綠柔。桐花遠近澹無色。自開自落那關愁。洞天爲我暫時霽。使我蠟屐窮冥搜。天門發秀萬馬下。水口離立羣峯稠。瀑泉對面瀉絕壁。寶劍卻倚丹鳳樓。溪聲噴薄雷震動。石色古怪神剜蝕。洞門豁豁風颭颭。香爐峯下蛟龍湫。中岑特秀小爲貴。左右旌節森戈矛。幾時祕奧一日睹。談笑指示君知不。精廬但欲占勝處。專事棟宇非良謀。飛閣跨水納佳氣。突兀殿堂居上頭。軒窗高下有奇致。洗滌肺腑明雙眸。我將于此棲羽流。鳳笙鶴駕應來遊。丹成一舉凌九州。下視濁世如浮漚。靈祠款謁路阻脩。層巖傾澗邃且幽。經營輪奐亦未就。揮金爾助何須求。晚雲漠漠鳴雨鳩。僕痛泥滑吾欲休。虹橋列炬趣歸騎。城鼓已報初更籌。追攀別乘聊復爾。乘興何如王子猷。習池不爲倒載去。兒童不用拍手攔街謳。赤城志

折彥質

彥質字中古。雲中人。涇原帥可適之子。紹興閒。官樞密使。爲趙鼎所薦。秦檜指爲黨。謫昌化軍。後移郴州復官。

過太平州拜李端叔遺像

東來遂數月。弛擔已渺茫。猶喜當患身。獲登先生堂。肅衣拜遺像。依然雙頰光。宛若侍坐側。妙語發天藏。厄窮出天意。人理難度量。所幸言不朽。與世爲文章。齋此復何恨。私淑良不忘。小郎出見我。問知雛鳳凰。他年起門戶。塵滓濯秋陽。世事幾變滅。人生眞黃梁。置之不足道。感慨涕淚滂。我行方有程。墳山空相望。

跋浯溪造極圖

浯溪未到已登臨，筆力能窮造化心。我是零陵新逐客，披圖一一可追尋。

跋湘西清絕圖

與山分淺正傷神，蠟屐明朝陌上塵。誰寫湘西清絕景，巧移林壑慰行人。以上壁畫集。

湘山

寓久渾忘客，臨行似別家。途窮身更怯，秋老鬢先華。生計黃茅合，歸期碧海賒。湘山今夜雨，留我意無涯。
桂林府志。

超然亭

超然亭上鬢毛斑，浩蕩秋風小立閒。豈爲詩情堪過海，祇緣脚力要尋山。峭峯斷續天容缺，高壘縈紆地勢慳。回首不堪東北望，桂林萬里是秦關。粵西詩載。

謝許君瑤

東坡遺物來歸我，兩手摩挲思不窮。舉取吾家阿堵物，愧無青玉案酬公。

廣東通志，東坡移廉州，以茶盃惠許君

瑤，後爲折樞密所得，有詩謝許云云。

何耕

耕字道夫，紹興中守蜀之嘉州，有惠政，與何逢原、孫松壽、宋誨號四循良，民繪像祀之。

青羊宮 按趙閱道成都記。載宮乃老子乘青羊降其地。今有臺存焉。

一再官錦城。咫尺望琳宮。未始得得來。正墮役役中。今朝弄晴雨。策蹇隨春風。頗愛意象古。停驂小從容。縹緲百尺臺。突起凌半空。憑闌俯脩竹。決眚明孤鴻。信哉神仙宅。不受塵垢蒙。稽首五千言。衆妙一以通。靜觀萬物復。豈假九轉功。區區立訓詁。亦晒河上公。癡人慕羽化。心外求鴻濛。要騎白鶴背。往訪青羊蹤。

題龍華佛閣

西川鑿山三大像。突兀皆在江之湄。脩覺九頂見略盡。獨此恨未瞻容儀。竭來勝地了疇昔。輕軒瘦馬相追隨。百尺金軀信雄傑。三乘寶閣何瑰奇。燃犀不用照幽鬼。擊鼓自合趨馮夷。前人開創願力廣。下與舟楫扶傾危。六月灘濤劇奔吼。一分性命爭毫釐。篙工落膽行者泣。彈指乞活天人師。人心狎水水多禍。佛力在人人不知。慈悲但作布施想。江神雖怒將何爲。

普通山距府東十數里。青州禪師洪杲道場也。自龍華歸過之。棟宇頽落。僧徒鄙野。良爲可惜。是夜雨大作。因書所聞所見爲長韻。

錦城之東山培塿。突起伽藍壓山口。入門氣象頗不凡。在昔規模定非苟。黃絹碑詞著眼看。青州老衲知名久。自披榛徑結茅屋。不翦霜華散蓬首。市門有女捧巾盥。衣絨無花生穢垢。至今一轉鵲鴿語。散作諸方獅子吼。祖燈寂寞何人繼。宰堵岩嶢惟鬼守。法席草長深沒膝。僧榻屋穿光見斗。似聞占籍多衍沃。合選名緇振頽朽。我來不覺三歎息。眼底盡空諸所有。自開庵席掃塵坌。聊寄閑眠憩奔走。夢回中夜雨鳴檐。臥聽東風寒入牖。明朝散步轉山脊。好語相呼聞野叟。抽芒已見麥翻浪。擣麩懸知香滿手。須臾日影

散林樾。絢練春光被花柳。僕夫催歸屢不應。景物殊佳寧忍負。出山騎馬更躊躇。乘暇應須重載酒。以上成都文類

李 彙

彙、紹興中添差台州通判。

游九鎖山

何人能識洞中天。勝地興從漢武年。石作雙門標俗駕。路爲九鎖折溪泉。四山松檜相迴合。五洞煙霞暗接連。浮世功名何日已。挂冠來結此山緣。洞霄詩集

鄭昌齡

昌齡、紹興中太府寺主簿。

李忠定公挽詩

炎圖第一相蕭公。王謝風流愧下風。力正君臣先僞楚。不將金帛問和戎。輸忠自昔忘夷險。注意如今見始終。駐馬佳城天莫問。寒空慘淡沒孤鴻。梁溪集附

吳 岡

岡、紹興中閩縣尉。

李忠定公挽詩

夢卜庸真相。艱難倚大儒。英風起衰懦。直氣懾姦諛。琳館終高臥。燕然漫壯圖。哀榮看贈典。猶足慰寰區。

頓起

起汝南人紹興中提點西川刑獄

贈成都寓舍賢婦二喻詩

嘗聞趙清獻。恤孤慰亡友。至今西蜀人。談美不容口。二喻出儒家。清貧一無有。零丁依老母。破屋僧堂後。相對誦詩書。未嘗窺戶牖。圭折玉彌方。山寒松更茂。縣宰初聞名。咨嗟爲之久。從容語其配。夫人曾見否。長者二十三。次亦十八九。青裾長蔽膝。荆簪短在首。我欲效清獻。言不爲人取。近於吾邑中。選壻得豪右。夫人相宰意。魚蔬薦尊酒。屈致二喻來。呼名老與壽。長曰安詩次曰安老女子當有行。詩稱遠父母。飢寒日月長。蓬華風雨漏。大喻前致詞。灑淚溼衣袖。荷德固已深。緘情亦須剖。上言親未葬。心欲土自負。下述妹未笄。婢媵無傅姆。還家復獻書。自敝貧且陋。鉛華世所悅。銅臭非吾偶。官效閭閻閒。碌碌逐雞狗。世無梁伯鸞。應嫌孟光醜。孔明若再生。承女甘箕帚。陳義一何高。夫人驚拊手。至今書稿在。光輝射星斗。董子慕高風。喜曰真吾婦。吾親雙白髮。吾弟室未授。矐言姊妹賢。可以相先後。五兩幣雖輕。意則千金厚。輜軒雙造門。觀者競奔走。女子尙能爾。男兒宜自守。重聘或不來。豈欲終畝畝。畜德尙未充。高位亦虛受。寄語事君者。慎勿輕去就。成都文類

范浚

浚字茂明。蘭溪人。紹興閒。舉賢良方正。以秦檜當國不起。學者稱曰香溪先生。有集。

讀長門賦

阿嬌負恃顏姝好。那知漢帝恩難保。一朝秋水落芙蓉。幾歲長門閉春草。自憐長世等前魚。舊寵全移衛子夫。獨夜不眠香草枕。東箱斜月上金鋪。曉驚永巷車音近。失喜疑君枉瑤軫。臨風望幸立多時。卻是輕雷聲隱隱。年年織女會牽牛。百子池邊侍宴遊。自從一落離宮後。無復穿鍼更上樓。

凌霄花

栽松待成陰。種漆擬作器。人皆笑艱拙。往往得後利。君看植凌霄。百尺蔓柔翠。新花鬱煌煌。照日吐妍媚。風霜忽搖落。大木亦凋瘁。視爾託根生。枯莖無殘蒂。先榮疾蕭瑟。物理固難恃。凌霄亟芳華。衰歇亦容易。以上香溪集。

馬純

純字子約。自號樸櫟翁。默之孫。紹興中。爲江西漕。隆興初。以太中大夫致仕。居越之陶朱鄉。有陶

朱新錄

題能仁寺壁

十年衰病臥林泉。鷓鴣羣飛競刺天。黃紙除書猶到汝。固知清世不遺賢。

會稽志。僧宗昂住會稽能仁寺。有故相寓寺中。已而復相。宗昂被敕住持。即官馬子約題詩法堂壁。

呂愿中

愿中字叔恭。紹興中知靜江府。

宋史秦檜傳。靜江府驛名秦城。愿中率

實僚賦秦城王氣詩。檜楡由此得召。

郡守呂叔恭以甲戌季春七日游中隱巖。山水膏肓之興未已。後兩日再拉機宜劉子思。監州朱國輔。經屬陳朝彥。同至新洞。所見愈奇。真所謂倒餐甘蔗。聊書五十六字。

爽垲虛明小洞天。巉巖垂乳類鋒鋷。薰風習習來三面。夏雨蕭蕭欠一檐。指顧羣山勞應接。徘徊歸騎縱觀瞻。門前綠水泓澄淨。底處應須是谷簾。桂勝

蔣璨

璨字宣卿。宜興人之奇從子。紹興中以集賢殿修撰知蘇州。除敷文閣待制。提舉洪州玉隆宮。冲寂觀。去南莊數里。肇建於有唐。逮今數百年。中閒衰弊。吾家曾祖太傅公爲司出納。且主盟興起之。相繼累世不墜。兵火之後。殿宇久廢弗理。房舍荒寂。璨今再至。不勝感歎。故作二詩。紹興甲子季秋某拜呈。

兔井橋邊鷓首橫。過逢仍怯近鄉情。路人失喜交頭語。鄰犬何知掉尾迎。重到雲房驚落寞。直須金闕早崇成。百年香火追先志。始信吾宗世濟榮。

慣見琳宮全盛時。榻來荒梗倍傷悽。虛堂不復瞻遺蹟。自注。先考通奉書壁在八蔣院。今不復存。敗壁纔容覓舊題。自注。伯考樞密太師題三史院。僅留數字。帝傅前修皆築礎。雲孫後裔合攀躋。興衰補弊應商略。徙倚脩廊日

欲西。式古堂書考。

丁 宣一作卜

宣字宗旦。延陵人。紹興中。處州通判。

仙都山

世上洞天三十六。縉雲第二十九區。古木參天駕雲屋。總眞靈跡號仙都。獨峯壁立三千尺。凌空聳翠屹然孤。仰瞻絕頂煙嵐際。曾開菡萏名鼎湖。舊說軒轅駐車轍。雲輶風馭經此涂。石釜烹煉丹砂就。乘龍帝鄉在須臾。紫虛碧落超塵世。侍臣無路攀龍鬚。唐朝天子仙李裔。德格天心來瑞符。祥煙嘉氣慶雲布。山中九轉萬歲呼。步虛一作欄對峙雲斷續。東西互竦高下殊。澗邊幽徑登鳥道。上有鏡巖如方壺。崖中乳水瀝嵌罅。滴水成穴如仰盂。水一晝夜斛加半。潦不泛溢旱不枯。魯望曾記周景復。絕粒餐霞黃老徒。棲真妙入懸珠會。八十年餘隱此居。千古寥寥桑海變。仙跡縹緲還有無。石門瀑布雖云好。此閒殊甚未易居。特然造化鍾神秀。虎頭妙手亦難圖。仙都山志

胡 升

升字子上。括蒼人。紹興閒。官湖北提舉。

仙都山

鼎湖不可見。巍然但孤峯。特立亘萬古。氣壓諸山雄。黃帝久得仙。游行跨飛龍。至今世俗傳。尙指輦路通。頗如昇天檜。追求白鹿蹤。常言貴荒唐。厥見眞兒童。願惟此山奇。實宜仙所宮。水聲來冷風。和以萬本松。

客枕久未穩。笙簫滿虛空。頗疑九成音。不在二典中。但恐蚩尤旗。曄曄舒長虹。雖能獨不死。忍視斯民窮。君看涿鹿戰。萬古蒙其功。鼎湖何足道。帝德彌蒼穹。仙都山志

程元祐

贈朱童子虎臣浮梁人。年九歲。紹興閒武殿試。十二矢中九的。講孫子兵法。諸葛八陣圖。賜金帶武狀元。補承信郎。

我聞汪錡生列國。能執干戈衛社稷。孺子可教緊復誰。張良授書爲帝師。寥寥厥後不復繼。棘門老將反。兒戲邇來忽得朱虎臣。九歲知兵及古人。僕姑十上九破的。玉帳七書咸誦臆。壘石布作常山蛇。指陳八陣橫復斜。天姿安勇亞二子。腦脂壯士應羞死。虎生三月定欺牛。勿謂渠小將何求。志在奇功平禍亂。自許多多口益辦。欲造天關試所長。中興君相正明良。拔萃爲將上不惜。好獎此郎明勸激。凌烈九歲初無謀。猶呼虎子封亭侯。觀君頭領合食肉。膽大于軀早驚俗。皇家祐武喜逢時。洗眼行看得意時。饒州府志

張表臣

表臣字正民。右承議郎。通判常州。與晁以道遊。紹興中爲司農丞。有珊瑚鉤詩話。

觀高郵寺壁曹仁熙畫水

曹生畫手信有神。豪端風雨生齋云。波濤不合來翻屋。蛟鱗何須欲噬人。湯湯此水勢方割。陽侯鬱怒馮夷搏。鼉榔鯨吐海岳驚。霧塞雲昏光景薄。開元將軍愛驩駟。權奇滅沒隘九州。時危此物豈易得。寫此尙可銷人憂。末有乃孫能畫水。逋客見之心欲死。雷奔電擊走中原。魚怖龍愁寧忍視。先生道眼高崑崙。聊將妙語破迷津。中流險絕待舟楫。四海浩蕩須經綸。我衰甘作淮海客。身脫垂涎頭雪白。驚心未定畏崩

滯欲覓平波。泛家宅。此身端的老江湖。雨笠煙蓑是所圖。他年但飽揚州米。今日寧論璧社珠。珊瑚鈎詩話

題睢陽雙廟

漁陽突騎滿關東。百戰孤城挫賊鋒。唐室興亡繫公等。九原可作更誰從。

珊瑚鈎詩話。睢陽雙廟。俗謂之五侯廟。蓋南雷賈與同功皆受封爵。亦作其像于

廊廡耳。古今歌詠。唯王荆公黃豫章爲警策。予官宋城。題詩。自以爲無媿前人。

聽琵琶

白鷓潛來入紫槽。朱鸞飛去唳青霄。江邊塞上情何限。瀛府霓裳曲再調。謾道靈妃鼓瑤瑟。虛傳仙子弄雲璈。小憐破得春風恨。何似今宵月正高。

珊瑚鈎詩話。客有獻李衛公以古木者。云有異。公命剖之。作琵琶槽。其文自然成白鷓。予嘗語晁次膺曰。公綠頭鴨琵琶詞。誠妙絕。蓋自曉風殘月之後。始有移船出塞之曲。然某亦曾有一詩云。公曰。詩亦不惡。

和陳叔易就晁以道求長松

暫隱嵩高六六峯。未乘雲氣御飛龍。自餐白石求黃石。更採長松寄赤松。

句

碧藕連根絲不斷。紅蕖著子意何多。山塘莫車水。梅雨正分龍。婺州道中珊瑚鈎詩話

鄭望之

望之字願道。彭城人。官吏部侍郎。僑居上饒。

揮塵後錄。舅氏曾宏父。生長綺紈。而風流醜藉。聞于搢紳。長于歌詩。膾炙人口。紹興中守黃州。有雙鬢小鬟者。頗慧黠。宏父令誦東坡先生赤壁前後二賦。客至代謳。人多稱之。後歸上饒。時鄭顧道呂居仁晁恭道俱爲寓客。日夕往來。顧道教其小鬟亦爲此技。宏父顧鄭笑曰。此真所謂效顰也。

除夕

可是今年老也無。兒孫次第飲屠蘇。一門骨肉知多少。日出高時到老夫。

清波雜志。鄭顧道侍耶居上饒享

高壽。嘗見其除夕小詩親筆云。

何備

備字德揚。龍泉人。紹興甲科。爲吏部郎官。除福建提舉。有玉雪堂小集。

王文孺臞菴

多羨王居士。心閑事事幽。山從天末見。江近枕邊流。春圃千葩秀。霜林百果收。更能窮物理。濠上看魚游。柳外長虹臥。江邊小市圓。水搖千嶂影。窗納五湖天。隔岸誰家圃。開帆何處船。非關臺榭好。此地最堪憐。
吳郡志

蒙與義

王文孺臞菴

一鳥風潭水四圍。軒多窺窕更幽奇。眼中泉石論溪買。行處壺觴逐境移。勸馬虺隤前日路。寒松偃蹇舊

年枝自嗟老去殊癡絕。一月春愁廢作詩。吳郡志。

李彌正

彌正、連江人。彌遜之弟。官吏部郎兼史館。

王文孺懼菴和祝鑑韻

勞車發危坂。勸艘失飛湍。滔滔襍穢子。疾走殊未闌。鶴仙擺名宦。結廬松江干。笑拍萍風浮。瞬視草露溥。圖川不媿輞。序谷寧先盤。門豈俗駕拒。室無哀箏彈。按行松菊閒。澹然有餘歡。蓮巢衆香聚。浮天百憂寬。秋光斂洲渚。暮翠籠峯巒。我來挾良朋。道故盟未寒。鍊顏仰孤標。耐久同蒼官。終當役薪水。刀圭卻衰殘。吳郡志。

徐作

王文孺懼菴

藜藿幽人室。丘園隱者居。一原青嶂合。萬木綠陰疎。手把歸田賦。腰懸種樹書。桑麻連畛秀。網罟入溪漁。吳郡志。

程敦厚

敦厚、字子山。眉山人。紹興閒。官中書舍人。附檜坐謫。

朝野遺記。程子山爲中舍時。秦檜善之。一日呼入內閣。坐候終日。獨案上有紫綾牒一冊。書聖人以日星爲紀賦。未有類實進士學生秦墳呈文采豔麗。子山兀坐靜觀。幾成誦。及晚竟不出。乃退。子山叵測也。又數日。差知貢舉。乃大悟。以此命題。乃孫果

首選

王文儒罷菴

壁上煙蘿子。窗前鴻素書。短籬開窈窕。嫩竹轉扶疎。世事霜前葉。聲名澗底樗。柴桑陶靖節。日暮荷歸鉏。
吳郡志。

惜海棠開晚

今年春色可勝嗟。二月山中未見花。長憶去年今夜月。海棠花影到窗紗。
海棠譜。

題陳閔中畫明皇太真聯轡圖

並轡春風禁禦遊。外閒底事上心頭。騎驢後日嘉陵道。料得君王始欲愁。
高似孫緯略。

曾惇

惇字宏父。紆之子。紹興中守台州黃州。有詩集。

獻秦益公絕句

紹興壬戌。既罷三大將議和。曾守黃州作。

黃泥坂下雪猶深。赤壁磯頭江欲平。驛吏西來聞好語。番人已出蔡州城。
和戎詔下破羣疑。無復旋頭彗紫微。屈指銷兵宜有報。先看長樂板輿歸。
能改齋漫錄。

題東湖

三年領客醉東湖。欲去猶攜竹裏廚。誰解挽留狂太守。風荷十頃翠相扶。
赤城志。

龍溪新亭

懷玉知名寺。諸峯翠插天。凌雲飛略約。照水舞蜿蜒。午日孤穿履。新涼定著鞭。更須煩惠遠。小立虎溪邊。
廣信府志。

向瀆

瀆字豐之。紹興閒。爲萍鄉令。有樂齋詞。

莞爾堂夏日偶成

槐影參差日轉廊。時看野鳥下橫塘。閑窗綠映篔簹淨。流水紅浮菡萏香。座有琴觴眞道院。徑通花木似禪房。文楸珍篋珠簾裏。與子同消夏日長。
袁州府志。

陳仲平

仲平。紹興中。知瓊州軍。

吏隱堂

在瓊州城北隅。仲平建。李光命名。

海山地僻少迎將。心逸身閑白日長。儘欲吟哦追沈謝。不求名迹擬龔黃。旋移泉石成雲壑。時引笙歌入醉鄉。吏散簾垂公事省。清風一榻傲羲皇。
廣東通志。

葉黯

黯字晦叔。嘗除敕令所刪定官。紹興中。爲福建帥屬。

和洪容齋鎖院作

文章萬言抵杯水。世上虛名徒爾耳。我常自笑一生癡。那更將癡笑羣子。大屋沈沈餘百年。到今所閱知幾士。看渠得失自偶然。其閒悲喜從何起。君聞我言亦大笑。爲說萬事總如此。缺兩句急須了卻公家事。門外不知春有幾。缺三句飛雨時聞打窗紙。他年萬一復相從。未必從容今日似。

送容齋自福倅滿歸

一門伯仲知誰似。四海文章正數君。何事與予如舊識。由來于世兩相聞。閑官各喜光陰賸。勝地空多物色分。忽復翻然從此去。便應變化上青雲。

此地相從驚歲晚。登臨況是客歸時。卻將襟抱向誰可。正爾艱難唯子知。情到中年工作惡。別于生世易爲悲。梅花盡醉清江上。黯澹西風凍雨垂。以上容齋三筆

張 昌

昌字師言。紹興中以參知政事出知潭州。

遊真源宮

漠漠山雲閣雨。離離澗草搖風。看處行穿空翠。不妨小駐孤筇。木末輕風索索。雲邊小雨斑斑。行盡丹霞林樾。皖山下看灣山。宋藝圃集

郭 浩

浩字充道。順德軍中安堡人。涇原鈐轄成之子。充渭州兵馬都監。紹興中。歷金房開達州經略安撫使。樞密院都統制。卒。贈檢校少師。諡恭毅。

撫使樞密院都統制。卒。贈檢校少師。諡恭毅。

隴口作

隴口山深草木荒，行人到此斷肝腸。耳中不忍聽鸚鵡，猶在枝頭說上皇。

蓉塘詩話：建炎筆錄云：浩按邊至隴口，見紅白二鸚鵡鳴于樹間，問上皇安否，浩詰其因，蓋隴州歲貢鸚鵡，徽宗置在安妃閣，教以詩文，及宣和未，使人發還本土，二鳥猶感恩不忘，浩因賦詩。

陳煥

煥字少微，博羅人，紹興中特科，調高要簿。

梅花

雲裏溪橋獨樹春，客來驚起曉妝勻。試從意外看風味，方信留侯似婦人。肇慶府志。

李若川

若川字子至，紹興中江南東路轉運判官，乾道初以吏部尚書使金。

途中阻雨

高雲無急雨，飛灑如絲輕。幽人動羈思，冒雨登歸程。風來曉煙亂，雲破春山明。眷言憩荒館，我懷有餘情。壺中載濁酒，飲罷還自傾。酒盡興不盡，關關山鳥鳴。

理舟

爲客始逾月，迢迢若經年。晝永空館寂，古木參雲煙。我生聞道淺，未能超世緣。念此方寸地，憂來相縈纏。今晨動幽興，沙岸泊歸船。岸遠望不極，歸思隨長川。

村社歌

清曉鞦韆鳴社鼓。前村後村走兒女。田家釀錢共賽神。謝神時晴復時雨。案有肴酒爐有香。老巫禱祝躬案傍。願得年年被神福。秋宜稻穀春宜桑。人淳禮簡酒無數。歌笑喧闐日將暮。田翁敲側醉歸來。山頭明月山前路。以上前賢小集拾遺。

司馬伋

伋字季思。紹興中官處州通判。淳熙中以敷文閣待制守蘇州。

老學庵筆記。紹興末。謝景思守括蒼。司馬季思佐之。皆名伋。劉季高以書與景思曰。公作守司馬九作倅。想郡事皆如律令也。聞者絕倒。

點易亭在舊治南園

洞天占勝作新亭。曲檻危簷揖翠屏。四顧風煙入懷袖。一灣溪水抱沙汀。羽人不見論平昔。雙鶴猶存舊典型。幸得官閑成吏隱。何妨續說舊義經。處州府志。

送汪尚書大猷歸對

憶昔銓衡地。爲郎得並遊。惟公合明陟。顧我分夷猶。功業行將遂。軒車去莫留。洞庭固誠請。帝眷益綢繆。日者真奇中。春風畫鷁行。東山須繼起。南浦獨傷情。越岸江山麗。都門祖道榮。里閭高臥際。趣詔逐追程。寧波府志。

克字子高。臨海人。紹興中爲敕令所刪定官。自號赤城居士。僑居金陵。有天台集。

李庚跋云。刪定余鄉人。

也。詩多情致詞尤工。

三朝北盟會編。紹興七年。命呂祉節制淮西軍馬。辟陳克子高爲參謀。子高欣然應其辟。冀夢得曰。呂安老非取將之才。子高詩人。非國士也。勸止之。不從。夢得贈以詩曰。解談孫破虜。那厭羽征西。克留其家。以單騎從軍。後虜瓊之變。終于不免。

代王正平從諫掾乞畫凭肩美人扇子二首

道人已悟孩提事。棄擲泥兒壞紙鳶。聞道近來都識破。丹青便面亦輕捐。
難陀已幻登伽女。童子猶參蘇密多。正士逡巡不應受。可能分供病維摩。

跋趙朝議江行初雪圖

我本孤舟蓑笠翁。雪崖烟樹一生中。如今不向江湖去。鬪艦旌旗照水紅。

謝曹中甫惠著色山水抹胸

曹郎富天巧。發思綺紈閒。規模寶月團。淺淡分眉山。丹青綴錦樹。金碧羅烟鬢。爐峯香自湧。楚客杳難攀。
政宜林下風。妙想非人寰。飄蕭河官步。羅抹陵九關。我家老孟光。刻畫非妖嫵。繡鳳褐顛倒。錦鯨乘棹營。
忍將漫汗澤。敗此脩連娟。緘藏寄書篆。曉夢生爛斑。

曹夫人牧羊圖

日長永巷車音細。插竹灑鹽紛妒恃。美人零落涇水寒。雨鬢風鬢一揮淚。柔毛鱗鱗與人羣。兒女恩怨徒

紛紛洞房那復知許事。但畫遠牧連空雲。柳葉飄蕭晚風勁。殺攏相追寒鵲並。短童何處沙草深。族走羣飛各天性。向來鞍馬曹將軍。文采斑斑今尙存。林下美人更超絕。新圖不作五花文。以上聲畫集

瑞香

佳人在空谷。雙星思銀河。契闊不自命。盛時豈蹉跎。娟娟匡廬秀。如此粲者何。幽窗下團圞。微風自婆娑。寂寥千載初。戢戢蓬艾多。何階計方便。千金聘綺羅。赤闌青篋舫。丁寧護根窠。泥沙亦天幸。扳聯入宣和。誰令蘭蕙徒。憔悴守巖阿。茗溪漁隱叢話

陽羨春歌

石亭梅花落如積。吐絨爛斑竹茹赤。祝陵有酒清若空。煮稗蒸魚作寒食。長橋新晴好天氣。兩市兒郎擢船戲。溪頭饒鼓狂殺儂。青蓋紅裙偶相值。風光何處最可憐。邵家高樓白日邊。樓下遊人顏色喜。溪南黃帽應羞死。三月未有二月殘。靈龜可信滄水乾。葑草青青促歸去。短簫橫笛說明年。咸淳毗陵志

返魂梅次蘇藉韻

誰道春歸無覓處。眠齋香霧作春昏。君詩似說江南信。試與梅花招斷魂。老夫粥後惟耽睡。灰暖香濃百念消。不學朱門貴公子。鴨爐烟裏逞風標。漫道君家四壁空。衣篝沈水晚朦朧。詩情似被花相惱。入我香奩境界中。香乘

句

淚眼生憎好天氣。雖腸偏觸病心情。贈別

許彥周詩話韓偓溫
庭筠未嘗措意及此

鳥聲妨客夢。花片攪春心。西溪叢話。

臨春結綺今何在。屹立巉巉終不改。可憐江總負君恩。白頭仍作北朝臣。三品石 昔溪漁隱叢話。

姚寬

寬字令威。宏弟。嵯人以父舜明任補官。權尚書戶部員外郎。樞密院編修官。有西溪集。

春晴

風雨惜春殘。新晴爲啓關。白雲歸去盡。還我舊青山。後村千家詩。

春暮送碧雲閣黎歸靈巖

歸意太恩恩。逢春去住中。澹香花溼雨。薄影絮行風。覓句愁何許。談元學未窮。因緣知有處。祗莫恨飄蓬。
詩林萬選。

天台夜雨

瘴海遠黏天。山城入暝煙。春潮生蛤蜊。夜雨長蝸涎。燈几花時落。風簾客未眠。平生懷此地。今夕意茫然。
天台山志。

古博嶺在越城西。

北風獵獵駕寒雲。低壓平川路欲昏。人馬忽驚俱辟易。一聲乳虎下前村。

宿大雄寺在諸暨縣

解榻無凝塵。雲房愜幽素。清寒薄衾枕。微涼散庭戶。夢彼流水聲。鉤簾捲山霧。時與靜者俱。爲擬湯休句。
以上紹興府志。

姚宏

宏字令聲。剡人。舜明子。宣和。中在上庠。南渡後。初任監杭州稅。調知衢州江山縣。秦檜以宿怨。追赴大理而死。

夢筆驛江淹舊居

一宵短夢驚流俗。千載高名挂里閭。遂使晚生矜此意。癡眠不讀半行書。

庚溪詩話云。
可警後學。

錢端禮

端禮字處和。臨安人。徙台之臨海。惟演四世孫。少師忱之子。以恩補官。孝宗朝。累除參知政事兼權知樞密院事。出知紹興府。卒諡忠肅。

題米元暉瀟湘圖

畫手自高前輩。雲山已屬吾曹。若會瀟湘物色。便合醉讀離騷。
郁氏書畫題跋記。

劉岑

岑字季高吳興人高宗朝官徽猷閣待制嘗知鎮江

皇宋書錄劉公能書縱逸而不拘舊法蓋有自得之趣有婆嚩齋號柯山

齊東野語紹興以來文散階皆有左右字以別有無出身惟嘗犯臧者則去之劉季高得罪秦氏坐臧廢後復去其左字季高署銜不以爲媿也

貞女祠

貞女已云遠芳名聞至今烟波瀨江上松柏古祠深暮色留殘照悲風動遠林謫仙文不死讀罷爲霑襟

貞烈集

李茂之

茂之邵武人忠定公綱之子自稱蕭然羈客

侍家君詣洞霄宮道出天竺山紀興

九里松陰路三天竺國山日蒸巖霧紫花點石苔斑谿盡寺方到雲深僧獨還吟行隨杖履蹤跡出人閒

天竺寺志

劉韞

韞字仲固幹之弟以門蔭入仕

建寧府志仲固歷倅三州典二郡歸隱于崇安縣南所居有家山堂拙致堂昉齋仙人方丈龜峯樓月波臺積芳園藥圃春谷香界晚蔬秋香徑曲池軒前村秀野朱晦翁爲作十五詠以紀其勝

場南寺

曉起陰霾喜絕收。急忙扶酒爲春留。落花千點野亭寂。啼鳥一聲春事幽。施食臺高禽易啄。長明燈暗鼠潛偷。山僧摘茗吹茶竈。留客殷勤學趙州。建寧府志。

劉子翬

子翬字彥沖。號病翁。崇安人。幹季子。以蔭補承務郎。除通判興化軍。尋以宿疾辭歸。與胡憲、劉勉之講學。學者稱爲屏山先生。有集。

吳傅朋游絲書歌

圓清無瑕二三月。時見游絲轉空闊。誰人寫此一段奇。著紙春風吹不脫。紛紜糾結疑非書。安得龍蛇如許耀。神蹤政喜縈不斷。老眼只愁看若無。定知苗裔出飛白。古人妙處君潛得。勿輕漠漠一縷浮。力適可挂千鈞石。眷子弟兄情不忘。軸之遠寄悠然堂。謝公遺髯凜若活。衛后落鬢搖人光。翻思長安夜飛蓋。醉哦聲落南山外。亂離契闊四十秋。筆意與人俱老大。政成著腳明河津。外家風流今絕倫。文章固自有機杼。戲事豈足勞心神。

容齋三筆。吳傅朋游絲書。賦詩者以百數。劉彥沖古風

一篇。尤爲馳聘痛快。且卒章含譏諷。正中傅朋之辭。

聞箏

月高夜鳴箏。聲從綺窗來。隨風更迢遞。縈雲暫徘徊。餘音若可玩。繁弦互相催。不見理箏人。遙知心所懷。

寧悲舊寵棄。豈念新时期。含情鬱不發。寄曲宣餘哀。一彈飛霜零。再撫流光頽。每恨聽者稀。銀甲生浮埃。幽幽孤鳳吟。衆鳥聲難諧。盛年嗟不偶。況乃容華衰。道同符片諾。志異勞事媒。棲棲牆東客。亦抱凌雲才。

遊朱劭園

晨暉麗丹極。翼翼侔帝居。向來堂上人。零落烟海隅。聯翩際時會。振跡皆刑餘。閨帷尙帝主。卓隸乘軒車。流威被東南。生殺在指呼。樓船載花石。里巷無袴襦。至今江左地。風雲亦嗟吁。叨榮已過量。受禍如償逋。荒涼戟門路。尙想冠蓋趨。客船維岸柳。鄰人罾池魚。徘徊極幽觀。曲折迷歸途。夜月扃綺戶。春風散羅裾。繁華能幾時。喪亂實感予。曹鄴予何譏。此曹真人奴。

汴京紀事

空嗟覆鼎誤前朝。骨朽人閒罵未消。夜月池臺王傅宅。春風楊柳相公橋。鷓鴣清香步障遮。並桃冠子玉簪斜。一時風物堪魂斷。機女猶挑韻字紗。萬炬銀花錦繡圍。景龍門外輦紅飛。淒涼但有雲頭月。曾照當時步輦歸。橋上遊人度鏡光。五花殿裏奏笙簧。日曛未放龍舟泊。中使傳宣趣郗王。盤石曾聞受國封。承恩不與侔臣同。時危運作高城礮。猶解捐軀立戰功。梁園歌舞足風流。美酒如刀解斷愁。憶得少年多樂事。夜深燈火上樊樓。倉黃禁陌夜飛戈。南去人稀北去多。自古胡沙埋皓齒。不堪重唱蓬上聲蓬歌。輦轂繁華事可傷。師師垂老過湖湘。縷衣檀板無顏色。一曲當年動帝王。

瀛臺律體云
不減唐人

題胡原仙山居

寂寂臨湖屋。湖風爲掩門。鳥聲幽谷樹。山影夕陽村。好事長留客。雖貧亦置尊。平生枯淡意。出此有誰論。

泊舟

莽莽荒茨岸。回回亂石灘。雨寒收市早。風急泊舟難。寓縣兵猶鬪。乾坤網正寬。殷勤囑龍劍。莫久臥波瀾。

開善寺

寒聲蕭蕭霜葉秋。石路礚礚穿林幽。雲橫遠岫若平斷。風約小溪如倒流。偶經名藍亦終日。喜有勝士同茲遊。移牀果茗咄嗟辦。杖屨欲歸仍更留。

悠然堂

在崇安潭溪

吾廬猶未完。作意創此堂。悠然見南山。高風邈相望。賓至聊共娛。無賓自徜徉。

宴坐巖

在潭溪

青青欂櫨林。下蔭蒼蘚石。幽人宴坐時。懷抱忘其適。不見暮樵歸。寒山雨中碧。以上屏山集

陳晉錫

晉錫。明州人。紹興十二年進士。

題衆樂亭

襟百慮不容侵。勝概乘閑偶訪尋。跌坐豈無觀水術。臨流應有濟川心。斂將蓬島溶溶氣。散作陽春字字金。郢曲調高人寡和。微生何敢綴雄吟。乾道四明圖經。

